

今

火上帝識知其惻怛下民感激於愛憐故於出納之司獲此神明之沉煌；其質炳；厥符臣猥以庸虛謬當典領龔六經為七願紀瑞於史官呼萬歲者三敢效誠於嵩嶽

賀紅鹽表

趙承之

聖神受命冠古超今川瀆炳靈產祥降嘏蓋昭示於景鑠以大賚於羣生中賀伏以潤下作鹹實資惠養熬波出素厥有由來詎聞皦爾之珍効此赫然之瑞蓋必有無前之績故能與不世之符此蓋 皇帝陛下道契堪輿政平水土獨奮至剛之斷力迴既倒之瀾天無私而益親地有寶其敢愛臣方乘邊鄙阻造

闕廷貢篚當前想羹梅之驟美炎精協序驗火德以彌昌

賀玉屋山天尊降表

盛德感通上真降格金簡玉札自古莫窺風馬雲車乃今親覩中賀竊以先朝祕殿肇帝祖之躬臨近歲南郊赫眾星之丕應蓋已和同而無間固宜陟降而弗違非聖孰能實天克享恭惟皇帝陛下力行慈寶深體道樞事帝極其肅祇震於神物保民達乎仁愛播為頌聲方當定鼎之陪都載緝封蠻之盛典仍即仙山之勝復瞻颺馭之游維申錫於休祥可揆知於天意臣久參從橐遠守州符阻陪來賀之班第罄無疆之祝

風

賀明堂萬歲山祥光表

汪彥章

帝宇聯華神光並煥方真人御極游陰陽造化之功故瑞祲浮  
 空出日月照臨之上觀瞻莫測呼舞維均中賀伏以周家開重  
 屋之基黃帝起明庭之壤九筵五室蓋天人精祲之交萬壑千  
 巖本仙聖游居之地曖即穹窿之表肆呈紛郁之珍交縹緲之  
 雲龍度駢闐之風馬雖境分南北相望丹禁之中然時歷昏昕  
 皆協素秋之半茲蓋 皇帝陛下風夜基命清明在躬包兩儀  
 於泰定之光飾萬福以昭回之象乃格層霄之應坐聆羣燭之  
 光恍若壺天金成宮闕浩海玉海虹貫山川矧藁街大獻之辰  
 仍桂魄將圓之夜融嘉氣示鵷行瓌璋之觀肅靈氣生羽  
 衛清虛之想亘古無有非今孰能臣等幸服邇僚欣逢嘉貺屑  
 然有見陋祠壇三燭之祥赫爾方興明寶歷萬年之慶

賀雨表

王禹偁

自秋以來時雨不降遇災而懼至誠爰禱於上玄有感則通甘  
 澤忽霑於下土農登有望朝野同歡中賀伏惟 尊號皇帝陛  
 下七政咸齊五行為質寅畏昊穹之命焦勞刑政之源一昨祆  
 彗告災豐年失望宿麥播而未茁旱雲垂而不霑陛下靡愛斯  
 牲徧走羣望降廷臣而決獄御便殿以錄囚御筆搗文乙夜引

燮

萬方之罪清詞滙懇經旬祈五福之宮惟德動天而天不違至  
誠感神而神授職向夕而月離於畢崇朝而雲上於天散絲編  
灑於焦枯比屋重興於耒耜豈止小康之兆將書大有之年堯  
眉舒八彩之顰免貽臣辱舜樂復九成之韻大悅民心凡在含  
生同知大賚臣為霖寡術和鼎備負方期冊免之文以塞燮調  
之咎處台司而愈愧荷聖感以彌深

賀雪表

王禹偁

臘者四時之暮所以成歲功雪者五穀之精所以滋農畝實上  
玄之垂祐表聖主之憂民凡在昌朝共欣嘉瑞中賀伏惟尊

號皇帝陛下勤勞庶政欽順天時因百姓以為心思躋壽域慮  
一夫之不獲常若納隍而自秋徂冬密雲不雨陛下念兆民之  
稼穡憂七廟之梁盛徹金石於堯軒減葷羶於舜甑而又京師  
之內鰥寡之徒大頒金帛之資用拯飢寒之累靡神不舉有感  
則通遂令六出之祥大副三農之望連宵委積徧野霑濡彰聖  
德以彌光書有年而無愧臣方居假告忽覩休祥雖慙調燮之  
功但樂豐登之極

賀雪表

葛侍郎

同雲彌望布清灑以垂陰密雪應期協康年而呈瑞載塗流詠

薄海騰歡恭惟 皇帝陛下體御至神幹旋元化撫五辰而致  
順閱眾甫以咸宜致茲六出之祥來應一陽之候飛花剪水舞  
青女以縈空亘陌連阡貯黃雲之若按臣承休天陞庇職台司  
奉萬壽之觴虔祝延鴻之筭引七星之屢敢言燮理之功

賀雪表

呂伯恭

蠶護嬋娟穆若清都之遠聯翩飛灑曷然豐樂之祥璀璨宸居  
昭融休氣恭惟 太上皇帝陛下默調玉燭高牀珍臺成性存  
存雖獨觀於虛白為眾父父未庸釋於黎黔顧圭璧之錯陳睠  
倉箱之載懌臣邈居下土絕跂寥天游藐姑之山既瞻冰雪占

曾孫之稼豫慶苾苳臣無任

賀雪表

呂伯恭

皇極之主疇既叙於時寒累年之冬兆先占於積雪繽紛六幕  
貴冒九圍恭惟 皇帝陛下綏靜嘉師財成元化嚴凝西北歛  
義氣以方升疆理南東瞻同雲之已合瑞呈禹甸喜溢堯衢臣  
等幸際昌辰欣逢休應授簡而居客右雖漸梁苑之辭為樂而  
與民同請上齊宮之對臣無任

奏捷 講好

賀講和表

岳少保

臣伏准敕書節文金人許割河南地歸本朝者觀時制變仰聖  
哲之宏規善勝不爭實帝王之妙算念此艱難之久姑從和好  
之宜睿澤誕敷輿情胥悅中賀竊以婁景獻言於漢帝魏絳發  
策於晉公盟墨未乾歃血猶在俄驅南牧之馬遽興北伐之師  
蓋夷慮不情而犬羊無義莫守金石之約難充貉豕之求圖暫  
安而解倒懸猶之可也欲長慮而尊中國豈其然乎伏惟 皇  
帝陛下大德有容神武不殺體乾之健行巽之權務和眾以安  
民乃講信以修睦已漸安於境土喜想見其威儀臣幸遇昌時  
獲親盛事身居將閫功無補於涓埃口誦詔書面有慙於軍旅

尚作聰明而過慮徒懷猶豫以致疑謂無事而請和者謀卑辭  
而益備者進願定謀於全勝期收地於兩河唾手燕雲終欲復  
讎而報國誓心天地當令稽首以稱藩

賀安南班師表

曾文肅

臣某言伏覩廣南荆湖路安撫使司劄子已克伏交趾了當班  
師者獷俗乱常敢干天討偏師問罪深入塞庭戮其酋豪拓我  
疆土歡傾萬宇威懾四夷中賀竊以安南一方輿地千里世受  
爵寵列為翰藩屬傳嗣之童昏有擅權之姦慝遽為昨換自取  
滅亡迺申命於虎臣俾肅將於師律運籌決勝受神筭於廟堂

折馘執俘獻凱歌於宗社成雋功於不日邁振古以無前此蓋  
伏遇 皇帝陛下大智日躋沉機天縱赫然一怒舉必萬全詠  
采芑之南征固無慙德勞出車之還率亟有膚公豈惟底定於  
遐荒抑足震驚乎戎虜

賀斬夔離不表

汪彥章

王旅阻征犂庭沙漠種酋就殪丞首京師偉哉宗社之休永矣  
車書之一消辰大猷罄宇交歡中賀臣伏以天下為家既靡殊  
於疆界聖人去惡當務絕於本根惟犬羊傳襲之區隔日月照  
臨之造逢時休盛舉國震驚焉悉主悉臣來覲漢儀之舊實墉實

壑坐觀周索之同蠢茲遺種之妖敢肆怙終之惡介山溪而負  
眾盜名字以欺天爰驅烏合之師力抗鷹揚之旅乃煩四校之  
出不遣隻輪之歸既首戮於鯨鯢仍悉除於蜂蠆征而不戰聊  
麾荆柄之幡梟以示懲永震葉街之邸恭惟 皇帝陛下與天  
同大視古無前運五季以精神之餘玩四夷於股掌之上雖游  
魂之屈強難假息於涓叟坐令醜類以寒心常若神兵之在頸  
臣側聞盛事阻造外庭登喬嶽以告功雖負史談之歎斬名王  
而擊鼓敢忘班固之銘

賀收祥州表

晁之道

盛德丕冒要荒畢徠地歸版圖人襲冠帶際天無外揆古有光  
中賀 竊以上主憂民願豈私於絕域百蠻從化或頗識於慕君  
蓋至仁不得獨遺宜聖世為之遠撫矜其誠懇錫以寵光肇新  
郡邑之名適契休祥之會是為天意豈獨人謀恭惟 皇帝陛  
下經緯聖文卷舒神武四海從欲而既治九夷不詔而自來致  
此殊方列於支郡故封雖遠如瞻咫尺之威歡頌載新願上千  
萬之壽

賀安南捷奏表

曾文肅

威靈所被萬里收功凱捷布聞兆民賴慶 中賀 臣聞聖人之於

征伐也用非得已先王之於夷狄也威然後懷物萃聚而除戎  
時豐亨而致法蓋方飾治之既備故苟犯順而必誅虞帝所以  
事有苗之征宣王所以有淮夷之伐監此前載率於盛時恭惟  
皇帝陛下剛健體天休明超古萬方順以無侮三靈和而允懷  
曾爾交蚩干我天討跳鬻肆於窮壘虔劉及於數州不示大刑  
曷懲下軌軍聲震疊肅如金鼓之下天皇澤漸濡固若雲霓之  
救旱俄莞然而請命因示之以好生惟盛德所以成無戰之征  
唯至神為能有不殺之武出車薄伐既奮蚩荆之威俟後來蘓  
行紓北狄之怨海隅大定氛祲一清赫然盛勳若無前古

賀收復涿易二州表

汪彥章

聖謨獨運王旅徂征行列聖之逋誅弔百年之遺俗種酋內款  
疆籍來歸中賀臣聞黃帝得天始正坂泉之伐宣王復古爰興  
獵狝之師緬惟幽薊之區久失漢唐之舊厥留玉績以待聖時  
出成筭於九重乍提封之萬里風聲鶴唳何勞震疊之餘簞食  
壺漿惟恐歡迎之後茲蓋伏遇 皇帝陛下功高治古道冒綿  
區兼收夷夏之心克紹祖宗之志得皇天之所覆徠上古之不  
臣前茅果入於殊疆破竹遂無於遺策臣幸逢嘉會適守遐藩  
傳聞毳帶之朝悉陳渭上遙想龍墀之慶獨祖周南

賀瀘南班師表

小醜亂常敢憑陵於鼠穴偏師薄伐旋毀覆於梟巢捷書流聞  
戎漠震竦臣某中賀竊以獵狝孔棘十乘以之啓行垂荆來威  
四方以之無侮三川之南鄙有八詔之遺黎雖種類寢微莫能  
統壹而封疆交備每輒寇攘大張我師深入其阻未悔鷓藩  
之禍尚懷距轍之姦武節載馳靈旗斯指伐山通道駭王旅之  
如飛折馘執俘信天聲之有赫既掃除於妖孽蓋恢扞於方隅  
邊障肅清里閭安悅此蓋伏遇 皇帝陛下操德勇智玩心神  
明端拱九重之中折衝萬里之外沉機罔測獨斷不回干戈省



躬居無忘於遠畧鉄鉞飾怒動必克於仇方矧絕塞之荒墟宜  
指期之殄滅臣叨備近職預聞吉音徒誦周雅采芑之詩莫陪  
漢庭奉觴之慶永言抃躍實陪等夷

賀聖駕還京表

王禹偁

臣某言今月十六日進表院狀報正月二十三日駕還京者犬  
戎逃遁塞輅凱還中賀伏惟尊號皇帝陛下奉承祖宗威懷  
我狄但懋守文之德靡矜神武之功蕞爾林胡無名內侮蜂屯  
烏合鼠竊狗偷必想邊民拿挺以毆攘亭長持繩而繫縛豈勞  
車駕遠涉山川陛下念二聖臨朝每經營於河朔屬三時不害

貌

乃巡幸於沙場存問耆年勞來疆吏有征無戰陳時觀風邊人  
識龍鳳之姿胡馬避虎貌之衆昔周宣薄伐玁狁深入太原漢  
武斥逐匈奴遐臨瀚海頗為勞弊尚著聲名曾未若陛下仰順  
天時俯從人欲出狩適當於冬隙班師未發於農祥瑞居紫宸  
飲至清廟穀雨方霏春華正繁捧觴長樂之宮錫晏上林之苑  
皇歡大洽天步永安易曰聖人以順動則刑罰清而民服孫子  
日不戰而屈人之師善之善者也其是之謂乎臣方在謫官無  
由扈從既不草頽利可汗之露布又不得答冒頓單于之慢書  
當文士有為之時處山州無用之地迎塞莫遂望闕彌深無任

歌時樂聖

賀捷奏表

汪彥章

其  
 整我偏師深入襟喉之地執某醜虜遂空巢穴之羣捷走星馳  
 歡聲海溢中賀惟此犬羊之聚數搖蜂蟄之奸不思覆露之隆  
 寬輒肆跳梁而旅拒如江如漢始知蹈犯之難我陵我阿坐獲  
 并包之利斬馘千計沉機萬全茲蓋伏遇 皇帝陛下睿筭中  
 潛神威遠懜坐制四夷之命靡煩六月之征不戰而屈人兵兼  
 成破竹之勢有常以立武事遂奉采薇之詩臣等幸服邇僚親  
 逢殊慶兩階舞羽曾莫贊於苗征萬壽稱觴顧敢忘於虎拜

聖宋名賢五百家播芳大全文粹卷二中

賀戩

皇太后

賀壽聖太上皇后冊尊號戩

趙德莊

肇新緝典欽薦鴻名仰符宸極之尊增厚坤元之載禮成中禁  
 歡動寰區中賀蓋聞以天下養者務極於推崇使聖人壽者爰  
 深於愛戴天心所命人欲必從恭惟 壽聖太上皇后殿下維  
 德是行以慈為寶有開文定寶占渭水之祥尚友西真方侍瑤  
 池之御揚洪輝於玉檢効靈瑞於龜圖流周召儉勤之風介黃

老清淨之福永同臨照燕及雲來某久被明恩親逢殊慶莫踵  
及庭之賀徒傾方岳之呼

賀壽聖皇太后冊尊號牋

許仲啓

聖膺曼壽知太極之有初實著徽名眎東朝而由舊兩宮致孝  
萬寓均歡中賀恭惟 壽聖皇太后殿下慈寶兼三福疇用九  
當燕謀之益廣宜鴻號之載熙文子文孫偕飾問安之懿言蹕亘  
今亘古誕敷歸美之形容臣乘障攸拘班庭 致漢家之長  
信未足同時誦周室之思齊茲誠並也

賀太上皇后加備德尊號牋

沈清臣

大慶欣逢仰乾坤之履燾鴻名來上增日月之光明喜動慈闈  
歡騰率土恭惟 尊號太上皇后殿下久勤內助光贊中興壽  
莫可量觀人行熾昌之嗣德無不備兼聖明慈愛之休載極形  
容於昭懿錄臣敬同我衆歸美吾君奉太皇后而怡愉允合昌  
黎之頌為天子父而尊養克符鄒益之辭

皇帝登極賀壽聖皇太后牋

許仲啓

思齊文母密協遠猷佑啓神孫光膺內禪慶臻家國喜徧華夷  
中賀恭惟 皇太后殿下德至慈三朝備福素軫含飴之念  
贊成輯瑞之儀原揖遜之有初重規疊矩處重高之無極億載

萬年臣假守遐陬阻趨近綴共知養志調四海之旨甘更想問  
安聽兩宮之警蹕

皇帝登極賀壽成皇后牋

許仲啓

承天之亨施生攸賴與子之新翊贊實勤慶輯家邦歡均遐邇  
中賀 恭惟 壽成皇后殿下動參乾極厚體坤元作合而定厥  
祥昔著和平之美執中而修可願今昭保毓之慈軼長樂之徽  
稱儷重華之大養臣屬拘乘障莫邁班庭仰婦道母儀有助唐  
虞之禮想王孫公姓不忘周召之風

冊皇后賀壽聖皇太后牋

燕處藻宮致孫謀之永錫鳳儀椒掖謹婦道之再傳 中賀 恭惟  
壽聖皇太后殿下聖本自然壽先太極比姜任而致福撫舜禹  
以稱慈化基自有於本原豈徒一日壺範亦同於授受特表三  
朝臣假守列城阻趨魏闕王母之坐少廣共仰尊：太妣之嗣  
徽音是為繼：

冊皇后賀壽成皇后牋

仰作孚於渙號正此化基俾劬法於坤元授之慈範 中賀 恭惟  
壽成皇后殿下處心柔順宅志沖虛昔警戒以相成今康寧而  
曰壽表儀有道尤高瀉水之風付託得人遂陟塗山之助臣遠

乘一障阻敬九閨繭觀春和想示親蠶之訓翟車曉霽更形問  
寢之儀

慈福宮上尊號賀壽成皇后戕

聯南極之輝養茲為大仍東朝之號孝心有原中賀恭惟壽  
成皇后殿下柔順體坤淵沖宅道俯贊基圖之授仰偕溫清之  
承得其壽得其名靡聞專嚮達於禮達於樂式著至和臣獲與  
承流敢稽進牘媿泐之濱虞舜尚籍閭儀寶慈之侍太皇諒傳  
家法

重華宮上尊號賀壽聖皇太后戕

坐少廣以迎年既繇積厚協重華而建號亦出至慈中賀恭惟  
壽聖皇太后殿下夢日義明補天勳大鴻寶昔聞於與子燕謀  
今見於詒孫仰稽揖遜之傳蓋推愛育儻即形容之義厥有本  
原臣獲與分符敢忘進牘為眾父父知尚謹於問安終日乾乾  
諒不違於養志

重華宮上尊號賀壽成皇后戕

夙昭慈範贊揖遜於一時並上徽稱迎延洪於億載慶兼家國  
喜溢華夷中賀恭惟壽成皇后殿下德合大明道偕太極克  
嬪虞之懿助成畀妣之高定位取諸乾坤為而不恃貴名起如

日月傳之無窮臣假守遠邦阻趨近綬二南蓋久更形風動之  
辭十乱已卑空誦才難之訓

慶上皇壽賀太上皇后牋

沈清臣

久日月之照並膺難老之期永邦家之休載講采文之舉式逢  
歲旦共衍耆齡恭惟 太上皇后殿下輔佐深仁備全至德松  
椿兩固植國榦之隆昌箕翼齊明炳乾圖之煥耀有美玉卮之  
對相輝寶牒之光臣敢同普率之心彌切歡呼之慶華封稽首  
壽請祝於聖人義易垂辭福受茲於王母

賀皇太后生辰牋

李成季

候屬西成屆金方之正氣時生上聖配天德之鴻休聲文所臨  
舞蹈同底中賀恭惟 太皇太后陛下母儀恭肅坤德靜柔彌  
成永圖休有顯烈三光明而四時節九功叙而百度熙恢基業  
於無垠躋民物於交泰文武之興周道華胥之贊軒圖迪是芳  
風賈超治古臣守職藩佐叨榮聖時觴獻萬年共預造庭之列  
心肩一節徒傾就日之誠宜益介於延洪庶克符於頌祝

賀皇太后生辰牋代

秦少游

考曆占星氣應元英之候稱觴獻壽禮行長樂之宮凡在照臨  
所同欣抃中賀恭以 皇太后陛下德符坤載位正母儀淵沖

自乎生知慈惠本乎天縱彌成文考既隆逮下之風共養太姜  
益著思齊之美內宣陰化日嗣徽音矧當孝治之朝尤崇慶誕  
之節鼓鐘具舉環珮畢臻歡聲動於宮闈佳氣蟠於觀闕其繆  
通屬籍叨守近藩匪惟宗族之同榮實與吏民而共慶

賀太皇太后受冊牋

李成季

誕膺寶冊同攬乾綱號越常尊禮隆無上孝慈交感遐邇祇歡  
中賀恭惟 太皇太后陛下柔順在躬聰明齊聖輔佐英帝肅  
陰教於六宮保鞠先朝端母儀於萬國載加盛典允答徽音挾  
日以升均照臨於南面與天同久擁康樂於西朝臣限守藩符

不獲趨詣闕庭

賀皇太后受冊牋

李成季

允膺寶冊增奉鴻名大孝隆親事光墳史萬邦蒙福喜極人神  
中賀恭惟 皇太后陛下育粹坤元服勤陰教輔佐先帝志在  
靜柔保鞠聖躬德惟均一式彰懿範推講盛儀祇答懿慈盡明  
王之要道誕敷徽命鼓百姓之歡心臣限守藩符不獲躬詣闕  
庭

賀皇太后受冊牋

曾文肅

膺冊慶辰正位太母七廟增重三靈協和 中賀恭以 太皇太

儉

后陛下仁聖自天肅雍迪哲抱坤元之厚德倡陰教以中闡恭  
儉表儀外刑于四海勤勞勲業光被於三朝席高顯之徽稱極  
尊親之大奉比周文母世賴於徽音如唐懿安禮隆於祖后光  
輝大典協永寶圖人神蒙休海宇均慶臣云云

賀皇太后受冊牋

晁無咎

位著徽稱居天下母儀之貴禮嚴備物昭聖人子道之成宮闈  
載祇海縣胥慶中賀恭惟皇太后殿下懿恭惟得慈檢身先  
坤極正於內朝陰教行於四國用膺光命允答常尊漢典具修  
式度長樂之養周詩足繼大顯思齊之功臣伏限職事在外不

獲躬詣闕庭

賀皇太后受冊牋

秦少游

稽酌天人備嚴典禮孝治既先於宮闈歡心自得於寰區中賀  
恭以皇太后殿下妙道生知英能天縱自長門而登長樂法度  
無違以太任而事太姜晨昏不懈至於彌成先帝之治保佑聖  
子之功幽通神明顯被動植施之大者報必厚實之富者名  
必隆位號既昭華夷增抃臣謬通屬籍叨假郡章不獲隨例稱  
慶闕庭

皇后



皇帝登極賀皇后牋

許仲啓

剛德初潛實勤輔佐靈辰內禪宜最寵光家國愈尊華夷胥慶  
中賀恭惟 皇后殿下賢昭彤史眷林青闈蚤膺燕祀之嘉祥  
適值龍飛之盛際履長秋而建號載仰母儀頤重慶以承顏永  
修婦順臣遠叨郡寄阻遙朝班流化自歧顧孰分於周召嗣音  
如妣想莫間於姜任

慈福宮上尊號賀皇后牋

許仲啓

輔佐絲初位正長秋之建名稱從者禮嚴重慶之加 中賀恭惟  
皇后殿下月朔日明坤承乾健際此龍飛之盛奉茲鴻號之尊

玉振金聲敬致自然之表天長地久永依太極之光臣尚假守  
符遠修賀牘仰承三殿想殫侍膳之勤俯率六宮僮繼親慈之  
舉

重華宮上尊號賀皇后牋

許仲啓

奉尊親之號允屬聖能佐孝敬之誠端由婦順 中賀恭惟 皇  
后殿下性鍾博厚運偶明昌穆如內治之和贊此外心之博體  
乾坤而合德大養必偕顯父母以揚名徽音是似臣邈居乘郭  
阻遙班庭寶刻昭垂想萬年之歸美禕衣盡飾同五日之問安

加太上皇太上皇后尊號賀皇后牋

沈清臣

禮舉外朝政開內治贊一人之愛敬揚萬世之休嘉恭惟 皇  
后殿下教表人倫化行婦道得名得壽既慶集於親闈事舅事  
姑諒喜同於坤極臣濫居帥守恭覩詔宣仰太妣之嗣音載光  
於雅頌重華之協帝歸美於君

賀皇后受冊牋

許仲啓

輔佐儲闈功嘗參於匕鬯表儀內闈位初正於禕褕式舞且歌  
自家刑國中賀恭惟 皇后殿下本之恭儉濟以憂勤選由仙  
李之華慶屬猗蘭之秀仰膺圖於上聖爰受冊於靈辰治首六  
宮既明章於婦順德孚百姓致於變於時雍臣祇奉教條阻趨

如

班列第觀肅：賢人罔問於免置尚想振：公子盡加於麟趾  
賀皇后受冊牋

中闈正號佑天德之大明四海蒙休慶國風之有本禮嚴宮掖  
歡浹海隅恭以 皇帝陛下以上主之資履重熙之祚至仁冒  
乎天地濬哲嗣乎祖宗謂聖人之功重乎治內而天下之定始  
於正家詔典冊於有司進坤儀之徽號仰恭 祀下厚人倫

賀皇后受冊牋

儷尊皇極宅正位於天闈配德紫宸膺鴻名於寶冊海內臣妾  
舞蹈以之中賀臣聞文命造邦塗山所以宣內助重華嗣聖皇

英所以輔至明宗廟歆其薦羞穹壤因而垂祉載光懿範永屬  
熙朝恭惟 皇帝陛下纘服睿圖席休寶緒兩儀均大含生荷  
亭育之恩二耀高臨品物仰照臨之惠是以淑譽流於區域陰  
教序於宮闈用贊王猷必崇位號加麗禕衣之貴增光彤管之  
華臣忝寄藩方阻遙天陛

皇太妃

賀皇太妃受冊牋

晁無咎

冊嚴異數位著徽名光舊典於古今溢歡心於內外 中賀恭惟  
皇太妃殿下令儀身率淑德性成輔佐先朝憂勤內寢屬大明

之繼體孝治增隆飾備禮於有司尊稱允答

賀皇太妃受冊牋

李成季

誕膺徽冊增奉隆名凡在邇遐孰不抃蹈 中賀恭惟 皇太妃  
殿下慶傳貴緒端發靈源率嬪御以靜柔奉蘋蘩而蠲潔屬真  
人之纘紹推盛典以褒崇歡動宮闈事光史冊臣限徇藩守阻  
造闕庭臣無任

賀皇太妃受冊牋

秦少游

史官揆日宗伯陳儀舉令典於宮闈溢歡聲於方夏 中賀恭以  
皇太妃挺生淑質休應昌期贊陰化於椒塗嗣徽音於彤管晨

昏共養之禮簡在兩宮動靜謙肅之風形于六寢在先朝則有  
警戒相成之道於聖主則有幼勞罔極之恩中外所瞻情文宜  
稱肆被冊書之美爰昭位號之隆臣猥被爪牙叨居藩屏不獲  
隨例稱慶闕庭

皇太子

加太上皇尊號賀皇太子牋

沈清臣

重規疊矩等天地以無疆寶冊鴻名觀朝廷之再舉事開宗社  
喜溢宮庭恭惟 皇太子殿下貳體純乾承休太極參隨法駕  
之後敬上慈闈之稱祖烈用光儲儀有慶臣忝聞盛事抃極懦

衷始於家邦既仰愛親之立施於孫子自然帝祉之貽

慶太上皇壽賀皇太子牋

正月之吉始和式逢舜旦四海之內咸仰共慶堯年喜侍龍樓  
歡連鶴禁恭惟 皇太子殿下德輝玉格福萃金枝喬嶽萬尋  
近接瑤山之秀銀河千丈直滋少海之長行瓜瓞之綿、壽乾  
坤之蕩、臣阻趨雞戟屬綰麟符南極星明永赫在前之照蓬  
壺、永共瞻明雨之光

賀皇太子受冊牋

晁之道

備膺典冊肇建儲闈國本既隆海隅共慶恭惟 皇太子殿下

淵懿中積溫文外彰仁孝稟於生知藝休格乎天縱蹈三善之美既曲盡於承顏並重離之光宜歸崇於主鬯神祇悅豫廟社尊安某外守州麾阻陪班賀仰皇猷之增煥揆弱植以知榮

賀皇太子受冊牋代

汪彥章

伏審仰法前星肇開儲禁慶閔宗社禮絕臣鄰恭惟皇太子殿下胄出神明生知忠孝夙稟刑家之訓居在在傳之勤震一索而得男蚤膺眷命月三日而成魄難徇撫謙兼隆監撫之名進極褒嘉之數載錫彤珉之冊爰頒青輅之旂某幸託宗暉欽承友順盛典方昭於宮壺歡聲敢後於簪纓

賀皇太子受冊牋

顯膺寶冊升位儲宮臨軒行曠古之儀見廟示承祧之重恭惟皇太子殿下分輝寶緒毓粹璿源挺天岐嶷之資稟神聖徇齊之教當周室本支之盛獨冠百男宜漢家羽翼之成無煩四皓前星外炳滄震中潛某幸列宗枝喜隆邦本河潤九里方率族以依仁月有重輪願登歌而薦祉

賀皇太子受冊牋代

發冊於中升儲以嫡遂正少陽之位永符太極之尊恭惟皇太子殿下稟德星輝凝姿玉裕種朱芾宜家之慶膺青宮主器之祥左右前後皆正火既懋分坊之選于支羽蓋在東序行觀萬曹之儀某幸出聖時親逢邦慶喜人倫之既正符天下之至公頌詠無窮歡宴固既

賀皇太子受冊戲代

孚號揚庭元良貳極明父子君臣之懿協神祇宗社之休恭惟皇太子殿下信厚發中寅恭承上得賢哲少成之性符邦家長發之祥芳履以提封遂三加而冠昨歌詠重暉之日允合天心旂登一角之螭仍昭聖祚某久參肺腑同奉威顏傳聞徽冊之頒倍百外朝之慶

起居表

北郊清城起居表代皇子

汪彥章

輿衛天行親講誦祇之禮臣工宿駕交修扈聖之儀當解愠之清和宜儲精之暇穆恭惟皇帝陛下接千歲之統合三神之歡膺多福以履至尊舉禋威而明德意肇修陰祭衷對坤靈千廬星列於壇場萬騎雲屯於次舍協氣旁達祥光上浮臣方習

幼儀莫陪顯相嘉與函生之類共憑持載之安遙企威尊惟深慶抃

北郊清城起居表

函鍾八變將修大祭之儀陞戟百重密警周廬之衛舉典容而創見殫誠物以駿奔恭惟皇帝陛下道與時升禮由義起謂一郊二祭之合非三代六經之傳弗謂屬車之勞躬臨方澤之祀壇垓在望籩豆告陳蠖濩深思豐融來應臣屬當黜毳莫侍冕旒徒瞻睟穆之光無補肅雍之相

車駕親征起居表

趙德莊

實

靈旗杓指誕揚北伐之威戎輅天臨式慰中原之望儼百神而受職拱方岳以來朝恭惟 皇帝陛下淵嘿坐謀乾剛立斷神武不殺初何意於勇功天罰恭行實有關於駿命虜為不道古所未聞久敷德以示懷終阻兵而棄信詔聲厥罪人奮其忠方三捷以系傳宜一征而底定舉上郡元封之役親屈帝尊踵澶淵景德之行用光祖武清虛所屬時雨自霑臣猥假藩符阻陪羈勒仰民獻十夫之翼雖媿壯圖晞太平一士之功猶知謹守

車駕親征起居表

汪彥章

基

帝陛下誠貫神明資兼智勇合羣英之策慮與中否之基圖念問安猶隔於雞鳴豈撥亂得辭於馬上姑從簡約用始憂勤臣方遠闕庭莫共牧圉神戈所指方令裴度以視師清蹕之行將獲呂嘉而名縣

車駕回鑾起居表

趙德莊

皇威烜赫方望幸於中原聖孝寅恭暫歸承於清廟民有雲霓之慶師無霜露之勞恭惟 皇帝陛下開濟艱難圖回久大尚勤寶儉來天佑於清躬惡殺好生養國祚之元氣昌期將啓狂虜自夷時乘六龍淮海風動日闢百里豪傑景從適誌祀以言

還因薦勲而飲至格於藝祖聊收虞守之常作我上京終復漢  
家之舊臣義均國體喜若已功簪橐坐踈雖愧甘泉之從衣冠  
未挂猶瞻清渭之朝

車駕巡幸起居表

方仁和

六師雲陳共圖敵愾之忠萬乘天臨親示拊循之旨玉靈敷暢  
士氣歡騰中賀恭惟 皇帝陛下孝本親、功起將、思父兄  
之播越軫吏士之勤勞露沐風纏共濟艱難之業雷驅電掃訖  
收嘉靖之勲臣叨守籓符但忝羈勒四方來慶願陳下武之詩  
二聖重歡佇勤中興之頌臣無任

車駕巡幸起居太上皇表

汪彥章

素秋既杪人欣萬寶之成滄海方澄地接三山之邃恭惟 太  
上皇帝陛下獨觀昭曠高臨希夷凝宗定之天光藏雷聲於淵  
嘿玩味瓊笈逍遙蕊宮神靜身修既得廣成之道年豐粟熟益  
知姑射之神臣等夙侍清光叨陪大政莫執問塗之役唯瞻寧  
極之尊

車駕巡幸起居太上皇表

年運而往天時俄及於凜秋日舒以長物外方觀於浩劫恭惟  
太上皇帝陛下研幾繫表探頤寰中既與夫造物者游孰肯以



天下為事遺元珠於赤水久矣相忘飲膏露於金莖自然難老  
臣等幸奉法從嘗侍清光徒頓就日之誠莫遂瞻天之意

陳請表

請車駕東封表

趙承之

雲霄高遠未獲感通螻蟻賤微尚懷悃悃周避再三之瀆冀申  
萬一之情中賀臣等竊以天至尊而不可違民甚愚而不可抑  
王者之德既當於天意聖人之澤又浹於民心和氣發於休祥  
歡聲播乎嘉頌福固難於專鄉食誼必思於有尊蓋欲歸功於皇  
天所以從事乎喬嶽文皆經見學亦世傳故孔子著柴望之儀

以紀唐虞之常道而王通昧封禪之理乃謂秦漢之侈心方當  
黜異說以崇大猷莫若修盛典而示德意恭惟 皇帝陛下堯  
仁舜孝文德武功論極前王之所未嘗政皆近古之所不列有  
四海之面內無一夫之向隅意所欲而動必成心無求而福自  
至昭然顧諟之命煥乎錫予之符超河圖而溢洛書昔皆無有  
發石室而探金匱史不能名治固莫盛於此時神亦有望於今  
日所以兆人膺合百辟僉同羊獻長卿之文願上倪寬之壽以  
謂接千歲之統安可繫三神之歡紛然陳義之高殆若後予之  
怨雖聖懷謙損方且深闕於俞音而靈況昭明無乃久稽於眷

爭

命伏願 皇帝陛下改容有穆出詔惟愍不殫涉獻之勞毋重  
省方之遠揭虔燔燎報地堪輿東方會諸侯之朝南面受羣臣  
之賀屬車八十一乘獲望清塵祥符一百七年再觀盛事民所  
願也天豈違之臣等咸以非才並當所部採忱辭於多士察衆  
志於編氓與其坐壅塞以貽譏不若緣冒煩而得罪神堪致薦  
雖自愧於蘋蘩日儻回光 庶幾於葵藿

請車駕東封表

趙承之

帝德昭明功既成而必告天心惻怛民所欲以斯從敢傾有眾  
之情願達蓋高之聽目瞻雲日足蹈冰淵 中賀 臣等竊伏里閭

究觀載籍禮盛者其文必縟施豐者其報必崇故王者謹於事  
天而聖人乃能饗帝時薦犧牲之潔歲陳珪幣之嚴至於膺不  
世之殊休則必舉非常之茂典推因高之義而即介丘之遠竭  
報本之志而躬夙駕之勞蓋稀闕之上儀實太平之盛節然相  
望者萬有千歲而可紀者七十二君道不虛行時若有待恭惟  
皇帝陛下體堯蹈舜跨商越周躬膺曆數之歸天縱聖人之畧  
一心紹述孝弟通於神明萬物阜安忠厚及乎草木兵與刑而  
不試禮暨樂以咸興戎狄奉贄以守藩夷貊絜國而請吏農有  
常豐之歲士無不養之才故得人和而天瑞臻神況而地寶出

圖書炳煥象類昭明極明數而無以該罄竹帛而不能紀茂惟  
天意具迪民衷鋪觀赫々之祥灼見諄々之旨所以西踰邠郟  
東越龜蒙周人既願於升申魯國尤深於望幸眷此商韋之舊  
素聯畿邑之尊日月曬光最先瞻睹雨露流潤罔不函蒙惟祥  
符檢玉之年實真祖駐蹕之地屬車再至黃屋少留精舍有嚴  
尚錫雲封之號修塗不改猶遵輦路之餘臣等所以爭倒衣裳  
競傾葵藿稚子不知其舞蹈耆年願際於涓臾冀聞謁款之音  
舉獲侯來之慶伏願 皇帝陛下仰承帝謂俯詢輿言崇盛祀  
之闕規抑撝謙之高行涓辰誕告先日戒期命掌故以修方詔  
秩宗而考禮稽時巡於虞典則先至者岱紹祖武於章聖則用  
事者東渙百執以駿奔儼六飛而順動登封降禪並交天地之  
歡發政施仁咸錫臣民之幸臣等冀緣清道獲望咫尺威儀鳴鑿  
之暫聞故填壺之無憾正憐此日方馳海上之思猶喜異時無  
復周南之歎

請車駕西祀表

邵澤民

夫意溥臨人心協應願講親祀之禮式昭報本之規輒露封章  
仰干宸聽中賀臣聞自古在昔若聖與仁因地因天以祭以祀  
蓋乾坤之合德宜父母之並尊惟彼柔祗實專厚載修祠漢室

卜宅魏睢出鼎騰光允矣后皇之靈迹泛舟鼓擢偉哉孝武之  
勝遊我國家臻至治於祥符闡鴻徽於章聖遠紆法駕躬奠黃  
琮玉匱金繩禮全掌故重輪紫氣事載信書間有遺民能言往  
躅顧長春之舊境乃馳道之通衢梵宇深嚴永留玉座飛橋連  
屬常錫重名念此弥文且成曠典理若有待遭之甚難恭惟  
皇帝陛下當制禮作樂之時撫重熙累洽之運天臨海宇子育  
黎元成功不居修報有自是以兼隆二至之祀遠追三代之英  
感通幽明昭格上下神降祇出未之前聞瑞應祥臻其可勝紀  
伏願 皇帝陛下既封嵩岱即款河汾藏事靈壇侑饗烈祖盡

吉蠲之孝享罄明察之誠心然後錫福萬民垂休永世面方岳  
以朝羣后覽道俗而問百年駐輦蒲津光動倚天之樓觀回壑  
函谷雄觀亘地之山河臣逖遠闕庭叨分符竹俯殫悃悃深冀  
允俞望屬車之清塵敢効前驅而首路見甘泉之法從庶幾願  
畢于此生

請車駕幸洛表

趙承之

天地之德螻蟻莫不願忠壘輅所臨臣民以為至幸情甚眾以  
難抑聽雖高而必從敢冒昧以譴訶冀露陳於悃悃竊以成周  
舊宅不改山川有宋別都具嚴管鑰土最中於諸夏日尤近於

長安當開寶立極之初六飛天降迨景德承平之後萬乘雲從  
草木尚被於休光父老猶談於盛事禮曠焉其斯久民望之而  
甚勤趨修厥章宜在茲日恭惟 皇帝陛下盡循堯道丕顯文  
謨力追三代之純躬軼百王之盛治無細而不舉功有難而必  
成薄四海無障候之虞環九州皆冠帶之域載惟立愛尤切奉  
先南面而朝感春秋霜露之降西風所暨念祖宗弓劍之藏既  
出紼以戒期將涓辰而展事陵園動色如喜翠華之來京邑相  
趨咸願屬車之覩而况闕宮肅設儼列聖之睟容禁宇崇成煥  
中天之寶構宜暫勤于乃頌庶深慰于斯民伏願 皇帝陛下  
俯照忱辭仰聞睿聽既竭孝思之奉特迂輦路之臨觀西后以  
省方御三川而問俗靈河達砥柱之險遠懷有夏之功溫洛通  
汴水之波遙念元豐之績臣等幸承官之獲採輿言冀聞清蹕  
之音敢効前驅之役庶幾洛下共償此日之心遂使用南無復  
昔人之歎

上皇帝勸進表

天人同心方嗣興於有德宗社事重可久曠於常尊雖懇款以  
樂推猶逡巡而牢避凡茲俟命安可厝躬恭惟 皇帝陛下識  
照幾微誠參化育早毓神明之胄茂昭文武之英有開必先既

獄訟謳歌之畢往惟德是輔將神祇祖考以咸寧當承再造之  
休乃守一謙之益三靈交鬱四海疇依惟聖人所貴於因時凡  
天下莫先於定分今九廟尚虛於裸獻兩河未入於輿圖繼體  
守文當亟收於眾俊宅中圖大宜深究於遠圖儻差一日之幾  
孰啓千齡之運伏望 皇帝陛下俯占輿誦光御法宮蒞中國  
而撫四夷履至尊而制六合雖以位為樂非堯帝之本心然其  
命惟新蓋周邦之舊物瞻威在望得請為期

大全文粹卷二中

聖宋名賢五百家播芳大全文粹卷第二下

陳請表

請加皇帝尊號表

王禹偁

内外文臣武僚具官趙某等言今月二十一日共千天聽別於  
尊名奉宸翰以未俞慮精誠而不至戴天就日猶懸億兆之心  
伏閣叫闈寧避再三之黷中賀臣等聞運行四時者惟天之大  
照臨萬國者惟日之明天不宰其元功而有蒼昊之號日不耀  
於陽德而有畏愛之名是以居廣大而罔辭處貞明而弗讓蓋  
功著乎上而名號隨於下矣前王後聖茂實英聲取譬於茲

章

其則不遠伏惟 皇帝陛下繼天而王如日之升靜則垂堯舜  
之衣裳動則仗湯武之旄鉞明堂制禮走玉帛於萬方宣室崇  
儒煥文章於三代候氣而八風從律陳詩而萬物由庚既理定  
以功成尚宵衣而旰食早以兆民愛戴羣后推崇率由舊章共  
上徽號陛下讓不得已俯而從之雖百姓同歡方諧歸美而一  
人善下終恐近名昨者法天道以流謙敷王言而如綽謂大道  
不器何假先天之言謂聖人無名豈湏惟睿之說盡除尊號頗  
駭羣情臣等奉詔靡遑再章復請陛下過防滿假終未允俞守  
謙卦之六爻動而無悔去湯書之七號卑不可踰遂使中外色

謙  
繫

廉

蓋軍民沮色既難移於成命乃別獻於加猷共傾天誘之哀用  
紀日月之德著龜協吉蠻貊同文咸願聽卑以期得請陛下特  
迂鳳藻猶避鴻名固愈振於謙光柰重違於人欲而况皇王顯  
號今古彝章上則尊列聖之貽謀光輝七廟下則稱庶邦之繫  
望威服八荒凡在含生共觀休烈豈可執勞謙之小節廢立極  
之大名居軒昊之至尊慕巢由之獨行此臣等之所未喻也陛  
下之所不取也臣等不勝大願敢固請上尊號曰 法天崇道  
文武皇帝庶得將順謙沖之旨惟新徽懿之名勉使聖朝有茲  
闕典跼天躋地固敢自安碎首糜軀期於必遂臣等無任區區

懇迫之至

請加尊號表

楊大年

文武百僚南郊大禮使具御臣呂某等與內外馬步諸軍將校僧道耆壽等謹詣東上閣門再拜稽首上言曰臣等一昨體上天之顧諟採萬國之謳歌願增益於鴻名用昭彰於盛德再三之瀆已負於刺芒億兆之誠弥堅於仄席遽頒明詔未賜允俞朝野之間啓處無措臣某等中賀臣等伏以字之曰道蓋出強名何言者天不聞讓德佛惟大覺美號有百億之殊君乃至尊徽稱兼三五之盛若夫聖人之沖粹高厚之儀形非可管窺寧

容臆度出於愛戴成此勤拳是故王者懋建大中載稽古訓握河洛之祕記所以愛天之明順黎獻之歡心所以從人之欲畧鳴謙之小節收輿誦之至公雖屈己以無辭誠當仁而不讓者也恭惟尊號皇帝陛下祇荷丕構茂宣重光法人文之化成體神武之不殺惟睿作聖有感必通居上克明無幽不燭泣辜扇暘示仁愛於羣生潔凜豐盛展孝思於九廟躬帝皇之能事掩載藉之前聞而復探妙道於域中敷至德於天下味希夷之旨允契混成挺高明之資雅敦柔克極妙育玄元之理彰務滋邁種之勤度越古今充格上下故羣情之懇倒述二美之形容



顧以大猷著於徽號而陛下固形沖挹猶鬱耿光莫高非天徒  
懷跼躋無私者日未賜照臨況郊祀有期方國咸在屹嘉壇而  
款太一宜昭答於神休奉灌盥以見祖宗合紹隆於先志苟違  
遐邇之請曷副人祇之心臣等不勝勤懇之懇敢固上尊號曰  
崇文廣武應道章德聖明仁孝皇帝伏望陛下對越景靈祇膺  
純嘏特詔執事誕舉彝章以仲冬南至之辰天正上元之節畢  
禋燔於吉土覃渙汗於中區端拱穆清備物典策追九皇而比  
德與三神而交歡快華夷羨望之心成宗社無疆之慶臣等幸  
甚天下幸甚謹奉表陳請以聞臣無任

請加尊號表

楊大年

臣某等言臣等稽合人謀形容帝德願益龐鴻之號仰酬亭育  
之仁罄華夏之一心奉表章而四上仍降明詔未賜允俞遐邇  
之情殞越無措臣某等中謝臣等竊窺舊史載考前王夫名者  
實之實蓋名不可浮於實號者功之表非號何以明其功天地  
以不宰為先猶述高明厚載之大德堯舜以無為而治亦著重  
華放勛之美稱恭惟尊號皇帝陛下祇荷慶基誕敷駿德臨  
下以簡視民如傷舞干羽以示懷柔卑宮室而訓恭儉作事必  
咨於龜策乃至大同考言爰及於芻蕘克章好問體立元之清

淨法夏后之 至孝蒸：所以奉先而尊祖小心翼翼所以君國而子民懿鑠溥將溥熙光大是以由中及外不謀而同咸以為陛下總妙道於無方敷明德於有截思範圍於休美用訢合於神祇蚩蚩之氓諒亦知於帝力巍之號固上契於天心而陛下載執撝謙未俞誠請忽邦家之大典忘祖宗之舊章況今祇事紫壇躬謁清廟四夷助祭知中國之有聖人羣后在庭見明堂之坐天子羽儀文物之震耀梁盛秬鬯之吉蠲三靈交歡諸神受記盼蠻昭答戩穀具膺豈可徽懿之名簡畧未稱矧復雷雨渙汗肆膏於九垓玉帛駿奔侍祠者萬國咸欲謝生於

蒼昊歸美於穆清亦願覩冕旒之當陽觀典策之備物而陛下曲矜小節深抑大猷荷上帝之眷懷乃重違其成命為烝民之司牧反固拒其歡心此臣等所以冒齊斧以上言伏蕭屏而俟報者也是敢不避萬死謹固上尊號曰 崇文廣武應道章德聖明仁孝皇帝伏望俯從眾欲式昭德音干犯宸嚴必期得請臣等無任

請皇帝御正殿表

晁無咎

徒傾葵藿之誠敢期回照未竭潢汙之滴尚或可羞矧變異之已消尤故常之當復中謝恭惟 皇帝陛下法禹罪己繼文小

心惟五事之罔愆於三光而何累爰以朔旦自興重雲不用其  
行史前占於必蝕增修於德人莫覩其或虧和足致祥順宜獲  
助而猶謙尊自牧震兢靡寧雖天所以愛人君常欲制於未亂  
而王所以奉天道故當懼於無災然與其戒居處飲食之安孰  
若擴視聽猷為之善豈惟過也見而更也仰是謂應以實而不  
以文南面宅尊達四聰於虞舜大庖日御綏五福於周成庶或  
聽卑終聞詔旨

請皇帝御正殿表

汪彥章

乾象垂精稍拂清臺之候聖心祇戒久稽路寢之朝既履沴之

銷猶彝儀之未復凡居覆燾孰不怔營恭惟 皇帝陛下光

紹祖宗丕膺歷數萃勤儉於一己濟艱難之百為雖功如堯帝  
之巍：與天同大然心體文王之翼：無日不恭比緣象緯之  
愆昭示國家之戒皆臣子素餐之過何聖神軫念之深乃遷黼  
座之尊退避法宮之正捐厥奉御出於精誠然百辟晨趨宜肅  
乾 位四方秩請願瞻日月之光儻降次以自居則在庭之  
安仰伏望 皇帝陛下時回淵鑒俯徇誠祈稱警蹕以出房垂  
衣裳而當宇向明而治合禮之宜不唯安羣下之情仰以答高  
穹之意

請太皇太后受冊表

曾文昭公

朝廷盛典久抑而未施臣子微誠已殫而莫聽雖自謙冲之有素亦由控告之未亨敢辭冒黷之再三所冀於從之萬一中謝伏以太皇太后陛下紹承天命保佑皇家粵正尊名誕膺顯冊茲蓋有邦之彝制是惟列聖之通規而況太皇太后陛下聰明並於唐虞功德高於任姒納生靈於福壽措社稷於安疆事天治民內盡憂勤之念克已復禮動懷抑畏之心前詔攸同勿言微祿退託不德絕迹外朝事皆貶於故常道已超於古昔頃示責躬之變暫停備物之儀至誠感通靡俟旋日膏澤優足不

盈崇朝雉麥豐登禾稼茂遂家有坻京之望人無溝壑之虞變噸感為歡聲化凶飢為樂歲是宜因民之願享帝之休舍已從人展案錯事而猶逡巡自抑遜避勿居違兆姓之心懇三神之望何以答塞順氣慰安羣情伏望霽發德音勉循舊典備金石之奏御雲龍之庭極治世之彌文成聖王之能事一人有慶永符四海之歡萬壽無疆長享三牲之養臣無任

進文字表

進哲宗徽宗寶訓表

呂伯恭

聖訓淵深傳唐虞之一道信書昭著宣文武之重光載緝嘉謨

仰勤乙覽恭以 哲宗皇帝聰明睿智徽柔懿恭 饗親肅

九筵而宗祀因天因地款八陛以親郊東回川后之流西獻虎  
臣之捷黔黎樂業壽後充庭 徽宗皇帝德冠百王道高五泰  
元圭載錫昭有赫之珍符隆霄告成垂無疆之寶鎮輪奐肇新  
於衢室鴈和親屈於儒宮禮樂交修權綱坐攬會際中興之運  
誕增先烈之光念前聖後聖之傳並垂彝教而大書特書之典  
敢後編摩上軫睿思式頒明命緘金匱石室之秘發蘭室虎觀  
之藏二后受之同歸於治萬物備矣皆聚此書萃圭璧於綠文  
會日新於漆簡奏篇甫始執筆與榮恭惟 皇帝陛下潤色鴻

猷適追成憲稽舊章於天聖酌鉅典於元豐魏：成功用紀焜  
煌之績業：致孝式深紹復之思肆集品章揭為儀矩臣幸司  
鈔槧粗究科條丕顯丕承第仰羣言之首是彛是訓以貽萬世  
之傳臣無任

進建炎紹興詔旨表

呂伯恭

舜歷在躬大一人之聖孝堯言布下輯三紀之睿謨爰勒成書  
上干乙覽中謝恭以 光堯壽聖太上皇帝道參履載功冠古  
今凡詔令之播敷若風雷之鼓舞辨邪誣而刊謗史前列用光  
弛黨禁而錄後昆士氣如洗闢正路以來箴諫塞倖門以嚴憲

章飾革輅以勞軍萬屯思奮肅芝車而藉九扈告豐恤刑必衡  
 至於無刑急士遂收於多士揭於象魏固井井而有條颺之康  
 衢亦洋洋而盈耳登泰和之休運啓授受之公心繼照云初增  
 先是篤肆趨盼於宸指俾具設於攸同肇自建炎之元乃紀紹  
 興之號旁加彙集胥協編摩言如絲而出如綸昭華簡冊大作  
 綱而小作紀布列章程集致治之措摸萃保邦之軌轍于帝其  
 訓與時偕行恭惟 皇帝陛下明兩作離函三為極問龍樓之  
 寢內聞性命之精微細鳳檢之書外考典謨之渾灑建此奏篇  
 之御翕然發政之新臣服在宰司幸窺丕範初何勞於率屬第

有愧於視成臯陶見而知之豈容倫擬子夏得其書矣烏測淵  
 源臣無任

進四明尊堯集表

陳瑩中

臣瓘言臣六月初五日准通判牒准編修政典局牒奉聖旨取  
 臣所著尊堯集臣依稟聖旨不敢違滯緣臣著撰此集未經奏  
 御今具狀申編修典局乞為繳進合於御前開拆者臣竊以猷  
 猷愛君精誠雖至芻蕘議政迂濶難行葵向不習而常傾芹陋  
 敢期於得獻獨因睿斷許貢危衷中謝伏念臣冀土下材犬馬  
 賤質數罪固多於擢髮舍生無意於兼魚初欲糜捐終難緘默

因續前言之緒聊輸垂絕之忠非敢有善、惡、之辭但欲明  
尊、卑、之義此蝼蟻所能知也在縉紳安可藐然八十卷之  
私書奪此與彼十九年之懿績可從而違陛下於繼述之初首  
辨明於茲事微臣持將順之志在流竄而靡忘鋪張痛詆之言  
編類厚誣之語初謂熙寧之輔不媿有商之臣於成湯敢肆厥  
欺疑安石有所弗忍及究觀於對筆始粗見其游辭因思大典  
之久誣益願忘軀而往訴合浦十論申舊疏之餘言四明八門  
撮其要於一序實欲彰大德之盛不敢畏王氏之強寧碎首於  
邦誅忍謾心於國是彼効尤於往轍亦苟逞於陳編難以縷窺

畧舉綱要謂藝祖濫誅無罪謂真宗矯誣上天訛薄裕陵攘奪  
先美以託訓為箱口之術以歸過為自譽之媒但於詆訾之極  
工周顧威靈之如在幾乎罵矣豈不痛哉讀其書寧忍終篇稽  
其文可為流涕代言之筆畫日其徒為儒宗首善之宮肇塑其  
形為坐象禮官無禮而行諂吏書獻佞而請觀光乎仲尼乃王  
雱聖父之贊比諸孟子實雱等輕君之情彼哀周之僻王棄真  
儒之將聖當時不得配太廟之饗後人所以廣上下之祠今比  
安石為欽王之臣則方神考為何代之主又況一人幸學列辟  
班隨至尊拜伏於爐前故臣驕倨而坐視百官氣鬱多士心寒

自有華夏以來無此悖例之禮神考之再相安石始終不過乎九年安石之屏迹金陵棄置不召者十載人字威如於鄧綰萬機獨運於元豐豈可於善述之時忽崇此不遜之像因壞先朝三舍之法遂費今日千倍之財人材之可擢不殊國用之添費徒廣浚吾民之膏血增彼像之精神美成其私怨集於國陸贄設枝顛之喻承業以財盡為憂忠哉古人愛君之誠異乎今日養士之意又況臨川之所學不以春秋為可行謂天子有北面之儀謂君臣有迭賓之禮儀如彼名分若何此乃衰世侮君之非豈是先王訪道法贛川舊學記刊於四紀之前辟水新靡

像成於一婦之手唱如聲名應若響隨使王氏浸至於強梁乃元祐助發其氣焰昔宣仁權同之際謂介甫節行甚高宜贈崇官仍加美謚司馬光書之於簡呂公著行之於朝不以稽弊為心徒發鎮浮之議負安石者重加黜責神考者畧不誰何遂至於枝蔓而難圖豈非由偏助之大過雖當未見誣史而先朝自有聖批恬不奉行養成乖悖蒙蔽裕陵之眾美眩耀鍾山之一書四輔之行謀畫本生於日錄三衛之設規模初定於新經密乎鄧綰之安排草乎京攄之傳授考其音聲則荒唱而損和譬言諸手足則左弱而右強凝為冰山烈若原火愚公



老矣益堅平險之心精衛眇然未捨填波之願沒而後已志不  
可渝望雖隔於戴盆夢不忘於馳關丹誠上格天語遙詢要觀  
尊主之恭緩議奸時之罪淵冰在念梟磔寧逃恭惟 皇帝陛  
下天大普容日明徧照覽熙豐記勳之史倣虞夏採詩之官咨  
輿議於多方證私書之百毀舜纂堯緒收之乎善繼之勤武廣  
文聲斤斤乎至承之美茲所謂一人有慶可以資萬國之歡凡  
有識知孰不將順天地尊卑之已定手足上下之宜分孔志在  
乎春秋漢律嚴於名分戴土者皆知此義尊堯者豈獨臣書燕  
馬以市骨為先騶驥者必將來矣鄭校決防川之壅有舌者其

忍默乎臣命可危衆口難遏伏望 皇帝陛下念臣役志於享  
上憫臣積禍於敢恭以尺朽之廢材貢一得之愚慮言多妄發  
事則有稽宣宗當紹憲之時寧容德裕之奮語武帝以述景為  
事忍視馬遷之短辭父子至情古今一揆不懲謗史之罪則何  
以謝過於宗廟不毀坐像之悖則何以示順於華夷國是方強  
勢難遽改大器至重要在深思庶乎苗莠之分始於冠履之辨  
至美成於剛健大患生乎因循儒宗數人自是一家之說聖王  
獨斷乃為我宋之休夫天心篤愛之甚明人情企思而有待解神  
考在天之怒成聖主奉先之仁克果斷於蔡方人將大覺善光

揚於堯績上可無為於一嘖一笑之中成允文允武之業臣將  
獻駿惠太平之頌豈特進狂簡不裁之書胸臆無奇但盡恭於  
文字筋骸已儘當致命於君親仰酬再造之恩退聽一成之誠  
闔門待盡殞首知歸臣無任

進郊祀慶成詩表

蘓子瞻

親奠璧琮始見天地兼陳祖宗六廟之典參用漢唐三代之文  
夷夏來同人神允答中謝恭惟 皇帝陛下聿追來孝對越在  
天外修神考之文章內服文母之慈儉四方觀禮百辟宅心雪  
止風恬驗神祇之來享雲黃歲美知豐凶之在人臣以執文入

侍帷幄考事而知天意陳詩以達民言雖無足觀亦各其志

進郊祀慶成詩表

蘓子由

莫大之儀成於一日無窮之澤施及四方歡聲所同和氣必應  
伏惟 皇帝陛下奉烈祖之成憲蹈文母之訓言臨御七年恪  
守一德人服孝慈之訓物知仁厚之心神祇降休麥禾荐熟長  
日既至舊章不忘以為再享明堂朱暇圓丘之大祀躬詣皇地  
久稽先帝之遺言惕然不寧述而非作是用修合祭之舊補不  
講之文人情所安神意昭答況復肆眚之令一寬於冥頑已責  
之恩大弛於纍紲施仁於不報之地獲福於無求之中每侍清

光畧聞大旨勉强吟咏形容盛明愧周頌二后之精深之唐賦  
三禮之廣麗圖寫天日自知難成間雜風謠或有可取

進承天節頌表

楊文公

臣某言運偶承平節臨載誕凡叨食於周粟盡願祝於堯年臣  
其中謝臣本自諸生偶于寸祿受兩朝之顧盼無馮唐不遇之  
嗟閱四部之圖書有黃香未見之恥雖研精而強力終迷道以  
迷途而千載休辰萬邦大慶充庭任土慙非玉帛之云巢閭舞  
庭豈在飛走之末是敢罄竭庸鄙撰成大節頌一首獻於闕下  
吉甫作頌愧無清風之稱東方上書或經乙夜之覽

進御筆表

張芸叟

臣等言昨奉勅編修神宗皇帝御筆文字者王者出言而為令  
風動於四方聖人肆筆而成書可傳於後世中謝恭以神宗  
皇帝勵精為治十有九年方在憂勤未遑暇逸事無大小躬自  
指揮其至仁厚惠如風霆雨露固已動潤於堪輿其睿謀格言  
為法度憲章豈止奉行於省寺皇帝陛下善述其志太皇太后  
陛下寶之以慈永惟墜典之畢興而況本朝之故事俾修御筆  
首飾有司惟尚書治總六曹事包九棘紛然案牘隱若丘山或  
收於斷簡之餘或得於殘編之末雲章炳煥手澤溫純觀之不

手疑乎

覺動神讀之可為流涕其間理財用則先崇於節儉讞刑罰則首務於寬平簡拔人才恢通邊圉事可以為法孳莫匪在公順考而行為國何有又何必審周之道乃可迂衡誦堯之言方為稽古臣等成書不敏授簡非工徒殫夙夜之勤何補丹青之治其事目凡一十有八件分上中下三冊謹具表上進

進稽古編表

司馬溫公

臣某言竊以九州四海一日萬機將察知民物之性情蓋布在文武之方冊雖歷年多而舉其大要則用力少而見夫全功恭以皇帝陛下富有春秋弭寧方夏念終始典於學於緝熙單

厥心延登老成親近勸講發論語章句探經義以同歸誦寶訓丁寧祖宗之不易本有如是實惟濫觴惟稽古堯舜之舊章惟信史春秋之成法高山可仰覆轍在前其興亡在知人其成敗在立政或當艱難之運而不能師用賢知或有惻隱之意而無以照知忠邪載籍之編患乎太漫鑒觀之主力不暇遑敢用芟夷畧存體要由三晉開國迄於顯德之末造臣既具之於歷年圖自六合為宋接乎熙寧之始元臣又著之於百官表乃若威烈丁丑而上伏羲書契已來對越神人可用龜鏡悉從論纂皆有依憑總而成書為稽古錄二十卷因仍書局繕寫奏篇茲

冒昧以上陳助聰明之遠覽中謝恭惟 太皇太后陛下定九  
鼎以守天下之公器乘六龍以御天下之正權思齊之功啓佑  
聖學過物之濟燕及宗祧至於法敝於涼而改為官非其人而  
變置御戎之策上下措國之勢安危據舊以鑒新去彼而取此  
陶成萬化東在兩宮七廟垂無疆之休臣微與不朽之業干冒  
宸宸臣無任

進先公文定公文集表

胡明仲

臣某言臣弟太常丞臣寧輪對奏事伏蒙聖慈宣問乃父既解  
釋春秋尚當有他論著其具以進者宸衷尚舊故老形思訓釋

典文夙簡淵深之記遺餘篇翰更蒙清燕之求臣某中謝伏念  
先臣早捐塵事志希任道謀不為身心遠地偏寄陶廬於三徑  
人憂已樂甘顏巷於一瓢吟詠情性而無雕虫篆刻之為交際  
往來叩之竿牘包苴之智中經俶擾多所散亡晚獲奠居僅成  
編秩精忠皓皓每提撥亂之綱莊語諄諄多闡濟時之用進則  
傾輸於君父退猶閑說於公卿壯懷投老而益堅弱齒抱病而  
彌勵自期有補終冀一伸丘木成陰雖鬱春秋之志囊書奏御  
何殊旦暮之逢此蓋伏遇 皇帝陛下曲學裕身崇儒化俗華  
袞豈惟於一字緇衣不間於十年乃因仲息之對揚錫以溫顏

之清問斯文不墜多士流傳臣謹以校定舛訛分成門次爰從傳置進備覽觀函劍有光既徹斗牛之象浦珠無類合供旒冕之須臣無任

進家集表

王豐父

竊以在治之金以自躍而為恥韞匱之玉必待價而乃珍念父書之久藏當盛世而難隱中謝恭惟皇帝陛下英猷天啓睿學日熙制規二帝之摹言合六經之訓握樞六極纂承禹績之嘉肆筆成書丕紹堯章之煥重念先臣某少綠家學早中甲科校天祿之文才稱金馬視淮南之草名在玉堂作新兩漢之文

緣

陷

章潤色三朝之告命世有儒宗之譽史多天獎之辭傳誦一時豈特語言之妙協成大事固多翰墨之功晚受知於裕陵久登庸於宰路當廊廟謨謀之暇猶國家論讓之兼畢罄精忠仰贊格天之業迨膺顧託獨先定策之言暨鳴驩兜之誣阻奏東方之牘方陛下丕揚先烈追念舊勞辨銷骨之詭既昭前事覽凌雲之作恨不同時悉哀平日之遺文益愴他年之榮遇啓金騰之策不及於生前上茂陵之書徒嗟於沒後

滕

進貢表

賀皇帝登極進絹表

李成季

大人繼明神明協相四方來賀玉帛交馳仰罄歡心畢輸邦物  
臣猥叨符守阻覲帝闈敢陳在籩之儀少助充庭之實

賀皇帝登極進銀表

許仲啓

禹若舜初率百官而班瑞漢因周舊膺萬國之貢珍前件物沙  
磔本同範鎔自貴甫慶執中之命敢修享上之儀明用黃離起  
鳳翼龍鱗之願儉存白賁殊裏蹠麟趾之誇

進銀表

趙德莊

雷風鼓舞方丕冒於海隅玉帛會同盡將歸於宰旅前件物名  
標貢品事列獻程受祿於天雖無倫而富有朝宗於海抑善下

以成能

進銀表

負屨而輯五瑞共惟帝臣考圖以別九州敢執壤奠前件物用  
參中幣出自餘財嶽貢川珍雖愧備陳之盛雲行雨施少禔慶  
賜之旆

聖節進銀表

歐陽永叔

重熙纂厯載誕啓辰正守陳儀允昭於嘉會庶邦修貢咸効於  
駿奔前件絹三壤所宜九賦攸出備諸宰旅實織籩以非工竊  
比野人得美芹而是獻

聖節進銀表

曾子固

報

自天生德與世為歸屬當載育之期敢薦無疆之祚前件物輒  
備土毛之末用參篚貢之餘遠守蠻荆莫預造庭之會仰懷象  
魏但祈難老之祥

聖節進絹表

元命在躬方啓龍興之運洪圖集祉爰開胤降之祥前件物敢  
薦官服用參庭貢緣易貢之薄獻祝難老之殊祥

聖節進絹表

石敏若

流虹飛電乾坤薦祉於一人就日望雲玉帛交馳於萬國載驗

輸

品物仰控毋誠前件絹民力之餘邦財所出歡聲震海旅實充  
庭雖堯仁如天罄所產莫酬洪造虎拜稽首欲萬年歸美吾君  
豈臣等之私言乃太平之輿議康衢擊壤歌如山如阜之詩鳴  
佩稱觴望非霧非煙之閣

進瑞木嘉禾表

崔德符

兩儀敷佑諸物効祥於昭至治之隆正顯太平之應中謝臣聞  
古者君臣合德夷夏交歡仁澤滂流和氣充塞而靈芝間出瑞  
木時生固已被之管絃渙乎圖史未有連柯並秀擢百尺之名  
材接畛叢生過九莖之成數泛觀今古實絕是聞此蓋伏遇



皇帝陛下子視羣黎天臨萬國孝追先志功格上靈故得七廟  
儲休百神荐祉曲形庶類荐降珍符矧其一發於千春之鄉一  
產乎感仁之里揭示歷年之永誕彰神化之孚而臣職在承宣  
親觀竒勝追元豐之故事請播於樂歌紀大觀之新書願垂乎  
信史今畫到圖子一面謹隨表上進以聞

進琴表

崔德符

性情之正有待於節文律呂之微必藏於度数非大巧孰能制  
器非至聰無以審音退省僭尤伏深震懼中謝竊以在昔帝王  
之盛德躬御琴瑟之正聲大孝因心聞有思親之操至仁軫慮

蓋

傳諸解慍之歌至於禹服貢嶧陽之材周樂備雲和之奏薦於  
郊廟以格鬼神孟必興禮樂以致太平故能垂衣裳而治天下  
恭惟 皇帝陛下天開上智神授成能作樂教和已形於海縣  
以聲為律一出於睿謀當聖人<sub>人</sub>有作之時實衆伎呈才之日而  
臣素耽雅道自製孤桐雖血指汗顏多慚於妙手而龍池鳳唳  
竊比於良工所有斲到琴一面謹隨表上進

進歲貢綾并藥物表

邵公濟

一人有慶寰宇宙以來王萬國輸忠任士地以充賦禮成貴服  
意比獻芹中謝景運應期洪基繼聖辨神農之草木垂黃帝之

衣裳雖四海頌堯獨先於儉德而九州貢禹自至於儀儀惟此  
南充稱於東蜀蠶叢善俗工勤秦國之綾謝女仙山地產神州  
之藥仰塵府藏謹贄篚箱物無損於絲毫心共傾於葵藿

進馬表

四方來賀共伸善禱之私萬壽稱觴當有備物為祚念此充庭  
之寶無如在廐之良前件馬質妙權竒氣稟神駿暫御省方之  
賀行聞還蹕之音

播芳大全文粹卷二下

聖宋名賢五百家播芳大全文粹卷三上

表

慰表

慰國哀上皇帝表

司馬溫公

是夫<sup>天</sup>降禍仙馭上賓奉計哀惶罔知所措伏以太皇太后作配  
仁祖聽政英朝洪基所以固安景命由其保佑風化形於海內  
德澤結於民心宜永享東朝之尊長膺天下之養而中壽未至  
大期有終哀纏兩宮痛<sup>決</sup>深萬彙恭惟 皇帝陛下孝心罔極號  
慕難拘瞻內寢以如存追慈顏而靡及伏望上為宗廟之重下

元孫民之生少抑聖情俯就中制臣忝列郡不獲奔赴闕庭瞻望宸極

慰國哀上皇帝表

蘇子瞻

慟發六宮悲纏九土奉諱哀殞不知所云大行皇太后德冠三朝化行四海獨決大策指天下於泰山之安退避東朝復明辟為萬世之法奄終壽祿莫曉天心恭惟皇帝陛下仁孝自天哀傷逼禮惟聖達節豈復行魯閔之難以民為心則當法舜禹之大願少寬於追慕庶下答於臣民臣以外郡居住不獲奔赴闕庭

慰國哀上皇帝表

劉忠肅

臣某言伏奉四月一日遺制大行皇帝留位盛時還神太極詔發一旦哀纏萬方伏惟聖情何可啟處大行皇帝德晝上下澤春華夷禮樂文章越四十年治矣政刑風采曠數百歲無之民方父於至仁天宜予以曼壽宮車奉諱臣妾無生伏惟皇帝陛下隆孝儲思巨創抱痛忍革寢門之問勉扶翼室之居唯天惟之賢固為哀而已甚然聖人有訓貴循理之大中伏願斷私於情立公以義對寶命之所屬一羣心而有歸

慰國哀上皇帝表

曾子固

承問震驚失容號慟伏惟太皇太后表儀三世德首於人倫保  
佑兩朝功存於王室遽違孝養未究遐齡無問近疎實均款衷  
伏惟 皇帝陛下痛貫宸極聖情難居臣伏限方守節章不獲  
躬詣闕庭

慰國哀上皇帝表

蘇子由

母儀淪喪率土震驚大行皇太后定策艱難之中力辭政務之  
要功存社稷德及生靈奉諱云初痛心罔極伏惟 皇帝陛下  
方以天下為養遽有終身之憂孝愛兼隆哀慕日遠臣久居謫  
籍適此名還感恩至深奉慰無路

慰國哀上皇帝表

趙德莊

訃傳朔守痛極天倫餘澤深長函靈摧慕中謝孝慈淵聖皇帝  
生知勤儉體備仁明出履多艱蓋天時而非人事有開再造繫  
聖德之在民心愴赤水以忘歸望烏號而無所恭惟 皇帝陛  
下瞻思積久傷怛過宜雖愛自因心遠結孔懷之念而功光傳  
序足歆如在之靈少抑至情以福方夏臣無任

慰國哀上皇后表

劉忠肅

大行皇帝不天斯民遂仙大駕詔遺無外哀入有生伏惟聖心  
何以勝處大行垂令盛德曠古太平大一百歲之基明而有述

享四十年之治安以無誅謂有克之仁必有克之壽豈期一旦  
忽棄萬方人心畢摧天理孰結恭惟 太后殿下拱母儀之重  
扶天德之明義隆三綱位變一極痛尤先於臣妾哀兩著於國  
家願少抑於過情用終全於中制

慰正表

蕙子瞻

嗣歲將興雖有作新之慶舊教既沒共深追遠之思凡在照臨  
舉增懷慕中謝恭惟 皇帝陛下道躋堯禹行比騫參方受圖  
於三朝明發不寐念御箴於雙日孝思奈何幸寬罔極之哀少  
副有生之望臣限以官守不獲躬詣闕庭

慰冬表

毛伯穎

七日來復三務成功方啓景之迎長增聖情之追遠中謝恭惟  
皇帝陛下憂勤嗣服淵默臨朝雲物呈祥概克心之永慕羹  
在望廣舜孝於無疆願抑至懷早摠宿憤臣以職守在遠不獲  
瞻望闕庭

慰掩皇堂表

趙承之

臣某言准進奏院今月某日大行皇帝永泰陵掩皇堂者因山  
成禮復土告期音容莫追號慕永絕中慰恭惟 皇帝陛下痛  
貫宸極聖情難居臣以守職在遠不獲奔詣闕庭臣無任悲慟

隕越屏營之至謹奉陳慰以聞

慰山陵禮畢表

王介甫

須百祀之材已襄矣故設九虞之主方考祔儀伏惟 皇帝陛下德慈欽明道隆勤孝雖送終之禮已備而追遠之念甫深惟順變以抑哀實含生之至願臣限分鎮守阻預班朝

慰山陵禮畢表

宮車云返陵邑既營凡在照臨豈勝摧慕伏惟 太皇太后道作坤育仁出天成永懷愛孝之隆尤積悲恫之感稍舒慈念實慰輿情臣叨備從官限分符守徒有攀號之至痛恨無辨辨護之

微勞

慰祔廟表

七月而葬既克奉於寢園萬世不祧遂崇成於廟室凡若覆燾同盡攀號伏惟 皇帝陛下膺保聖神幾行人孝纏哀罔極率禮無違仙遊既集於宗祊聖念彌勤於翼室仰祈順變俯瞻含生臣符守所櫻班預莫預

慰祔廟表

威靈有集方祔於廟祧感慕無窮外覃於蠻貊伏惟 太后比賢任似協慶塗莘祗協孫謀克襄大事地非蒼梧之遠勢有霸

陵之安唯割至文尚膺遐福臣備官有守奔問無階

慰祔廟表

趙承之

臣某言伏准進奏院報今日某日哲宗謚號皇帝神主祔廟禮畢者易莫以虞既備送終之禮寧神於廟益增如在之儀凡建照臨詎勝感慕臣某恭以哲宗謚號皇帝道存撫御躬致憂勤念甫閔於玉衣遽永藏於宗 伏惟 皇帝陛下孝深罔極痛切因心願少抑於聖懷庶大安於民望臣以守職在遠不獲奔詣闕庭

慰申王薨表

歐陽永叔

伏以申王德文 位崇王爵地重宗藩遽背明時奄然殂謝恭惟 皇帝陛下仁親九族孝治萬方成服發哀恩隆禮備臣忝居侍從<sup>遠</sup>守詔條不獲躬詣闕庭以申奠慰

慰鄂王薨表

宋子京

皇<sup>閣</sup>閔纏哀慶芝掩秀訃傳中夏恻結羣心<sup>中謝</sup> 恭以皇子鄂王生賦敏齊日升令秀弗俟祿教自疑天資已疏采於朱維方竚華於蒼震而霄富生沴星躔隱暉休精上還翼子中奪伏惟皇帝陛下念深祀鬯愴結睿矜徒重軒渠之憐靡逮溫文之就天壽有底悲傷奈何伏望推理於難謀割慈於無益漸平鯁惻



專育粹純况宗稷流光春秋鼎盛已告功於晏、方受報於繩  
絕今此悼懷幸寬至愛臣限分符第方隔禁聯憂懼飛馳臨文  
悵塞

乞聽斷表

皇天降罰慈極上賓孝思痛貫於宸衷號慕思違於哀次敢即  
道揚之命祈從聽斷之權 陛下誠格兩儀行高百代久以天  
下之養娛于太上之尊忽大故之非常實有邦之不幸嫫、在  
疚聖情深罔極之恩懼、如求至性越有餘之戚臣心震懼國  
事浩繁爰指掌故之儀宜反宅憂之位伏望禮存中制喪抑過  
哀服成三日之餘暫回幄殿躬攬萬機之外時奉總筵庶俯慰  
於群情亦仰承於遺誥

乞聽斷表

冒貢封章懇祈臨政皇情惻詔旨弗俞游申迫切之誠冀勤崇  
高之聽竊以天子之孝異乎匹夫聖人之心先於達節雖在諒  
陰之戚亦思付託之艱俯以從權勉而決事 陛下道兼倫制  
性盡愛欽慈庭初爽於豫和鑾輅益加於定省不脫冠帶憂勤  
備營於武王如見羨墻號泣遽終於舜帝宮闈感慟朝野哀摧  
仰知孝慕之無窮伏念卹章之有紀矧此遺留之訓具存聽覽

持文才全粹  
卷三十一  
之期願勅乘輿姑還翼室學音而臨殿中自有於漢儀作命以  
言者庶承於商令茲為順變望賜矜從

乞聽斷表

喪無二事禮有從權瀝血書辭既竭愚誠之翼翼倭躬拜命未  
回聖孝之皇皇上念邦家之閔憂決慮軍國之重大敢陳三瀆  
庶望兩全仰惟慈皇新棄至養寢門近止思問膳以無因前殿  
歸然欲奉卮其何及此淵衷不堪於哀痛而庶政奚暇於統臨  
然而道貴遠中孝先繼志若稽前代參攷本朝行宮中三年之  
喪自應古誼決天下萬微之務皆徇時宜 陛下德並重華義

殊訪落朝於未央者二十六載亘古所無慶於德壽者八十一  
秋在今何憾願體付託得人之訓深哉悲憂過制之情趣素愜  
以還宮御清廟而聽事銜報之所大於斯

乞聽斷表

伏讀訓辭未親政事再命三命而俯倭何敢黷煩一日二日之  
幾微豈容但已臣聞自周而上何必高宗之亮陰由漢以來遂  
有文帝之制度雖云易月之令不廢終身之憂徒以門內之思  
特為天下而屈陛下受天至性執古通喪率禮無違慕親罔極  
齋蔬之文饌粥之食皆與下同顏色之戚哭泣之哀獨由中發

茲誠創鉅而痛甚然念業大而事叢苟徇三年之不言曷俾百  
官之承式載惟歷世之主率用權時之宜非不知行道之人皆  
弗忠也忍蓋亦本先王之制俯而就之陛下酌祖宗之常行為社  
稷之大計駕還廣內豈必日見於群臣國有煩機姑願躬裁於  
急務別遵彝典請聽治朝

乞聽斷表

孝大憂深情難抑奪誠微詞淺意未宣通呼天號鳴無地貢越  
本朝卹典具垂列聖之規太上仙遊預播大行之旨今啟請悉  
出尊承惟是北宮遠於南內方仰倚廬之慕敢祈行殿之還第

緣機務曠弛之多旦復宿衛暴露之久今則叢塗已畢練祭繼  
陳儻為大政而暫曰則於孝治而無闕伏望痛裁哀毀深念艱  
難體我皇兄親授神器尚虞國事妨於五日一朝之中豈欲邦  
彝廢於千秋萬歲之後惟勤愛日之治實慰在天之靈矢詞已  
窮得請廼止

乞御正殿表

永言孝思勉即西廂之決率循大辨當臨南面之期敢冒威尊  
敬陳悃悞 陛下以堯為父盡舜事親久依黃屋之悲忽愴白  
雲之儼儼然經杖雖更練祭而弗除潛涕洟每念大恩之難

報聞從素慙廷對輔臣急先之務則必聞極辨之儀所未暇在  
庭百執稽首一詞謂天固不言而四時行然辰必居所而象星  
拱直臨端序庶慰群情伏望順變節哀體元君正與其具禮閨  
門之內不忠斷思孰若親事法宮之中允為繼志願垂俞旨早  
復彛章

乞御正殿表

國遭變禮已用易月之期朝有常儀未舉答陽之義懇祈莫遂  
震惕靡遑 上古之道書備著成周之恤典延之翼室具嚴臣  
子之宅憂出在應門登進公侯而聽命茲為萬世之法則蓋得

一時之經權 陛下執古卸今因親教孝復先王之制異武帝  
之空言執君子之喪過曾參之實行自經暮練合親昕朝方且  
皇口於衰經之中何暇移七於岩廊之上迨更祥禫 已盡情  
文哀已極於其餘過將猶於不及願稽中德曲徇下情負宸而  
位明堂時俯臨於百辟釋冕而反喪服內自致于三年率由舊  
章用答光訓

乞御正殿表

喪期有數當御外朝孝慕無窮尚堅中詔惟主明以理可奪蓋  
天高其聽甚卑敢暨百僚躬冒再三之瀆冀從九陛日曠咫尺

之威竊惟古禮之難行蓋以後王之多事若五月居廬而戒命  
未有或三祀亮陰而恭默不言則必上廢朝廷之儀何由 臨  
軍國之務是以歷代皆從權宜迨至我朝始參故實外循易月  
之令內盡通喪之情然而成服以還亦勉親於庶政既練之後  
乃延見於群臣 陛下欲重報於先皇悉增隆於舊制自我作  
古蓋將垂法於百王示民有終豈特加人之一等願尊彝典少  
抑至懷亟發綸言尊臨黼座兩天為極達孝全於武王四方來  
觀同心戴於舜帝

辭免表 儲君

辭陞儲表代

晏元獻

臣某言伏覩內降制書以臣為皇太子者初聞中旨但集於悚  
兢退省孱資不遑於寧處敢陳丹赤上瀆威顏臣某 中謝臣聞  
易象垂文戒立身之非據聖人數化貴育物之得宜小言而大  
祿者猶謂冒居德薄而位尊者孰先公議而况元良之建盛典  
素隆震豫離明載前聞於八象星暉海潤昭茂實於兩儀必英  
譽之有聞則具瞻而期協伏念臣性惟庸昧識謝周通毓質天  
庭幸依於累善蒙榮霄極豈著於盛猷恭惟 尊號白帝陛下  
受命紫清集符溫洛協三靈之丕佑臻萬國之同和乃眷本支

荐加寵秩而自啟封淮甸昨土江吳列尹正之崇資陟盤維之峻板級兩宮視膳日奉慈嚴六學傳經時親典誥喜因心而盡禮樂覃思以知新漸冀組修用符訓導敢謂宸襟過聽綸詔忽頒將闢儲闈俾膺睿渥側聆布告增惕神魂覲眉日以何施蹈水淵而靡措蓋念邦家名器詎可以忝塵君父生成諒垂於保庇倘徽恩之驟及諒頑鄙以曷勝矧在幼冲方期勗厲將何以雍容鶴禁表貳桂宮翊贊嘉謨遙卜壽街之續詳求多士旁延望苑之賓虔仰昊穹載陳悃愾伏望陛下軫彌高之聖念推善貸之深仁察以妙齡蓋非飾讓寢茲茂式協乃慎徽則赫赫昌朝

咸契大中之化區區積質俯安若厲之誠冒昧自陳期於得請  
辭升儲表代

臣某言臣自沐徽章再陳封奏至誠雖極宸聽未迴仰批諭之猥臨積愆而匪據臣其中謝伏以量力度德立身之格言授才任能有國之通制而况明離著象蒼震垂文聿崇守器之規仰協重輪之詠必資盛德用贊大猷伏念臣植性迂疎秉心蒙滯萬期嘉會託層漢之靈源千載昌辰何慶雲之洪厓伏惟尊號皇帝陛下纂承真系茂闡丕圖泥金薦禮於蒼旻錫壤推仁於宗緒上公進秩半楚疏封俾陟上庠欽聞雅誥眷言吳會

荐啟藩維漢節誕頌夏橫璜昭錫奉日嚴於温清慕特習於縑緗  
 居業寡聞冒榮為愧遽荷紫清之命越升儲兩之崇風旨乍聆  
 神魂增駭疊陳丹款願寢洪私天監彌高綸言益益厚冰淵自處  
 彌劇於九回肺腑虔祈難逃於三責伏望 陛下廣至仁之茂  
 育推妙道之善成俯降堯職旁回禹律特收渙汗爰示於撫臨  
 冀息踰涯庶安於庸陋由衷所極得請為期

宰相

辭免左丞相進封許國公表

周丞相

登備鼎司日久當策免普持魁枋倏奏庭揚顯天神伸不稱之詞伏

地拜弗俞之詔鴻私溥博孤跡凌兢中謝臣聞受才有共織  
 賦質有良竊扶明堂者資梁棟安用條枚薦清廟者須鼎彝寧  
 參瓦礫力不勝任人將汝瑕伏念臣猥闡材微斗筭器小際會  
 光華之旦追陪寅亮之睽罪功宜詔賞誅漫無可否賢翻當明  
 默點陟殊情柳楊觀已事之如期豈後圖之足責敢謂群賢之進遽  
 叨上宰之除有次輔雖不備官理焉何損無成勞亦令賜位臣  
 也胡顏為國計以牢辭非身謀之獨審伏望 皇帝陛下謹於  
 圖任監朽乃知雖外求嚴穴之英內選朝廷之雋俾居三事庸長  
 百察遜於受折折伯夷敢忘稽首首若閔天號號叔尚助迪威從欲

欲之仁鞠躬以俟

辭免左丞相進對許國公表

周丞相

銀臺入奏力辭端揆之崇奎鷲批章特垂玉人之重雖負承命  
 抑懼瘵官敬陳確至之言疊冒穹隆之聽臣中謝臣聞位高者  
 智愚難掩任久者賞罰易行九載之績不成當從鯨殛三考之  
 明弗陟孰底舜功如臣無堪被遇最蚤越自嚴徐之列進陪夔  
 契之遊碌；政途殆彌數歲容；宰路仍陟再朞論其時則已  
 多責其效則何有未能引去姑俟汰歸今乃位克元輔之久虛  
 秩序文階之一品既殊試可更異故幽况政官不許復居而新

渥又為非據進退交違於小誤勸懲有累於大公伏望 皇帝  
 陛下旁燭忱恂敷求俊傑貸妨賢之往咎審 聖之良圖謂如  
 髮之引千鈞其誰云可因循嚮而起三命亟報日俞忱辭已竭  
 於肺肝察允尚收於綸綍

辭免丞相表代

張文若

不俟駕行既已驅馳而至疇若予采復膺考慎之求在明王圖  
 舊之意則深於愚臣陳力之義則過中謝伏以二聖求治歷年  
 於慈忠厚之澤足以傳之無窮仁孝之誠固已格於上帝守此  
 成憲底於太平加以左右輔弼之臣蓋極老成俊乂之選向圖



次輔之虛位乃復召臣於守藩茲蓋伏遇 皇帝陛下廣度兼  
收自明洞照察其疲駑之不逮出於惻愍之無他意其先之教  
忠或恐老而更事責以來効用之不疑上副眷求敢愛竭盡而  
臣伏自深念固非辭<sup>飾</sup>辭形骸已衰心力隨耗雖輔相重任不欲  
捨其舊而新圖然衰疾交攻豈期老將至而耄及雖至仁之曲  
被顧公議之謂何天下豈無巖穴待招之賢朝廷委質之彥與  
之圖國足以格天而臣已試之効可知將老之誠彌切不就能  
列辭敢避於再三因是得人功猶期於萬一

辭免右丞相表

政地克員未即國公之譴所庭出命忽陞次轉之聯念甫控於  
危哀莫遽回於淵聽寵非素望義合終辭臣中謝臣聞人主之  
職論相以為先邦家之基得賢而後立上稽於帝下逮有唐或  
都俞吁咈以誠謨或輔贊彌縫而藏用皆極天下之選用圖治  
績之熙爰及皇家益難柄任取諸人望不猶愈於商周播在聲  
詩又荷殊於夔契中興而後詎公相望間闕成紀夏之功左右  
大格天之烈書於簡冊光若日星仰惟貢實之朝尤謹疇咨之  
始未聞僥冒有若疎愚小有材而登廟堂奚堪任重遠無慮而  
籌帷幄烏可責成伏望 皇帝陛下大廓皇明深為圖計奮庸

而宅百揆宜先四岳之詢寅亮而一人當選二公之選不容輕授庶協公言

辭免右丞相表

留丞相

制麻初下既陳控免之章詔綍屢頒未拜俞允之命敢再三而懇請冀萬一之聽從臣中謝竊惟宰司左右之聯均任天下安危之寄官非必備才必求全如傳說作相於高宗獨員而自足召公為保於周后並用以相維要在得人俱能底績有如臣粗知未學恪守愚忠識不足以達夫事機謀不足以斷夫國論在於進退何有重輕矧惟當軸之元臣早負濟時之遠畧克當倚

任豈假踈庸伏望 皇帝陛下念擇相之維艱於掄材而加選元首喜而股肱起願持不息之誠應龍升而雲霧興當得非常之佐共成大業永底丕平毋懷反汗之小嫌庶定保邦之大計

辭免左僕射表

劉莘老

揆席久虛治庭敦號猥及非才之錄大驚群聽之公敢冒至恩輒忘素守臣中謝竊論相雖人主之職得賢乃太平之基必先全德之老成或待遠方之特起伏念臣本由踈賤叨真顯嚴備數而臣或進帝王之說與聞大政顧慙禮樂之文克作章而既成漢分符以方重謂且簡斥更辱延登夫褒德者天下之大公

而竭節者人臣之常分念蚤塵於機要已久席於高華華美事屢  
遷乃能畢力威望匪重將取侮於四夷智畧更疏無可言之十  
事苟從昧進曷慰具瞻倘選於衆而求之多出於臣之右者伏  
望慎名與器以尊朝廷詔德選勞以勸臣下俛徇富平之懇曲成  
考父之銘收還過恩庶允清議

辭免在僕射表

敷告於庭疇咨以位惕然驚汗決於愧顏中謝竊以師長百司  
位隆於端揆大摧輿天政地重於西臺進德則朝廷尊當賢則臣  
下服而臣學不足以斷國論才不足以達事經辜奉恩私 稽

歲月處非其據者已久受過其量而莫勝方興引分之言並違  
妨賢之責敢期函垢更使代工倘懷苟得之圖妄作自賢之行  
公罷不嫌於多取豈曰知難高位必致於疾顛安能報圖上則  
詔盛朝之累下則矚衆正之賢伏望別擇臯夔改圖丙魏登寘  
宰路使秉國成大明庶物之情不奪匹夫之志還收渙渥以息  
煩言

辭免右僕射表

劉莘老

微志未伸誠言難止倘獲安於名分其敢違於典刑中謝恭以  
國家之輔相雖其人臣子之進退必以道蓋治忽之所由繫而

榮辱之於是生臣遭會四朝周旋三禁感槩忠義常見古人白  
璧不為之非風采功名愧乏大臣巖石具瞻之望畧無報効久  
俟譴訶詎聞猶告之音擢寘宰司之重力不勝任實憂伐斲之  
必傷偃而升高將有指頂而見笑下招覆鉢之辱上玷知人之  
明况有廟堂之耆明而多中外之俊又改疇公望巧協師言伏  
望昭鑒至誠保全晚節使羸盈者不至於溢植弱者亦足以支  
特反誤知庶無虛授

辭免僕射表

王介甫

賞典越喻訓辭稠疊渙汗所被足為至榮朽材難勝更以多懼

輒輸危懼敢冒威尊中謝竊以佐相位崇東臺地要雖置員而  
久曠蓋受任之常難臣晚值聖時久妨賢路奉揚成命殫力困  
於負山數釋微言盡知窮於測海方譴訶之為畏豈寵獎之敢  
圖忽此兼叨無前比深惟淺薄仰累休明伏望聖慈俯照愚  
款斷從公論追寢誤恩豈惟私義之獲安寔亦物情之歸允

辭免僕射表

恩言狎至鄙守難移敢冒德威更陳私義中謝竊以高秩厚禮  
以酬莫盛之勲勞綿力薄材豈稱非常之爵寵人之所畏物有  
固然臣誤見知而涉世象論毀材受任而居官無以自招

惟屈首受書幾至發生傷性速承聖問乃知北海之難窮比釋  
微言更悟南箕之無寔疏榮特異揣分非宜苟叨味以自安懼  
譴尤之隨至伏望 皇帝陛下俯矜危拙曲賜全安不以反汗  
之小嫌為能累國則是捐軀之大節實任報君

參政

辭免參知政事表

官高祿厚誰不願居才薄力綿自知弗稱輒布由衷之悃荐干  
難犯之威臣中謝伏念臣起於寒鄉適際興運樸忠自信介立  
無聞靜惟一結之叨踰悉出九重之簡記方從師閭復上禁途

越月通班未効祿勞之補自天出綽遽容圖論之陪矧當政刑  
閒暇之明尤重股肱忠力之寄豈同它職或計 居既據蒞以  
知危敢循墻而力避伏望 皇帝陛下圖內外之無患合后臣  
之克艱傳選真才以當隆委收誤蒙之雜渥亟賜俞音俾無似  
之孤蹤復安舊著陳辭既竭得請尤榮

辭免參知政事表

歐陽永叔

職參論道宜極選於一時授匪其人實駭聞於衆聽思榮所被  
跼踖難安中謝伏念臣本乏材能徒緣幸會列於侍從白首無  
間置在樞機素飡已甚雖聖主之恩天地曲示含容而朝廷之

事毫釐動閔利害豈止曠宮之誚每懷悞國之憂矧惟政事之

臣實代天工之任俾之贊貳宜擇材賢伏望 皇帝陛下收誤

獎之恩廣僉諧之訪憫疲篤之已試備見無庸求後俊之在庭

擢之不次俾獲安於舊職冀免速於罪辜報効之誠糜殞後已

辭免叅知政事表

王介甫

才薄望輕恩隆責重敢緣聰聽冒進忱辭中謝竊以建用宗工

與圖大政以人賢否為世盛衰矧休運之有開須偉材而為輔

豈容虛受以誤明揚如臣者承學未優知方尤晚光朝備位每

懷竊食之慙故里服喪重因採菜薪之疾陛下紹膺皇統俯記孤

忠付之方面之權還之禁林之地固已人言之可畏豈云國論

之可知敢被寵臨滋懷愧恐伏望陛下考慎所與燭知不能許

還謬恩以允公議庶少安於鄙分無或累於聖時

樞密

辭免樞密表

葛謨白

擢預斗樞揆瑣材而弗稱冒干天聽冀成渙之復回仰勤溫詔

之頒尚覺俞音之闕敢殫愚悃荐瀆聰聞臣中謝伏念臣世受

國恩身逢聖旦擢第於隆興之初載入朝於淳熙之二年編塵

清切之班盡出生成之造禁塗入告尚無以効千慮一得之愚

省命所期豈足以贊三軍五兵之運當聖神之在御值邊境之  
無虞尤資克壯之猷以歷未形之患况宰執之並命聳兵民之  
具瞻豈繁妄庸亦叨揀拔念公言之可畏顧私義之未安班著  
之峻則有非據之憂家諱之嫌則有冒容之媿進退維谷偃倭  
循墻倘貪得而弗思殆疾顛之是懼伏望 皇帝陛下仁天洪  
覆智日溥臨謂股肱開國體之崇豈宜輕授察斗筭非器量之  
大必至易盈追還已漫之恩益盡至公之選臣無任

辭免樞密表

汪彥章

入叅廟筭方俟黜幽進長樞庭更四圖仰荷褒揚之遇實深盈

滿之憂敢布腹心仰干旒冕中謝竊以聖主之用人也必量其  
材之所至忠臣之事上也先皮其力之所宜故為之上者靡傷  
知人之明為之下者得逃曠職累之一失此道兩乖厥宜如臣  
者初乏經綸特緣遭遇二紀服周行之末一朝居多士之先昨  
叨近弼之除已過平生之望豈有方更於晦朔居然躡次於鈞  
衡雖至無知敢忘自揆伏望 皇帝陛下以隆 寬物以獨斷  
馭臣知愚誠蓋出於由衷於成承不嫌於及汗別求賢佐共圖  
宏濟之功毋使孤蹤益重疾顛之禍

辭免樞副表

歐陽永

成命始行驟驚於衆聽撫心增懼莫以自容中謝竊以樞要之司朝廷慎選出納惟允實贊於萬機禮遇均隆號稱於二府顧任人之得失常繫體之重輕苟非其材所損不一伏念臣器能薄任風力不強少喜文辭殆浮華而少實晚勤學古終迂濶以自愚而自遭逢盛明擢在侍從間嘗論天下之事言出而衆怨已歸思欲報主人之知智短而萬分無補徒措危躬於禍咎每煩聖造之保全既不適於時宜惟可置之閑處故自叨還禁署連此七年屢乞方州幾於十請瀝愚誠之懇至被明詔之丁寧雖大度并包猥荷優容之賜而群臣在列敢懷希<sub>進</sub>追之心豈

謂伏遇 皇帝陛下急於求人思以濟治因柄臣之並選憐舊物以不遺然而致遠之難力不勝者必速其覆量材不可能自知者猶得為明敢冀睿慈矜其迫切俾回渙渥更選雋良如此則器不假人各識賢愚之分物皆知報何勝犬馬之心



聖宋名賢五百家播芳大全文粹卷三中

辭免表

郡王 司空 使相 昭文相公 大資

辭免進封郡王表代

曾子固

寵踰於德愧甚於榮輒露危誠仰干睿聽中謝竊以褰衣備物

禮均上宰之崇土宇分封位列真王之貴非智能足以謀國勞

烈足以及人屬在休明詎容玷冒若臣者侗然固陋敢爾禱蒙

雖甫選勝衣習為容於趨拜而方思就傳賴齒學之漸磨庶幾

識古今之通方知國家之大體施於為已可以持循必也當官

既無遺曠已功分於將錢復誤假於公主錢虛冒洪私未申薄効  
 敢圖獎渥荐及謏微視儀敷於三台趨爵名於五等既加真食  
 仍益爰田固非錄善而量能又異校勞而數最將安稱此自願  
 欽然而况 皇帝陛下處父子之間常先義訓在君臣之際每  
 詢公言伏望察臣精懇之曲衷不顧小嫌之反汗許還新命俯  
 遂微情使臣得奉定省於晨昏稍安幼志報生成於天地更待  
 壯年

辭免司空表

王介甫

隆施所逮懇辭弗俞輒冒 大威更輸微款 中謝 臣事勞無紀操

行不修居竊萬鍾初未知於辭富坐彌九載方有俟於黜幽豈  
 圖邦命之新尚眷求人之舊寵靈尊被危厲增加位高疾顛力  
 少任重實前修之切戒敢小醜之冒膺仰冀睿明願辭衰朽改  
 焉非服免貽官謗之憂宥以困功使獲里居

辭免使相表

前人

恩典有加事勞弗稱陳力况難於邑勉輸情終冀於矜哀 中謝  
 伏念臣晚出窮鄉首陪輿運恕心量已雖知容膝之易安營職  
 趨時更似絕筋而稱力既及眊衷而成疾重遭憂譽以傷生始  
 欲補完唯當休惕若任州藩之寄仍兼將相之崇是為擇地以

自營非復顧天之素志伏望追還渙號俯遂遇忠許守本官退

辭免使相表

王介甫

以病自陳庶全於私分蒙恩幸許尚竊於隆名淪肌雖荷於優  
容省已終難於叨昧輒披情素上冒聰聞中謝伏念臣久玷近  
司迄無明効終蒙解免實賴保全自顧衰骸已難勝施<sub>於</sub>勞動數  
違明詔實仰異於矜憐號<sub>難</sub>將相之崇身就閭里之逸悞恩若  
此前載所無非惟私義之無安固亦公論之弗與伏望 皇帝

陛下深垂簡照俯<sub>徇</sub><sub>特</sub>狗廈祈時回渙號之已孚許以本官而克使  
如此則上足以成陛下徇名之政下足以免愚臣冒寵之慚

辭免使相表

愚誠屢黷方負憂兢聖聽未移更加獎勵故仰聞於國體敢終  
冒於天威<sub>中</sub>謝伏念臣頃<sub>特</sub>汗近司久虛大受晚羅疾疢自當辭  
祿而里居尚<sub>特</sub>眷憐故敢祈恩而<sub>家</sub>食將相之為重寄朝野之  
所具瞻若免於事任之勞而尸此名器之寵在昔之茂勲明德  
尚莫敢居如臣之綿力薄材豈宜所據伏望階<sub>下</sub>不俯矜危懇  
寢誤恩豈惟私義之所安是固物情之衆允

辭免昭文相公表

為君所艱尤謹厥與命相不善將壞于成矧當責實之時敢替知難之義中謝臣知不足以及遠學不足以窮深比誤國恩嘗尸宰事初無薄效稱萬一之褒揚止有多言煩再三之辨釋終逃譴負實賴保全恭惟 皇帝陛下若古之堯以欽明御今以禹之勤儉矜修積美山無一筭之虧困任致隆臺有九層之累通小大祇若遐遇允懷奮而不舊雖或許其國事灌以既訖豈不昧於知時况惟疲曳之餘過重休明之累且用人而過矣固不免於敗材苟改命而當焉亦何嫌於反汗敢期聖哲俯亮愚忠

辭免資政殿大學士表

錢叅政

自天有命無地措躬伏念臣指濫廁班行驟膺顯擢躋登樞筦參預政機感超異之遭逢思靡稍而稱塞歲時更應天日照臨因造都之敷陳露乞骸之懇請仰戴慈憐之厚曲彰覆護之深昭示隆私寵頌異敷力辭得獲微分少安席未煖於里閭詔促臨於藩屏南徐効力初靡著於顯榮北闕疏思已復加於美職深惟忝竊倍劇凌兢敢圖簡記之隆更付保釐之託守籥再經於春首撫封常勵於夙心罄碑朝暮之微勞肅答乾坤之大造十連無事實自朝謨庶政罔功方憂吏責退欲申於前牘進忽奉

於除書隆名升規殿之新寵命渙帝綸之舊恩誠厚矣臣實懼  
焉伏望 皇帝陛下廓淵聽以下臨鑒愚衷之上達使遂終辭  
之志不嫌申命之回得請為期俯躬以俟

辭免資政殿大學士表

恭馳牘奏已罄臣衷敬拜璽封未蒙帝可再陳悃悞重犯威尊  
竊以敬遠字以崇儒自本朝之建立褒異庸而賜職乃今日之  
舉行與既不輕得而為貴因殿額榜題之差次序臣隣班行之  
後先既列綴以冒居復階升而序進疾而恐躡退則能安伏念  
臣濃受恩知恨無報報効重膺委寄思有服勞雖食息之靡遑勤

而無補况精神之曷竭力則難勝眷東西府境之連萃南北軍  
屯之衆兵民雜處農賈萃區貴慈惠以拊循要威名而彈壓藉  
九重之覆若幸數載以安然毫釐莫積於事功方寸但思於田  
里寂爾二邦之績穹然兩殿之華循名既高責實甚淺必難虛  
授是敢固辭伏望 皇帝陛下照懇避之忱誠賜收還之詔旨  
施於有政既資助之無聞必也正名恐祇承而弗副竊煩冒昧  
戰越驚惶

門下侍郎 左右丞 起居舍人 吏侍 史官

辭免門下侍郎表

劉莘老

發政西臺無裨於聖治陞班東省忽霈於恩書揣分未安控詞  
自列中謝惟先王制爵祿之等以待賢能而君子謹進退之方  
必循理義臣起於寒晚躡至顯嚴獨持特聖明特達之知不緣黨  
友更相之助虛虛塵近輔更涉累年愚而直者人情之易睽公而  
固者衆怒之所聚每幸曲蒙於善貧保此孤危豈敢更冒於誤  
恩遷其位叙上乖朝廷陟明黜幽之典下至臣子見得忘義之  
譏伏望太皇太后陛下謹名器以申大公明勸懲以厲有辟收  
還成命改授有勞臣無任

辭免門下侍郎表

前人

勞能不聞名品益進懼必投於顛仆敢冒貢於誠情中謝臣進  
德不彊造道甚近逡巡尺寸之守遭會聖神之知少負丘山莫  
報之恩初無絲毫可紀之善粵叅大政及今驟至於四遷升寘  
東臺所歷遂周於三省益高股肱之任况備喉舌之司爵視上  
公邑增真食倘罔功而濫處實累國以起羞伏望 皇帝陛下  
如日燭幽體天成物察臣表裏之既盡矜臣器量之已盈時收  
誤恩以允清議

辭免門下侍郎表

蘇子由

久塵右轄無補於時進 東臺有慙在列言莫宣於誠意聽未

敢於高明中謝伏念臣頃以虛名誤蒙收錄施塵近侍非有勞能咀嚙文詞本腐儒之事業殫治邪枉紀衆口之憎嫌及夫進貳文昌日侍軒闈隨衆出入得入天何補於萬幾奉行文書勉強自慙於暮歲此則聖主之所親見孤臣之所自知豈待人言難逃天鑒敢謂超升累級復進崇階雜用負乘行自招於冠盜未嘗將符獵食何取於鷄貍伏望太皇太后陛下因功以舉賢選衆以拔士采其譽者必考其實聽其言者皆原其心如臣空踈自難隱伏特追成命以慰公言使聖朝無失於用人則臣愚若蒙於厚德

辭免門下侍郎表

喉吻之任密侍於禁中綸綍之行風傳於海內苟用人之失當於累上以非輕中謝伏念臣西南陋儒墳使撲橫學非有過人之大節惟子守事君之小心無其實不敢居其名非其任不敢竊其祿任歷三世年逾半生奉以周固施未始失墜今者乃欲以尋尺之材居棟梁之任以斗升之量受鍾鼎之藏難欲欺君且非本志矧復躡等超累級之上遷秩非舊比之常靖言以思未見其可伏望皇帝陛下因任庶物照臨百官長短各盡其宜大小無失所養必其力有餘而後用則有任適久而常新柳柳將多士

皆賴以安豈惟微臣獨被其賜愚衷以竭天聰尚回

辭免尚書左丞表

劉莘老

竊以國之爵祿以待賢能士之進退必循名義有或異此何以

示民中謝伏念臣綿力薄材至愚極陋此蒙誤罷擢權備近司之

宏遠之規模空銷疲於精銳未嘗小補方俟大訶敢期思憐更

進位序考其歲月則既非久次課其職業則又無顯勞儻輒冒居

實干清議伏望 皇帝陛下慎名器以厲在位明非是以正其

功深察誠言許伸愚分無難反及汗之命庶極臨淵之憂

辭免尚書右丞表

蘇子由

臺轄之重國論所存顧惟尺寸之材何與棟梁之選比陳誠懇

尚閔俞音中謝伏念臣家世寒儒僅守父兄之僕學文史末技

不通邦國之太大猷頃自元祐之初偶緣之使召自南遷之後遽

責使言旋由左史而踐掖垣復從右戶以居翰苑迨茲執法曹

未數年言何補於聖明志已殫於憂責以一日遭逢之幸擅諸

臣積累之榮方懷滿溢之虞願求閑散之便豈意思私之橫被

復叨丞轄之近班自昔政事之臣非處書生之地既犯不韙其

何敢安伏望 皇帝陛下以德愛人量材付位深察斗筭之陋

難堪鐘鼎之藏迫還誤恩選建明德俾賢愚各安其所則中外



無復間言其於微臣受賜多矣

辭免起居舍人表

張文潛

言動之職最近清光儒學之臣以為榮選臣孤平晚進駕散薄材擢自選人寘之太學復天祿石渠之職首預選掄紬金匱玉版之書兩領著作功能何有屏退所甘加以冒昧史官頗縻歲月論次故事未就簡編何有賢勞遽叨獎擢沒階華近入侍禁嚴內循弱植之易搖實懼多言之可畏敢傾誠懇祈止誤恩免進顛濟更累樂育

辭免吏部侍郎表

邵公濟

聞命震驚罔知所措中謝竊以從橐清職賴獻納之忠規銜劇曹資疏通之藻鑑欲當此選宜得其人如臣涉學非優賦資甚蠢誤叨睿擢進陟臺端雖言聽諫從每蒙於睿獎而力綿責重實懼於顛濟自知無補於涓埃方欲退忻於閑散豈祈庸陋忽玷遷除仰丐皇明追還渙汗別東求於時彥用少慰於輿情

辭免史官表

秦少游

史屬之除聖朝所慎若非承父兄之教詔世守其官則必積師友之淵源材克厥職臣於二者實無一堪聞命若驚撫躬增惧重念臣少而愚賤長更屯奇積累歲時尚慮人情之未與趨踰

近分豈為物議之所容以蕞爾不勝任之材處灼然非所居之地必招官謗上累恩私况儒館之中資任高於臣者不少班行於內學術過於臣者甚多與非容菲薄以濫居不若擇英豪而改授伏望聖慈<sup>追</sup>寢新命

三司使 節度使 都督 帥守

辭免權三司使表

蔡君謨

地親任重寵數殊優資薄才微公議非允中謝伏念臣向由樞職出治泉山奉高年之慈親還養於舊里昨承詔旨還京師屢降德音不容讓免驅馳百舍之遠趨伏九閭之嚴曾未達於近

畿復遷處於大計天下通流之術非小智可以營為禁中命令之詞非空言可以潤飾加以支離之弊久辭浩劇之權今所領者益繁顧於力而不逮苟失量度是謂暗愚伏望 尊號皇帝陛下特收渙汗之恩更擇長材而用俾違要重庶得安全有祿庇身固能自足懷忠効國誓竭素心

辭免節度使表

郭師禹

抗章避寵莫回擁節之華賜札疏榮益重循墻之愧俞音尚闕揣已奚堪敬伸螻蟻之誠湑瀆高明之聽臣中謝竊以爵為勸賞蓋在厲世之方器以褒嘉尤謹假人之戒矧渙號啟廷之制

而齋擅授鉞之儀非有旂常可紀之功曷稱明時甚盛之選伏  
念臣受材謏薄賦性顛蒙猥忝舊媼濫陞朝著忝扈帶高華之  
列綴甘泉法從之聯徒以樸忠每蒙睿簡昕朝恪奉曾何益於  
堦埃琳館均閑采切慚於尸素深懷滿盈之咎粗堅止足之私  
敢謂么微誤膺顯擢晋公社主映之異數昭龍光眷獎之非常  
忝冒難勝顛濟是懼伏望 皇帝陛下離明委照乾造無私俯  
垂從欲之仁收還成渙改昇元勲之彥庶穆輿言

辭免節度使表

汪彥章

引疾辭榮方幸機衡之解疏恩越等遽蒙旋節之頒慙如淵谷

之臨莫測雲天之施輒布由衷之懇仰干方命之誅中謝伏念  
臣承學缺如起家寒甚早被聖神之遇遂忝丞弼之司黽勉十  
年周旋二省妨賢最久自知罪戾之盈容跡每安實賴恩憐之  
至比失衛生之理益懷誤國之憂力丐投閑僅蒙賜可所願退  
安于散秩敢圖併授於隆名惟齋鉞臨師乃人主待有功之士  
而詞庭置使亦朝廷優元老之臣願平時猶懼於素飧豈病質  
乃堪於徽數伏望 皇帝陛下不忘舊物深諒微忠量材能小  
大之宜盡其覆始終之意特回渙號靡速煩言未泯餘生尚可  
筋骸之強誓堅晚節仰冀體貌之優

辭免都督江淮軍馬表

張德遠

江淮重寄猥出異恩犬馬餘生蓋安敢分輒上臣愚之請未蒙  
制可之音中謝伏念臣少不如人老将及耄一士賢百萬之眾  
素乏脩能百里半九十之時仍當末路倘進退不懲於逆復則  
鬼神將害於福謙顛覆噴有之言重玷并包之度况明光之口  
雖陳於別塞而赤白之囊不徹於甘泉分也巳固於長城申命  
何資於錫鉞伏望皇帝陛下擴日月之照推天地之恩俯憐  
視蔭之幾何時如全護不憚出綸之惟反曲賜矜從

辭免資政殿大學士知隆興表

黃德潤

滄蜚蟻之誠莫回淵聽渙絲綸之布尚闕俞音義不違安須至  
再瀆臣中謝竊以陳力就列人臣當自揣諸心量能授官君上  
亦必唯其當有如潛藩巨屏秘殿隆名甚非么微所克負荷而  
况適茲虛次妙於柬求豈無方面之才以稱當宁之寄鎮撫所  
係恩意非輕猥以厲臣敢不祗命重念臣叨竊久矣報塞葭然  
雖中外之任不殊而知能所効則一感洪恩之優渥撫小巳以  
凌統伏望聖明特賜俞允重優賢之禮毋以妄加念謀帥之難  
必求已試

辭免翰林學士知開封表

蔡君謨

大明臨下無遠裔而不均寒露墜霄雖微物而必潤俯承錫命  
彌用震驚焉伏念臣向日披垣擢司京邑上賴清光之燭終依全  
度之仁屬私便於庭闈遂求補於閩粵尋膺朝綽出守泉山首  
尾五年更移兩郡親戚歲時之樂足慰母心阡塋展省之勤屢  
躬先祀非繇孝治之廣曷為天幸之多惟臣賤微感疾滋久藥  
石攻治之愈至根本堅牢而未除日月因循筋骸憔悴深畏曠  
官之責方潛退處之圖敢謂伏蒙 皇帝陛下曲貸素餐復加  
恩數禁林近職儒者最榮都輦要權吏之高選併疏寵渥猥速  
孱庸揣材幹之非優顧福基之甚薄苟貽過溢之咎實虧分量  
之知重念臣仰違法座之嚴荐易周星之次思出入於省闈每  
意在於本朝今此召還適當趨進然而慈親垂老於義不可以  
遠行病體至羸於力不堪其劇任願收收於成命俾再典於舊  
封唯是危誠終期得請

進秩 陪位 起復

辭免正議大夫表

天中霈澤近輔書勞亦及罔功豈宜虛受中謝伏念臣素無他  
技唯繫孤忠誤蒙累聖之知寔服近僚之列頃因人乏進貳宰  
司先帝審訓羣臣靡預誓言之末陛下嗣膺大寶曾無翊戴之

勤豈弗畏於多言詎敢當於懋寵矧乃方任人而立政惟即命以記功將深戒於官師且先從於近始伏望 皇帝陛下慎持名器申勸臣鄰收<sub>收</sub>出綍之過恩亮循牆之愚懇爵惟馭責免上累於至公賞必及勞蓋率由於舊典

辭免覃恩轉階表

汪彥章

便藩之寵弗許固辭震懼之懷終幸安處敢再輸於危懇庶有槩於淵衷中謝伏念臣猥自周行獲陪興運未閱半朞之久已躋二府之崇雖鴻私務極於生成而小器日憂於盈滿矧國步艱難之後茲人臣隕越之時詎可包羞唯知冒進故屢上縷陳

之牘願必還汎進之階子雖幸於父知天未從於人欲伏望 皇帝陛下特垂簡帛無徇彝章念微臣事主者既本至誠則聖主待臣者何憂不貴肆頌明詔追寢誤恩免疏遠之孤踪速借差之大戾使鷓鴣共由之路循次而升則桑榆未盡之年皆君所賜

辭免南郊陪位表

王介甫

萬國駿奔煒上儀之殊觀一夫幽屏叨明命之特招伏念臣竊祿已多冒恩最渥自致倦之義實有素情再瞻穆之容豈非榮頌而蕭然暮嬰以沉痾伏畎<sub>畝</sub>以負薪於今未已侍壇垓

而踐豆用此為妨

辭免明堂陪位表

歐陽永叔

合宮大啟爰講於上儀明詔忽頒俾祇於嚴名被恩言之優渥  
撫病質以兢榮中謝伏惟 皇帝陛下亶聖聰明憂勤慈儉遂  
羣生而涵育臻至治於和平乃因萬物之成秋爰即九筵而展  
禮陟降薦獻百官以職而各供膺受福釐一人有慶而或賴咸  
而臣近辭印綬方伏田廬當與庶民並蒙餘澤敢期睿眷尚錄  
孤孱俾陪在外之臣來預侍祠之列載念臣自緣災疾幸獲退休  
殆未逾時尚嬰舊苦雖朝廷禮樂之盛得與者為榮而犬馬筋

力之衰告疲而已久既不得於策勵姑自信於竒屯太史歸於  
周南惟知歎命子牟存於魏闕但極馳心

辭免明堂陪位表

張文潛

明德惟馨方格神於盛禮相予肆祀俄賜名於老臣衰朽知榮  
兢惶靡措中謝伏惟 皇帝陛下嗣隆聖統躬致太平翼文  
王之小心烝、虞舜之大孝季秋順序方萬物之盛多四方和  
未喜多士之奔走祇見列聖哀對昊穹故布政之法宮大明禮  
樂受丕天之景貺均被遐過適喜交神人慶浹夷夏凡執事豆籩  
之末或觀光輿隸之間足為至榮可以無恨而况臣猥以屏退

尚叨既存溫詔在門外慶有位固願聞舜韶而率舞瞻免日以  
傾心而遲暮之餘衰疲且久筋力已消於疾病才異盛年踈野  
久放於田間不足為禮當千歲之接統自滯周南奉半夜之受  
釐莫趨宣室無階策勵惟劇飛馳

辭免起復太宰表代

王豐父

苦山餘生已瀕死所絲綸渙號俾復書班勅使荐臨德音下逮  
呼天號絕拊已驚迷伏念臣早偶家艱專承母訓零丁孤苦邈  
爾無依鞠躬提攜迨夫有立黃緣際過玷冒高華犬馬之養未  
伸風木之悲遽至攀號泣血摧踊傾心仰賴聖神之恩甫終窀

窆之事几筵是奉墳土未乾痛深陟屺之瞻恨未見泉之見敢  
謂宸衷念舊優詔奪情蓋年三免懷通喪者聖王之制而踰月  
視事變禮豈治世之風雖睿眷之殊常豈私情之所忍伏望  
皇帝陛下推孝思而錫類值宰柄以馭臣念哀苦之方深况衰  
疲之已甚報親日少願終制以為期事國時長願捐軀而未晚

辭免起復太宰表代

方席薪而枕塊於義為安俾服冕而乘軒共知不可哀情荐布  
宸聽未回再殫罔極之情異動蓋高之聽伏念臣猥蒙天眷誤  
玷宰司久無補於明時亟自招於大禍慈顏遽隔悲隙駟之難



留原宥甫成倚苦廬而永慕庶畢哀恫之制少霽顧復之恩忽  
奉制綸俾遠還相位私情莫處公議靡容豈可遵故事以踰前非  
但當守禮經而據古是臣重罹酷罰屬在衰年既極摧殘浸成  
疾恙精神徒耗筋力頓衰雖強使之造朝決尖難堪於應務伏望  
皇帝陛下委大明之照閱不移之愚追寔渙恩俾終祥禫則望  
主得全於禮貌而孤臣獲畢其孝思疾首痛心或偷生於慈日  
銘肝鏤肺期報德於它時臣無任

辭免起復太宰表

泣血陳辭仰祈聰聽批章示訓尚閱俞音涕泗無從回皇失措

伏念臣人非適世壯本為親密困官途頗闕晨昏之奉晚逢真  
主方欣甘旨之榮俄纏纒棘之悲永負劬勞之報呼天靡及觸  
地無容強食喪勝空驚過隙之駟感時追往更傷反哺之鳥敢意  
勅使荐臨德音嗣降雖君命召固難俟駕而行念人子情不  
忍短喪而出矧今耆老在上忠賢繼登外無兵革之虞內有禮  
樂之備事得其序功已告成則焉用於愚臣俾固違於典禮伏  
望 皇帝陛下大明旁燭至德兼容俾冀慈母之恩俯遂匹夫  
之志褒非一字已同華袞之榮誓畢三言庶免素冠之刺

聖宋名賢五百家播芳大全文粹卷三下

謝表

除授 宰相

謝除右僕射表

王甫介

貳政中臺兼官左者惟時遴選蓋嘗久曠而弗除忽此叨居顧  
豈微勞之可稱陪敷厥邑敷告於廷是皆至榮難以虛辱臣某  
中謝 竊以經術造士實始盛王之時偽說誣民是為衰世之俗  
蓋上無躬教立道之明辟則下有私學亂治之姦氓然孔氏以  
羈臣而與未喪之文孟子以游士而承既沒之聖異端雖作精

義尚存逮更燼煨之災遂失源流之正章句之文勝質傳注之博溺心此淫辭設行之所由昌而妙道至言之所為隱篤生上主純佑下民成能協乎人謀將聖出乎天縱作於心而害事放斥幾殫通於道以治官延登既眾尚懼膠庠之黎獻未昭典籍之群疑乃集師儒具論穆指繕書來上褒典俯加臣趣操弗高知識尤淺少嘗勤苦但為喪氏之吟晚更耄衰豈免輪人之議初備使令之乏即知稱愜之難敢意誤恩獨當殊獎此蓋伏遇皇帝陛下以化民成俗為事故急在誨人以尊德樂道為懷故易於縻爵因恩固陋特假龍光祇服訓辭深惟報禮雖無博

學對揚稽古之鴻名庶以雅言助廣右文之美化臣無任

樞密

謝除樞密表

張全真

視草無聞已玷嚴凝之直出綸甚寵還陪密宥之謀錫秘殿之除名進文階之顯秩循墻固<sub>避</sub>渙汗莫回<sub>中謝</sub>伏自兵威既挫於北敵之強國勢益微于南渡之後眾類傷方之鳥將猶飽肉之鷹念郊壘之風塵想籌帷之豪傑時開真主固有以駕馭於英雄事總天營又有以統臨於將帥至於叅貳樞極幾亦奉行文書曾是艱難豈容尸素况如臣者才極下品之中進無左右

之容扶策讀書居慙軍旅之末學蒞官行法粗安州縣之徒勞  
 由誤簡於冕旒遂濫陪於簪橐任論思獻納之寄訖何補於聰  
 明更文章翰墨之遊但徧塵於親切每憂踰分屢丐投閑敢謂  
 眷禮有加鴻私未熟付以本兵之重試其經武之長儻非効節  
 於糜捐何以分憂於宵旰此蓋伏遇 皇帝陛下撫育萬子焦  
 勞百為從善如轉固已兼收於衆智與人不求備曾罔棄於寸  
 長遂令檣櫟之姿亦廁機衝之任痛遠人之猶夏終期尺筮之  
 管來群策以防秋敢息寸陰之惜尚幾小補以答萬分

謝除樞密表

宋子京

叨膺茂典入筦鴻樞伏省戶以陳章巧締囊之收霈危稔再竄  
 明制必行懼煩失以致尤輒進思而冒處中謝臣聞佐王基命  
 簡在臣隣秉軸居中本乏柄兵非有號令風采為下所瞻則必  
 幅臆謀謨熙天之載異於茲道孰匪曠官竊念臣材散無庸地  
 寒寡援興顏行之下因得累勞陪周衛之中罕嘗進熟見容漢  
 皇之度久總軒師之營貳掌繁机佐經中寢會落成之不日因  
 慶祀以祈天汪歲深仁導迎協氣而臣弗從災異之免更加名  
 器之多寢嘿懷安委蛇就列內循無狀自詭必酬何月律之未  
 奄求天私而載造擢於末級遂正近司輒成奏以讓還枉深辭

之切救薄言匪控進拜增羞助百姓之昭明行虞辱國干六符之䟽闕舉畏談天斯蓋 皇帝陛下養以至人<sup>仁</sup>赦其少戇同五帝之親事不及有司俾一介之孤臣無空大位敢不益勤綿力罔伏舊章期有補於萬分敢自 於九殞

謝除樞密表

宋子京

近叨恩制俾正樞司伏閣上言願還於成命斷草催拜特枉於慈音固讓莫諧冒居何幸<sup>中</sup>謝竊念臣液楠材散培塿地卑獲對聖期屢揚劇任致王所懷既會於偃兵積日之勞何從而塞責洪惟職履深諒由衷斯謀斯猷則罕嘗入告予求予取則不

議汝瑕由先帝之舊人貳禁庭之幾事屬圖考室兼議僞功燕寢乃安顧成並亨紀年四省捨爵計功首膺無虧之言已渙于宣之數借夫國典布在人言匪謂天眷謬加寵章尤渥靡論彝序超據上游壅薄訴於危心隔蓋高之善聽光華異等震忭表懷三接詔諏未識主臣之對萬機處可曷臻密靖之風棄<sup>乘</sup>是泰來缺然虛授此蓋伏蒙 皇太后陛下道敷善養人不備求貸衛綰之孰何取子願之謹質特捐厚禮期責寸長顧懋賞以不貲誓捐軀而有所

謝除樞密表代

汪彥章

本柄於中久汗樞機之地進班其首更叨綸綍之恩蒙睿獎之  
非常私瑣材而不已安危所繫榮懼交深中謝伏念臣生江湖  
之鄉非廊廟之器偶扞防於牧圉蒙記錄於冕旒當中興無文  
武之才有慙吉甫乃一見受腹心之寄自比留侯荐膺推擇之  
榮遂處弼諧之任謀參帷幄職總鞞鈴永言國步之屯方賴廟  
謨之勝外有交侵之強虜內多竊發之奸民兩河未復於輿圖  
二聖尚勞於岳狩非兵莫濟得士斯昌豈伊章句之腐儒堪場此  
朝廷之大任茲蓋伏過過皇帝陛下治先稽古志在定中躬堯  
舜之仁雖欲濟民於富壽聽高文之憤不忘克己於憂勤詳延

左右之臣猥及下中之品臣敢不兼收群策務究遠猷念國家  
嘗瞻瞻之憂適當今日豈臣子捐軀之報敢後古人

謝除樞密表

歐陽永叔

右樞虛府充位宜求於雋賢多士盈庭誤選乃廁于庸妄既罕  
辭之靡獲徒以寵而為憂中謝伏念臣少本賤愚初無志慮為  
小人之事力不勝於負薪程有司之文學止期於干祿過被仁  
恩之樂育早從英俊之並遊遂叨侍從之流久玷論思之地方  
時求治殆無補於分毫顧質早衰况漸凋於齒髮但思藏縮敢  
望甄既陞矧惟贊萬事之機必也極一時之選豈容濫得猥以備

員當令命之始行方違感以失措以睿思至渥名旨甚嚴莫諧  
懇避之誠徒負貪榮之媿此蓋伏遇 皇帝陛下廓天地之量  
垂日月之光憐朴直之無他謂疲駑之可勉俾承缺乏以効拙  
勤臣敢不奮勵無能之姿感激難遇之會職思以位庶免於曠  
官謀不以身少期子報國

參政 昭文

謝除參知政事表

楊大年

臣某言臣近者虔拜封章乞歸班列忽奉手詔不賜允俞仰睿  
旨之丁寧撫微躬而戰慄欲更披於肝膈慮有黷於君親

中謝

伏念臣孤直寡徒頑疎無取章句之學僅能齒於諸生清白之  
規固克傳於奕世自策名筮仕陳力當官塵右掖之清華踐內  
庭之嚴秘乃至典樞機之務參輔弼之司並由旒冕之誤知豈  
副縉紳之公議小器因難於大受高位唯恐於疾顛夙夜在公  
雖僂佹而從事負乘致寇亦跼踖之靡遑今者訟起下民辭連  
執政憲府職當於推鞠獄情遽至於矯誣既闕實以平反爰舉  
直而措枉已從明辨式正常刑其如司長官是臣外舅踐文昌  
六卿之貴味園扉兩造之辭名桂簡書身繫非所實朝倫之  
共恥在戚屬以何顏是用憑懇紫庭祈恩丹宸願退歸於散地

庶先<sup>洽</sup>洽於至公豈謂 皇帝陛下推洪覆之深仁示曲成之玄  
造特頒泥檢俯示綸言徵周書之舊章以其罪不相及推漢高  
之大度且復待之如初仰承雨露之私內積氷淵之懼竊尊之  
罪固不可以再三許國之心但益堅於方寸誓傾臣節上答天  
慈臣無任

謝除參知政事表

王瞻叔

備爭臣而論指薦著顯庸躋政地之出綸驟膺親擢控誠忱之  
懇切辱訓誥以頻煩拜命若驚省躬甚惕中謝竊以虞舜紹唐  
堯之緒五臣舉而至治章武王恢周室之基十亂升而大勳立

惟輔理承化者非一賢之畧必同寅協恭而廣衆正之求矧今  
三邊未寧庶事多舛民生尚困國是易搖天災時變之占日深  
寅畏旰食宵衣之慮特軫憂勤陛下妙簡臣隣旁招俊哲列之  
丞弼貴以謀謨蓋將外撫四夷內修百度振藝祖創垂之統酬  
光堯付託之誠自非兼文武之弛張効忠嘉之啟沃學據古今  
而通其變才周軍國而措之宜則何以上贊宸猷下符僉論如  
臣者斗筭小器鈇槩腐儒徒以險阻艱難之備嘗稍諳俗狀故  
於東西南北之不擇自勵功程久絕望於榮途復何心於晚節  
向者名從巴蜀歸覲闕庭初無左右之容遽被神明之昭未更



一歲殆及九遷版部銓曹綴獻納論思之末禁林諫苑充文詞  
言語之官皆暖席之未遑已抗旌而于邁心欲為而不逮者精  
力勞則有而何補於事功遲休榆塞之防秋便老菟裘而卒歲  
敢期僥倖乃爾超逾除二府之自外方追慶歷名臣之殊遇由  
七人而參大政實奉朝累世之罕聞萃此寵光若為負荷茲蓋  
伏遇 皇帝陛下聖聰旁達睿斷無疑昭諗誣於七政之明定  
許予於四時之信祇承於帝思鋪張不世之休無競惟人每夢  
想非常之士遂令猥瑣亦玷登庸臣敢不鞭策疲駑文持哀病  
仰體丁寧之旨對揚特達之知際會風雲方快觀身嘉之會奉  
承教令期助成宏遠之規臣無任

謝徐叅知政事表

歐陽永叔

贊貳國鈞叅聞廟論謂宜不決而通冀得非常之材延以叙遷  
俾之承乏誤恩過被訴護靡從中謝伏念臣少迫賤貧偶勤學  
問儒者博而寡要况匪多聞文章世之空言豈能通用徒以早  
邁亨嘉之會驟蒙獎擢之私叨言詩侍從之流逮今踰紀玷出  
納樞机之任初乏可稱幸先彈理之未加每欲逡巡而引去敢  
期睿眷俾與政機優以寵章進其爵秩望非意及榮與憂并此  
蓋伏遇 皇帝陛下克德聰明禹躬勤儉博求俊乂以濟治康

謂臣既樸且愚必能循於忠謹雖庸而駑尚可策其疲駑猥以  
備員遂茲冒寵敢不益堅素守自勉不强惟殫犬馬之勞上答  
乾坤之造

謝除叅知政事表

王介甫

承弼之任賢智所難顧惟缺然何以堪此仰膺成命弗獲固辭  
中謝 竊以古先哲王考慎厥輔皆有一德用成衆功伏惟皇帝  
陛下含獨見之明踐久安之運甫終諒闇將大施為宜得偉人  
與圖庶政如臣者徒以承學粗知義方本無他長可備官使退  
安私室自絕榮途既負采薪之憂因逃竊位之責大明繼燭正

路宏開付以蕃宣還之侍從清閒之宴或賜開延淺陋所聞每  
蒙知獎以為奉教庶幾無尤當軸處中良非所稱寵光曲被震  
媿交懷此蓋伏遇 皇帝陛下德茂旁求志存遠舉隆寬盡下  
故忠良有以輸心公聽並觀故讒慝不能肆志矧睿謀之夫天縱  
方聖治之日躋思稱所蒙敢忘自竭遠猷經國雖或媿於前修  
直道事君期不隳於表守

謝除昭文相公表

王介甫

承流宣化深虞失職之誅經體贊元更誤選賢之舉中謝臣竊  
惟人物之會通常寡實以君臣之遇合至難自匪同聲氣之求

孰能偕功名之享伏惟 皇帝陛下天縱大聖人與成能乘百  
年久安之机飾千歲積壞之蠱士誠服矣而持祿養交之習未  
殄民允懷矣而樂事勸功之志未純近或長阨而仁義之澤未  
流遠或虛憍而道德之威未立宜選於衆舉格於皇天之材使  
暨乃僚績建我高后之事冀勝所任以濟斯時而臣蚤見知於  
隱約之中久獨立於傾搖之上勲弗<sup>庸</sup>効恩禮更加託備外藩俯  
鄰暮歲遂叨詔獎還冠宰司自視羈單所懷蹇淺方古耕築則  
有其陋為世聘求則無其賢然以投老之軀而遭難值之運苟  
貪歲月趣就消埃且上之拖<sup>施</sup>既光則下之報宜厚與之戮力仰

承睿智之臨罔不同心俯賴忠良之協誓殫殊拙圖稱休明

尚書 侍郎

謝除吏部尚書表

顏思魯

吏曹兼組僅輸累月之勞帝宸既思遠涉三銓之首居然就職  
惕爾懷慙臣某<sup>中謝</sup>伏念臣初無適時用可之才徒有泥古不  
通之學握從臣之橐俯仰四方使老上之庭往來萬里歎賢勞  
之何有荷聖眷之過優既叨小宰之除復攝冢鄉之乏而臣技  
窮能薄景迫年侵游騰告老之章未動蓋高<sup>之</sup>聽不圖簡記反  
使甄陞維天官分典於銓衡而常伯實提其綱頃嘗兼掌猶

懼弗勝茲命顯官益虞非據併賜身章之寵仍領廡乘之珍顧  
異數之駢蕃將何功而稱塞茲蓋恭遇 皇帝陛下規模天大  
睿智日躋照臨博暨于羣工禮遇尤先於近列知臣樸忠有守  
寒松不改於凋年憐臣氣力未衰老馬或諳於故道廼頒茂渥  
猥及微蹤臣謹當仰體隆私益堅晚節壯心雖在詎敢受於糜  
捐來日無多終願祈求於閑退

謝除禮部尚書表

王 蘭

外間整分遽過歸於駟名昨朝甫對即擢長於春官席寵踰涯  
撫躬增懼臣中謝伏念臣奮身孤遠逢世休明仕不因人終始

皆蒙於睿簡才非選用險夷但信於愚忠去國倚廬起宇臨鎮  
豹尾隔四年之從麟符專一道之權問田里之嘆愁具知疾苦  
頒詔條之寬大方究撫綏敢圖宣室之興思誤玷中臺之率屬  
跡陪鷓鴣驚恍疑夢寐之回履上星辰頓覺依乘之近被服章之  
安吉引駒轡之閑馳榮渥併加微軀難稱茲蓋伏遇 皇帝陛  
下亶聰建極知哲能官聚英雋以尊朝蓋為本根之慮咨直清  
而典禮不徒玉帛之云退省迂儒曷膺妙選臣敢不益堅素守  
仰副隆知願維斗喉舌之司當勤出納如稽古禮文之事敢廢

討論

謝除刑部尚書表

歐陽永叔

職清書殿實為儒者之榮望峻天臺仍忝刑官之重內循謏薄  
仰玷光華中謝伏念臣稟質迂愚粗知業履因時幸會遂竊寵  
靈無拾遺補闕之勤常陪法從非天冊高文之手久廁翰林晚  
綴宰寮俾聞國論荷三朝之眷遇每察懦衷幸四海之清平得  
容尸祿居滿盈而不戒積災釁以自貽屬聖統之嗣興赫皇明  
而繼照誣言詰服已大釋釋於群疑危跡伴全保不虧於素守犬  
馬合思于報効桑榆奈迫于衰遲屢貢懇私上千聰睿遂蒙開  
允俾解繁機然而晚節餘生本期避寵清資顯秩益更貪榮被

優渥之非常但凌兢而失措此蓋伏遇 皇帝陛下聖神御極

亭育推仁閔孤拙之勢危無容自立謂疲駑之力竭難責遠圖

曲軫至慈俯 誠請仍憐舊物特示殊恩顧非木石之頑宜誠識

乾坤之造颯然素領雖難強于筋骸皎苦丹心猶自期於塵露

謝除吏部侍郎表

歐陽永叔

驟膺煥號備憑愚誠雖至辭窮罔避煩言之為黷重乎今出莫

回成命命於已行祇受以還驚懼惶失節中謝伏念臣學不通於原

本材不足以經綸但知守拙以為忠每務師心而自信徒以遭

逢先帝拔自眾人參侍從之聯遂玷機衡之貳屬而大橫啟運

嗣統膺期方為政之清明思百度之修理內量謏薄寔憂以聖而責愚矧延衰殘方念乞身而告病不謂皇慈曲被寵數屢加當覃大慶之初已無功而冒賞曾未踰年之久復進秩以叨榮此蓋伏遇 皇帝陛下聖政惟新用人務廣謂才難於求備思悅使以志勞憫其勤勛錫以優洽雖榮踰於望表亦寵與其憂并誓殫犬馬之微少答乾坤之造

謝除戶部侍郎表

蘇子由

掖垣清閤奉鈇槩以媮安民部劇煩以錢穀而為職事非素學命不獲辭中謝伏念臣起於南裔曾未再朞擢在近班訖無少

補開口論事違宸心延納之初引筆代言非書命縱橫之際竊祿而已功何足云計日以言時亦未幾方自憂於汰去豈復意於超升此蓋伏遇 太皇太后陛下仁聖無為靜深照物坐閱工師之衆灼知情偽之端察臣朴愚憐臣孤遠才雖未能以應務性則不喜於為邪試之劇曹冀其來效然臣觀當今戶部之政正直昔日新法之餘召募憂於殘荒差繇患於戶少事既難辦法當通方尚賴聖算之明稍寬民力之憊臣之踈拙徒自勉強苟少緩於瘡痍亦圖報之萬一

謝除戶部侍郎表

晁無咎

典三禮於曲臺已冒高華之選貳六卿於民部遽登峻近之班  
力陳祈免之忱辭終奉莫回之溫詔爰賜九環之帶仍班列采  
之衣寵賁其蕃凌兢失措中謝伏念臣初無時譽獨有家聲莫  
傳屋壁之遺編僅繼山林之末續好為異論每與世疎喜作文  
章務求古合低徊平進坎坷數奇事鈐繫於書林絃樂歌於學  
省曳裾而位王傳佩玉以陪禮官乏戕奏之辭而掌端錦於南  
非應接之才而駕輅車於北道寅緣賜對懇切獻忠明言趙  
魏之郊寇攘孔熾極論幽燕之域疆場弛嚴謂新民右祖之可  
防繇大首左社之不變荷上皇之嘉納仰聖度之優容偶遭邦

刑亟遷宰旅徒悉心於綱目曾何補於彌綸園城之變忽生造  
膝之言良驗自羅兵革益困簡書心志摧頽形神凋耗獲辭劇  
任復處清沅因贊道而觀二聖之重歡預討論而創兩宮之新  
禮國步稍定私志或伸念八載之居中丐一麾而補外居叨異  
數俾踐禁途超跳等夷愧負流輩惟常平之美號本廣惠之舊  
規加益損於前朝浸垂墮於今日儲蓄竭公私之橫費新陳棄  
散歛之虛名方師旅之未寧慮水旱之或繼田廬戕毀以幾盡  
老稚流徙雅徒而不歸要當貧而不償是謂積而能散極茲古弊且  
屬俊良葭聞下才克堪重寄此蓋伏遇 皇帝陛下天臨九有

子育群黎攬英俊之奇謀共禋初載監宗祖之成憲圖致中興  
念臣 意藝文蓋將試以吏治察臣粗知體要或可備於從官  
臣敢不仰稱所蒙俯修厥職錢穀之問其不至於廟堂補助之  
仁願廣推於寰海雖簿書期會之是務豈論思獻納之敢忘披  
黃卷以接聖賢願尚存于舊習賜金魚而因政事功自比于昔  
人

除戶部侍郎表

霧

歐陽永叔

皇明繼照如日之升睿澤霧流溥天咸被時惟朽懦亦玷清華  
中謝 伏念臣本以庸虛僅知學問識不周于時用材莫逮於中

人方其壯年喜論時事名聲濫得招謗咎以偕來榮寵踰涯蹈  
憂危而亦至晚被先朝之誤獎俾陪二府之後塵居無補於休  
明方自期於引避遽號弓而結恨雖頌體以何追伏遇 皇帝  
陛下奮發乾剛嗣承天統當茂業繼文之始及歡謳歸啟之初  
宗社獲安人神洽慶矧惟新之號令方無間於幽遐顧於茲時  
其敢獨異俯從祇受但益凌兢臣敢不勉勵衰殘咸遇今昔更  
竭疲駑之効庶伸塵露之微

謝除禮部侍郎表

張全真

病衰自列念無補於艱危睿眷兼容尚叨塵於巖近循牆莫獲



躋地難勝中謝伏念臣竊第於上皇臨御之初久服勞於州縣  
賜對於陛下中興之旦遂叨侍於冕旒充耳目之官圖竭股  
肱之力愚非一得窮有百罹精神疲於思慮之煩疾瘁甚於驚  
憂之後力致願天之懇仰丐投閑敢懷擇地之私但期逭責逮  
辭榮於專席乃承乏於貳卿將使論思則已試罔功復有曠瘼  
之懼止充員品則於時多故豈無尸素之慙且憑危哀繼申前  
請敢謂包荒之度特寬犯上之誅傳溫詔之褒揚曲煩近弼察  
寒蹤之孤藐留真本朝仰厚惠之不貲揆初心而有覲強顏就  
列力疾造庭此蓋伏遇 皇帝陛下駕馭英豪而大有為拔去  
凶邪而罔不服優容臺諫廊通遐邇之情眷禮臣鄰曲盡始終  
之遇願茲蕞質亦玷鴻私念正人端士之言書紳自勵報厚地  
隆天之施刻骨為銘

謝除兵部侍郎表

汪彥章

東省瘵官方祈病免中臺分掌乃誤優遷資逢世以非宜寵踰  
涯而益懼中謝伏念臣江湖遐裔章句小儒才不過庸近尺下  
中之品學雖忘老安知左右之原偶陪多士之升幸備公朝之  
選徧誇清貫遂綴邇聯旋遭值于干戈獲奉承於羈勒才因事  
見初無橫草之功災與衰期乃有負薪之疾屢投誠於魏闕將

歸卧於漳濱猥蒙內史之書俾貳文昌之秩戎昭所繫儒緩奚  
堪茲蓋伏遇 皇帝陛下睿智有臨憂勤無逸光復祖宗之舊  
既已配天兼收文武之長未嘗愒日惟臣瑣質負國明恩竭股  
肱之力而徒有此心譬腹背之毛而何裨於用耗 廩食羞愧  
神明不辭勉効於秋毫顧恐溢先於朝露周六典治庀之職雖  
幸叨居漢九卿賜告之恩終期得請

謝除兵部侍郎表

呂安老

荷恩深恩撫已驚慙中謝竊以六部貳卿九重從列非耆老久  
次不任倚毗惟師友淵源知堪獻納况屬艱危之運而躡英俊

之躔士以為榮時所宜重如臣者至愚極陋多質少文抗志雖  
慕於古人周已不逮於時輩徒襲舊學嘗聞師言以謂君子之  
仁貴克己以濟物至若人臣之義在尊主以芘民有志於道德  
則功名自來無負於國家則爵祿可享事在勉強奉以周旋顧  
險之備嘗守迂愚而自信頃從踈逃數冒親除當言責於渡江  
再造之初奉使事於群盜紛起之際出入帥閫陪大將以宣威  
入綴省聯位弼臣而布治坐閱歲時之久茲聞尺寸之勞方草  
疏以投誠覬請郡以自効豈期僥倖有此超踰此蓋伏遇 皇  
帝陛下道法祖宗功加寰海思起大化辨邪正以審官務抑虛

名分急勤而察吏知臣不善於諂媚謂臣稍歷於劇煩故畧其  
愚欲試以用受知如此謂報謂何臣敢不仰服訓詞益堅益素履  
深志士殺身以成仁忍做鄙夫既得而患失

謝除刑部侍郎表

任文薦

伏奉御筆除臣刑部侍郎尋具狀辭免蒙降詔不允者坐謫南  
州猶佩左符之寵歸瞻北闕載頌細扎之優願遭遇之踰涯但  
戰兢而出涕臣某中謝伏念臣學由總角仕已華顛姑惟竊祿  
以安負詎識取塗而據要荐膺簡拔皆越等夷成均教導之官  
初慙虛受法從論思之地亦輒冒居天地之施無私嗟嘆之誠

曷報未知死所敢望生還昨者封疆與賊為隣保五科民督戰  
先擒賊將稍振軍聲設險則高壘深溝濟師則飛芻輓粟寸心  
勞瘁左臂病孿方願投閑遽蒙趣召茲蓋伏遇 皇帝陛下軫  
憐舊物開示大公察其遜至之動宜有尊父之節試中執法既  
收無用之言擢以司刑更責後來之效臣敢不益思許國毋憚  
殺身第虞衰疾之侵終遂退休之請

謝除工部侍郎表

秦少游

入司太僕已慚稱效之虛進貳冬官尤愧選掄之誤顧叨塵之  
已甚念辭避之弗容承命惟驚無躬以懼中謝伏念臣身承家

訓世受國恩荷先朝特達之知蒙二聖生成之賜左選都司之  
要既獲備員內閣秘殿之嚴更容通籍以至外專兩郡內閣三  
卿徒為歲月之淹莫先事功之學方虞罷黜退伏於田廬敢意  
推遷遽陪於法從材微任過恩重報難此盖伏遇 皇帝陛下  
盛德海涵至仁天覆以臣父某歷四朝而被遇登三事以退居  
知父子至情欲慰桑榆之景念君臣難遇誰收管蒯之才豈惟  
一敝族之榮時乃百執事之勸臣敢不鞭策駑蹇淬礪鈍頑以  
捐軀報國之誠為竭力事親之義

謝除男工部侍郎表

邵公濟

下臣備位未施橫草之勞賤息蒙恩驟綴持荷之列更煩溫詔  
莫遂牢辭仰戴寵靈俯深感涕 中謝 伏念臣家聲寥落門望卑  
平高魯繼世決科迄陸沉於州縣父祖同時抗賊咸身沒於邊  
陲敢期草芥之微迺際風雲之會起家事主歷時俄冠於孤卿  
教子讀書接踵亦登於省寺超踰若此人其謂何反復思之今  
不翅足荷聖恩之隆厚被親擢之光榮叨塵起部之聯 勿  
泉之侍舉族相顧共知雨露之偏隕首為期曷稱乾坤之造茲  
盖伏遇 皇帝陛下慎持八柄允釐有工有求忠臣於孝子之  
門使奏薄技於從官之內必當其位師言其於群材亦及爾

私瑣：求塵於旒任肆令么麼獲玷清華臣敢不祇服訓詁相

勉忠義仰祁奚舉子之意曷繼前修慕孤突突事君之言少圖後

效庶殫皎報用答洪私



國家圖書館, NATIONAL CENTRAL LIBRARY, TAIWAN, R.O.C.

聖宋名賢五百家播芳大全文粹卷四上

謝表

除授

中書舍人

翰林學士

謝除中書舍人表

曾子固

甫上程篇遽塵寵任載惟遭遭過倍集兢慙中謝蓋聖君難諭之

情將欲施於號令得當世能言之士然後達於文辭矧今綱理

四方彌綸庶政肇新之王度備久簡之官儀許謀常越於拘

學注措舉為於右濶豈伊凡庶可測高深方當覺悟適避使徧

知於上意訓齊內外用丕變於群心尤資演暢之才曲盡丁寧

之旨布為邦典茲謂人文顧在臣愚豈堪此遠伏望 皇帝陛下  
超踰千載特起一時躬克帝之聰明而不忘講學集成湯之  
智勇而無倦咨詢惟左右前後之臣有耳目腹心之寄尤非淺  
識所可叨居如臣性實滯蒙器非廣博知自強於名節耻陰附於  
貴權無因緣毫髮之<sup>板</sup>板援有積累丘山之忌嫉晚逢睿聖獨  
賜收憐褒嘉特異於常倫進用每從於中出猥以五朝之大典  
屬於一介之孤生已媿缺然將安稱此敢期詎寵仍寘近班敷  
導訓詞懼空疎之難強<sup>進</sup>進參詛議憂蹇淺之易窮於風波流落  
之餘以蒲柳衰殘之質自猶涯分曷副恩榮雖日月之光何加

於潤色而天地之德無待於論思然臣素堅好古之誠粗識愛  
君之義既抗顏而就列敢恕己以懷思謹當尋繹舊聞用闡揚  
於明命激昂懦志庶補助於謀猷仰答生知誓殫臣節

謝除中書舍人表

蘇子瞻

右史記言已塵高選西垣視草復玷近班皆儒者之至榮豈平  
生之所望中謝竊以詞命之職古今所難非獨取之於文蓋將  
試之以事至於机務亦或與聞雖四貴擅權非當時之公議而  
五花判事亦前代之美談及 三字之除乃是一切之政但謂  
內朝之法從安知宰相之屬官既任止於訓詞故權移於胥史

恬不知怪習為故常先皇帝道冠百王垂萬世建六官而修  
故事闢三省以待異人典章一新名實皆正遂申明於四禁俾  
分領於六曹遠則<sup>道</sup>直閣之司近則通檢正之任雖未聞政而  
聞事蓋須有德而有言如臣之愚無一而可草創潤色既非鄭  
國之材除書德音又乏唐人之譽忽當此選莫測其由此蓋  
皇帝陛下將聖與人能哲而惠維在三年不言之際已有十日  
並照之光而臣日侍通英親聞訪道仰天威之甚近知聖鑒之  
難逃謂臣嘗受先朝之知實無左右之助棄瑕往昔責效將來  
臣敢不益勵素心無忘舊學上體周公煩志之誥助成漢家深  
厚之文苟無曠官其敢言報

謝除中書舍人表

鄭僑

載筆螭坳未疇親擢演綸鳳闕遽冒超除內量寒陋之姿仰玷  
適嚴之選避辭不獲震惕靡寧臣中謝伏念臣頃由膠庠辱賜  
科第佐外藩而入館甫閱四年奉詔<sup>中</sup>以乘軺殆經一紀曾獲微  
勞之補報但驚末學之荒蕪願簡在於宸衷復名還於宣室叨  
塵錦被敢云掌奏於南宮俯結絲約更冒記言於右陛兼管瑣  
闥攝事振垣屢猷狂愚悉蒙開納惟是五花之判與夫三字之  
除必識見高明乃可救朝廷之闕失非詞章溫厚豈能司號令



之廢弛如臣迂踈涉道蹇淺既非游夏淵源之學又無卿雲  
黼黻之文承乏幾何方切越俎代庖之愧即真太駮愈深汗顏  
血指之慚蟠木孰為之先容秋毫皆出於帝力茲蓋伏遇 皇  
帝陛下參稽古道丕變人文覽萬化而獨觀其原形四方而不  
匿厥旨雖亮陰恭默帝自賚於代言而潤色討論臣何裨於為  
命思歸獨斷望過平生臣敢不思稱所蒙益堅厥守謀猷可告  
願資海岳之高深言語雖微或助風雷之鼓舞

謝除中書舍人表

胡文定

屢貢忱辭謂難就列終頌成命有愧冒恩觀訓誥之所蒙豈頑

冥之能稱 中謝 竊以身居近侍日奉內朝典掌贊書亦貴語言  
之妙與聞政事尤資獻納之忠自非才擅國華識通世務忠信  
守勿欺之節端方微患失之心何以備職祠臣參榮法從臣稟  
資味匪承學荒蕪冠歲影纓初動願於義檄中年拔紱安審膝  
於陶廬靜陪鷗鷺之羣寧絕鴛鴦之侶值聖德龍飛於寶位而  
才賢鶚翥於煙霄不虞澤國之垂綸偶被天衢之推轂拂塵冠  
於壁上更欲激昂視絲髮於鑑中已驚衰晚強辭陋巷遠望修  
門初獲對啟未輸丹赤親承寵擢即預論思自憐羈馱之縱縱倍  
費保全之力言雖危而無罪恩至大而莫酬茲蓋伏遇 皇帝

陛下量等乾坤明齊日月惜人才之難得念踈賤之易凌獨賜  
主張伴圖補報而臣深慙弱植久負沉疴方邊鄙之繹騷屢文  
書之填委分曹押事必藉精強養疾便私豈逃瘵曠幸睿慈之  
洞照當免後艱冀聖造之曲成俯從前請倘自陰陽之寇別伸  
糜殞之期

謝除中書舍人表

蘇子由

執筆柱下已愧空踈起草禁中尤為清切上慙主眷下愧人言  
中謝伏以西臺政教之原紫微論思之地緝熙庶政事得稽參  
進退具寮言成訓誥者趙孟治晉叔向為之謀主則楚無以當

國僑為鄭子羽掌其詞令則國鮮敗事今臣所領頗近於斯宜  
得博達詳練之人疏通敏捷之士考覈邦典潤飾皇猷如臣樸  
訥少文迂拙自用仁祖時始以直言見收下第在神考時後  
以封事獲對清光不能自結於一時旋復竄投於萬里雖謀身  
之不暇顧受任以何堪奉壇之樽何取溝中之斷清廟之瑟誤  
收竈下之焦此蓋伏過 皇帝陛下出震乘龍代天理物默然  
思道專意於用人穆若守成選衆而求舊憐臣一介之賤偶為  
三世之陳遺簪以故而見收老馬以病而復養不求其用聊廣  
吾仁臣蹤力不迫人而誠心未泯學志其舊而一二猶存敢不

靖失於朝側聽高宗之言政勉強以俟幾見成王之措刑

謝除知制誥表

王介甫

高華之選欲報嘗艱固陋之身以榮為懼中謝竊以自古招智能之士因使為侍從之臣豈特賴其虛名謂能華國蓋將收其實用相與致君矧號令文章之為難而討論潤色之所寄苟失職不稱則為時起羞伏惟 皇帝陛下躬上聖之資撫久安之運趨時有救弊之急守器有持盈之難當待俊良使陪遺忘則典司命出禁門一有瘳官尤為累上臣羈單賤士鄙朴常人仕為有志於養親學遂不專於為己比更煩使稍切繆恩內懷尸

祿之慙仰負食功之意又蒙採擢以至超踰蓋君之視臣不使同犬馬之賤則下之報上亦欲致岡陵之崇况臣少習藝文粗知名教遭逢一旦度越眾人唯當盡節於明時豈敢尚懷於私計

謝除知制誥表

歐陽永叔

伏以王者尊居萬民之上而誠意能與下通奄有四海之大而惠澤得以徧及者得非號令誥詔發揮而已哉然其為言也質而無文則不足以行遠而昭聖謨麗而不典則不足以示後而為世法居是職者古難其人乃以愚臣而當此選中謝伏惟

皇帝陛下茂仁聖之姿荷祖宗之業日謹一日曾未少懈而羗夷負固邊鄙用師勤儉率先於聖躬焦勞常見於顏色雖有憂民之志而億姓未蘓雖有欲治之心而群臣未副故每進一善則未嘗不欲勸天下之能每官一賢則未始不欲盡人材之用雖以爵祿而砥礪尚須訓誡之丁寧尤假能言以諭至意可稱是者不又難歟伏念臣雖以儒術進身本無辭藝可取徒值嚮者時文之弊偶能獨守好古之勤志欲去於雕華文及成於樸鄙本懼不適當世之用敢期自結聖主之知陛下獎之特深用之太過此臣所以懇讓三四至於辭窮而天意不回寵命難止

尚慮煩然之未諭更加使者以臨門恩出非常理難屢瀆及俯而受命伏讀訓辭則有必能復古之言然後益知所責之重夙夜惶惑未知所措又况文字之職廁於侍從之班在於周行是為超擢不徒揮翰以為劾自當死節以報恩惟所使之期於盡瘁

謝除翰林學士表

張全真

勾閑避劇既叨碧落之林舍短用長復冒承明之直接俊遊之翰墨動榮觀於紳綏寵不獲辭醜無所寄中謝竊以發施大號出於絲綸鼓動多方孚若卜筮雖險阻艱難之日資討論潤色

之工視草而報淮南之書上增嚴於國體扶杖而聽山東之詔  
下期合於人心如臣性蔽謏聞道非深造詩書託業初有意於  
壯行章句決科老自慚於少作適逢辰之尚武殆絕筆於摘文  
方須長劍之銛鋒安取毛錐之用末之黃鍾之雅奏遽容瓦釜  
之鳴頌詔綜之便蕃躋禁林之密勿顧囊書羽檄未清郊壘之  
驚塵而蓮燭錦袍猶想奎坡之盛事叨蒙至此報稱未知此蓋  
伏遇 皇帝陛下堯舜性仁禹湯罪已考圖數貢體天心全付  
之仁任賢使能啟王室中興之運憐臣託傾搖之孤跡終賜保  
全察臣無左右之先容每垂親擢躡登輦禁仰玷龍光謹當緝

駸駸之陳言紬廢忘之舊學曲留朝著已銘正人端士之褒助  
發德音期感悍卒武夫之涕誓殫千慮圖報萬分

謝除翰林學士表

王履道

烏臺代匱初塵執法之班整禁升華遽冒摘文之選迂使輅而  
錫命嗟里巷以縱觀祇荷寵榮唯知震灼伏念臣學專守已進  
冒干時窮年隱約之中畢頌棲遲之末支離其德早以供世用  
之難追琢其章晚或誤天光之被逮蒙簡拔即獲對揚首親日  
月之清明謂有山河之懸直風揚未遠欲隨鵬翼之高神化潛  
施不覺鼠肝之大切願非常之過漸隣可畏之途典訓誥者期

年心已勞而氣索司紀綱者三月力不逮而神疲矧茲內務之繁蓋極儒臣之盛不辭而受旁虞有識多士之譏自恕以居殆匪每慕古人之意獨厚生成之賜重慚因任之求茲蓋伏遇皇帝陛下兼受以臨百工虛懷而視衆智裁者植者各隨物性之宜鼓之舞之並入天機之乃垂眷於卑老之際俾收迹於嚴近之游仰鴻造之不貲捐微生而莫報試之一再已知翰墨之無奇惠以初終或覲田廬之可遂

謝除翰林學士表

王介甫

臣聞人臣之事主患在不知學術而居寵有冒昧之心人主之畜臣患在不察名實而聽言無惻怛之意此有天下國家者所以難遇 皇帝陛下天心廣大海德并包物無一介之遺意求萬目之舉臨朝訪道有百辟之在前燕處清心援衆正而自助從容盛德循致承平塵露之微海嶽奚補脩列聖之故事今將其時因間見以納忠素亦有志

謝除翰林學士表

蘇子瞻

名微不稱寵至若驚伏念臣經術空疎更能短淺少年自守無用於作新去國生還適逢於求舊初何云備遽辱甄收此蓋伏遇 皇帝陛下文武生知聰明天縱法乾坤之廣運體日月之

照微過採虛名使陳薄技敢不激昂晚節砥礪初心歎洪造之難爾盡微生而後已

謝除翰林學士表

非才冒寵久誇文石之班優詔傳恩趣上玉堂之直既假朝章之煥仍分御府之珍避莫從叨塵為懼中謝伏以文章雖本一枝命令實行四方故自古禁林之除極當時儒者之選矧今多事尤重他官內敷帝制之坦明外應軍書之警急學非闕博難酬列燭之咨思或淹遲將誤掣鈴之名常得環傑來承燕間如臣者猥以諸生起於遐裔首尾策名之二紀中間不調者十

年會真人光復之初陪列辟駿奔之後驟膺東拔徧歷高華既

時巡清蹕之屢移方驛召群英之未至執鞭在道視草無人姑

從東省之聯兼候北門之對嘗因多病不勝犬馬之心願賜寬

恩任遂桑榆之暖孰云代匱遂使為真茲蓋伏遇 皇帝陛下

志靖華夷憂深宵旰勵精於學每求稽古之臣罪已以言欲致

銷兵之福治難得要人豈當材臣敢不仰佩眷知力思補報絲

綸行遠願奚俟於丹青海岳積微或有資於塵露

鎖闥

謝除門下侍郎表

晁無咎

驟膺中旨改貳東臺任已重而不勝請徒堅而急避感深榮寵  
愧極迂踈中謝伏念臣素乏賢勞早歷柄用思一介之賦而祥  
志若是顧歷年於茲而報國缺然是以進常內竭於見聞退亦  
不遑於夙夜昔日知爾則何以空懷盛旦之難逢安有為事而  
無功方愧中才之不足已憂昧冒更俾進遷而况黃闈三司之  
崇侍郎左相之亞猥當謀大滋覺人微此蓋伏遇 皇帝陛下  
付物以能使臣有禮稽法上古無貳法於後王取才當今不借  
才於異代股肱所寄負乘為憂誓殫積日之勤終覩太平之美

謝除門下侍郎表

司馬君實

母慈臨御嗣聖亮陰登進弼臣眷求舊物才非稱任辭不獲從

中謝 伏念臣出自諸生幸承素守業泥古之樸學乏經濟之遠猷

逮事仁皇備員諫首容逆鱗之遺直無補袞之嘉謀會英祖

之纂承進河圖之迹近密膺異禮深亮孤忠及先皇改政之初

披內相代言之命委司天憲摧貳樞鈞終獲遂於懇辭蓋曲成

於志守而臣消埃罔效精力早衰出守無能分臺得請留連祠

館荏苒歲華不圖仙駕之升永絕清光之望伏遇 皇帝陛下

丕承洪緒寅御中區訪落之謀亟先於辟賜還之詔屢出於

中宸起於林壑之中處以廟堂之上矧今如初政事綏靖邦家



四方翹首以向風萬姓傾心而聽上斯乃君臣儆懼之日宗社  
安危之機必得非常之材以濟惟新之治臣避命弗獲居寵為  
憂謹當承元首之期竭股肱之力庶圖薄効仰戴鴻私

謝除門下侍郎表

蘇子由

黃闈之崇惟賢是用四品之貴匪功弗加自慙迂拙之餘併荷  
寵光之及中謝伏惟 太皇太后陛下政由家出德與性成盡  
心與民雖萬鐘無愛於國繫身由義雖一毫未嘗取人惟至清  
故大臣小吏不察而盡知惟至公故貴戚近習不戒而自飭臣  
每因雙日獲覲清光嘗恐病竄不中於規模固陋難逃於冰鑑

方欲仰干聰聽少避衆賢敢謂未見瑕疵尚加進擢豈以其拙  
直無欺罔之過而遲鈍少狂躁之心致此誤恩濫於末品此蓋  
伏遇 太皇太后陛下人非求備志在養賢將欲因鮑以致管  
生尊隗以招樂毅 興中宵起舞晞擊楫之名流夢魂先逸於  
勺陳精爽已棲於交戟其如蹇薄難復進趨日昏久困於視瞻  
足弱實妨於拜跪身非已有豈懷枕席之思應事與心違空結望  
雲之戀毋衷徒積洪造難酬

聖宋名賢五百家播芳大全文粹卷四中

謝表

中司

謝除御史中丞表

蘇子由

視草禁中既極儒臣之選專席朝右復膺忠告之求兼延閣之  
寵名增南司之榮觀退循漢拙徒積兢危中懃伏以仁聖在宥五  
年於今恭儉無為四方稱治然而矯枉之過苛吏造去而寬弛  
相尋革故之難弊事雖除而條網尚棄民貧未可經遠吏瀆難  
於貴功是謂守成之難宜有屬精之實幸臺網之一舉措國是

於無疑如臣才力之微勉强何及此蓋伏遇 太皇太后陛下  
德惟主善政貴日新閱風俗之情媮審詞說之忠佞知逆耳之  
利行察遜志之多非是以度越雋賢收撥微賤然臣迂愚之質  
砥礪莫加顛沛之餘衰罷日甚言之無補昔已効於諫垣文  
不達時比復塵於翰苑恩深莫塞才短奚為惟有事君之小心  
每欲終身於直道折而不屈蓋蓬蒿之自然晦而猶鳴亦鷄鳴  
之常性志効捐軀之報未知授命之辰拜伏在廷俯仰增愧

謝除御史中丞表

黃魯直

耳目之官紀綱所寄得人則百僚用憲舉枉則庶職不凝豈圖

眷求猥及孱朽中謝伏念臣師心孤陋賦性朴愚宣力三朝蝼  
蟻之心未報親逢二聖犬馬之齒既衰智已虧而見事遲才已  
拙而於用小補皂衣之缺空慙折檻之忠拜青瑣之門未有回  
天之力執銓衡無山濤之識侍帷幄無史魚之風忽被除書進  
丞執法方虞官謗更益寵驚此蓋伏遇 皇帝陛下淵默以行  
四時文明以首萬物有知人不蔽之福有念功無疆之休憐其  
後凋收置近列惟是言責艱難人才黑白分明仰恃聖心之虛  
靜米鹽細碎敢塵天聽之崇高雖自誓言終憂墮越

謝除御史中丞表

張全真

代言四掖未施翰墨之勞執法南臺復叨耳目之寄已試無狀  
拜恩有加中謝臣聞國敗由於官邪必借重於紀綱之地主聖  
然後臣直故樂聞於藥石之規茲明辟及正之初當寶祚<sub>貼</sub>危  
之際要使姦邪不起嚙如猛獸之在山淪悅無疑沛若巨魚之  
縱壑庶拾遺而補過或救溢而扶衰如臣性甚慙而不移<sub>技</sub>拔易  
窮而寡偶早從吏役久已弊於精神晚綴朝紳老不堪於憂患  
因緣遭遇冒昧<sub>殘</sub>知<sub>殘</sub>兩省之近班曾<sub>殘</sub>論思之盛更三院之  
要任但增仇怨之多倘非假寵於蓋容何以分憂於宵旰此蓋  
伏遇 皇帝陛下神心絳繹聖武布昭任賢使能以圖中興廣

覽兼聽以通群下鼎新庶政方瞻洗日之光咸受衆長俾盡回  
天之力致茲么麼亦有叨踰戒虛美之薰心敢覲容容之福利  
忠言之逆耳尚幾諤諤之昌或有効於萬分誓不辭於九殞

謝除御史中丞表

王十朋

備員左省初無論駁之勞承乏中司更誤選掄之要據非其任  
愧溢於顏中謝臣聞廷廷清明百僚咸修職業海宇又謐萬事  
皆守科條然豐亨當尚大之時顧既濟思豫防之策下情弗壅  
言路寵開責之雄峻之官列在紀綱之地訓詞申飭辨忠良姦  
佞之萌治道相閱考理義憲章之正必求智敏宜有箴規如臣

者齷齪腐儒侵尋晚節驟塵禁從每出淵衷衰疾內乘顧投閑  
而未獲寵光曲被俾執法以何堪退自省循彌增震悼悸茲蓋伏  
遇 皇帝陛下乾剛獨運離照溥臨御臣得編棧之方操術無  
膠柱之弊凡蒙驅使悉荷簡知臣敢不剖心析肝絕猜防於謗  
鑠明目張膽庶無負於猷為一言幸叔百謫寧避

丞轄

謝除尚書左丞表

歐陽永叔

大慶均行霧流而甚渥鴻恩曲被俯僂以無容 中謝伏念臣性  
質迂愚罷能淺陋言不足以備典謨之奧學不足以通治亂之

原徒以早荷兩朝之誤知拔自孤生而獎用疲駕雖勉訖無補  
於毫分歲月屢遷尤坐貪於寵祿方懼黜幽之典敢希冒進之  
榮此蓋伏遇 皇帝陛下先紹寶圖惟新聖政斷離明而大照  
推乾施以無偏致此忘庸首需渙汗臣敢不退思驚懼益勵衰  
疲感風雲際會之難依日月光華之末少圖復效莫盡夙心

謝除尚書右丞表

蘇子由

渙汗之恩已行而不友反偃倭之志雖勤而莫伸上愧鴻私下慚  
公議中謝恭惟 皇帝陛下接堯舜之統蹈成康之任仁體貌先  
正耆老之臣揀拔後來翹秀之士俛仰六載前後幾人坦然公

明故不私賢否之實穆然淵默放坐照情偽之真臨御久則鑒  
愈明得失分則下無隱如臣者西南賤士章句小儒早歲猖狂  
偶竊多聞之選中年流落既安縣戶之卑遭時乏人致仕近侍  
跌宕文墨之困囁嚅議論之場舉皆空言安有實効願惟省轄  
之重實參國論之餘豈無遺賢遽及微品地寒資淺何以望三  
事之餘光才短力疲安能裁六聯之滯論雖復黽勉就職愧歎  
何言此蓋伏遇皇帝陛下天地之仁曲成草木之陋父母之愛  
不隸子弟之非將建大廈以覆群生收衆材而無棄物然臣負  
過其力受非所容惟有潔已無私或不孤於託付引頸自助幸  
得免於顛隕不渝始終少答洪造

加職

謝除資政殿大學士表

張全真

心勞政拙宜在謹訶德厚恩深猥叨擢序採居官之薄効陞秘  
殿之隆名荐控忱詞莫回聰聽終醜顏於虛受但刻骨以知歸  
中謝竊以學士之有大名儒臣之最高選景德創制示舊弼之  
殊榮康定限員見先朝之慎簡如臣質衰蒲柳景迫桑榆無牧  
民御衆之才第知不擾有愛君憂國之意其實甚踈葺然橫草  
之勞行矣及瓜而代曩興警急莫効馳驅虜在目中料敵愧伏

波之畧錢流地上理財謝劉宴之謀僅知謹於官常期不違於德意敢圖簡眷遽沐褒遷茲蓋伏遇 皇帝陛下屬精以圖中興廣覽以收衆智謂蠻夷未免於猶夏每勸勸功故名器有時而假人靡嫌從予遂令駕方亦玷龍光仰睿訓之過優體聖心之所屬循名責實未知塵露之酌居寵思危第謹淵冰之戒臣無任

謝除資政殿大學士表

錢叅政

解繁機而宅牧重媿固功聯秘殿以升班更叨申命弗俞遜贖亟下贊書席寵過隆撫躬知惧伏念某起家平素涉世艱勤本

乏材能已絕進身之望粗安義命敢萌過分之求初無左右之容忽奉清閒之對服在朝紳之末名豈登聞遽承帝席之前語將試用旦暮獲千年之過春秋閱一紀之周力雖竭而常憂任重之不勝心雖勞而唯恐計短之不逮自虞燠曠辜此鑑知豈意超遷亟加柄用佐事樞則莫贊廟謨之大恭國論則何裨聖智之明驚歲首之頻更荷天心之善貸因遂退休之請爰推進職之恩謂其身應於政塗特爾名加於規殿滿盈惕戒態避矜從歸未定而已促於藩宣秩未終而復移於留任君之待臣者可謂至矣臣之報上者其將若何唯有惧心凜、淵冰之側但

知勤事倦，夙夜之間，分可當然。功而何有，兩郡未殫於驚力。三年再被於龍光，職司宮綸之嚴，常親地禁名錄雲霄之表。不遠天臨，尊平生而未嘗寵微，弱而特厚施，均內外春備，始終入鋪出藩，曾莫時於毫髮。昔辭公受徒，有愧於心，願伏過。皇帝陛下精鑿臣，欲博觀海宇，謂分銅虎之寄，均民社之不輕。而剖玉麟之符，在事權而尤重。矧曾參亦近密，終令綴於蓬清，頌一札以示私使，十連而增權。某敢不俯思職守，仰體春懷，塵露甚微，固何責於海岳。某前已晚終，難效於乾坤。

謝金寶政政大憲士表

毛伯穎

護羣帥於遠方，曾微善最冠諸儒。於中禁載錫，隆名循墻，雖切於固辭，出紿難回。於成命，覲顏冒寵，淪骨啣恩。中謝竊以秦隴，緝駭岷梁，疲敝宿師屯而扞寇，取民產以給軍。非卒乘輯和，則何以推勅虜之鋒，非里閭安妥，則何以供興師之後。而臣備員牧守，授任兵民，謂時乃糗糧，雖著魯侯之誓，而為之保，孰孰先尹，釋之寬徒，自竭其股肱，覬不傷其基本。曾無先効，蓋稱褒揚。此蓋伏過。皇帝陛下肅將天威，勤恤民隱，削平區宇，將大啟於帝圖，懷保黎元，每不忘於邦本。謂臣頗堅素守，久侍清光，粗供饋餉之期，不失袴襦之惠，特推醜賞，以勵微勞。臣敢不自勉。



衰疲少圖補報整軍經武豈惟德裕之雄邊和衆豐財遠稽諸  
葛之善政少補中興之功業終諧歸老之田園

謝除資政殿大學士表

王介甫

祕殿升華名城優重寵靈溢分愧懼交懷中謝竊念臣世系單  
平天姿滯固親逢大雅之會首玷秀庶廣之科勉在公優遊過  
紀被蒙眷與度越等夷省寺備官禁庭充位分無可採懼抵冒  
於憲章寸有所長使俾參於治政朴忠自信智慮罕通未盡將  
明之誠已干苛譴之典至寬之度橫貸其誅褫夫左右之聯寄  
以東南之屏敗材傷錦宜有衆多之譏增秩賜金本非平素之

望敢圖上聖復眷孤臣就徒通班改司善部惟汝陽之奧壤乃

魯服之大邦豈繫繫薄材稱是煩使此蓋伏過 尊號皇帝陛下

過臣之道於遠不忘燭物之明雖微必迨追惟躋履之舊特借  
叢雲之休竊自揣循將安報稱臣敢不激昂志尚練悉政經宣  
布紹條之寬綏安風俗之厚庶幾一得亡補萬分

謝除端明殿學兼侍讀表

蘇子瞻

哀年自引久抱此心異數併加實為非意辭不獲命愧何以堪歷  
中謝竊惟以殿命官本緣麟趾之舊因時修廢近正金華之名  
歷代所榮於今為甚自元豐之末官制以來若非身兼數器之

人未有名冠兩職之重而況秩宗之任邦禮是司豈臣迂愚所當兼領茲蓋伏遇 太皇太后陛下憂深社稷慮極安危求忠臣於愚直之中論治道於文字之外知臣難進而易退或非患失之鄙夫故授以禮樂清閑之司使專於論說琢磨之事此恩難報願輸歲月之勤度已所宜終遂江湖之請

謝除端明殿學士兼侍讀表

蘇子瞻

備員西學已愧空疎易職東班尤驚忝冒遂領宗卿之事併為儒者之榮中謝始臣之學也以適用為本而恥空言故其仕也以及民為心而慙尸祿乃者屢請治群兼乞守邊欲及殘年少

施實效而有志莫遂負愧何言今乃以文字為官常語言為職業下無所見其能否上無所考其幽明循省初心有覲面目故於拜恩之日少陳有益之言孔子曰一言可以興邦而孟子亦曰一正君而天下定昔漢文帝悅張釋之長者之言則以德化民輔成刑措之功而孝景帝入晁錯數術之語則以智馭物馴致七國之禍乃知為國安危之本祇在聽言得失之間恭惟皇帝陛下即位以來學如不及問道八年寒暑不廢講讀之官談王而不談霸言義而不言利八年之間指陳文理何啻千萬雖不然同然其要不出六事一曰慈二曰儉三曰勤四曰慎五

曰誠六曰明慈者謂好生惡殺不喜兵刑儉者謂約己省費不傷民財勤者謂躬親庶政不通聲色慎者謂畏天法祖不輕人言誠者謂推心待下不用智數明者謂專信君子不雜小人此六者皆先王之陳迹老生之常談言無新奇人所易忽譬之飲膳則為穀米羊豕雖非異味而有益於人譬之藥石則為著朮參苓雖無近效而有益於命若陛下信受此言如御飲膳如服藥石則天人自應福祿難量而臣等所學先王之道亦不為無補于世若陛下聽而不受而不信而不行如聞春禽之聲秋蟲之鳴過耳而已則臣等雖以三尺之喙日誦五車之書友不如醫卜執技之流簿書奔走之吏其為尸素死有餘誅伏願陛下覽臣言少留聖意天下幸甚

謝除右文殿脩撰表

汪彥章

入對治朝方上甘泉之計進聯書殿遽先延閣之英積此超踰若為報稱中謝伏念臣一將使指三厯歲時徒碑犬馬之勤無補消埃之數有功見知則說姑幸使令投閑乃分之宜敢圖褒叙忽被雲天之澤擢參奎壁之躔冒九等之崇資佩一時之新渥遷非以次命出于中茲蓋伏遇 皇帝陛下道本曲成治惟公聽謂勤於夙夜雖皆享上之忠非隨以賞刑孰謂知人之哲

此方歸報已辱甄收仍返故棲俾收來効入預懷訟之表著歸  
增乘傳之光輝臣敢不祗服詞訓茂宣德意益加綠飾不專俗  
吏之所為永誓縻捐庶幾古人之大節

謝除龍圖閣學士表

蘇子瞻

中禁寶儲上應奎鉞之衆先朝謨訓遠同河洛之符隸職其間  
省躬非據中謝伏念臣學非有得愚至不移雖叨過實之名卒  
無造用之器少時妄意蓋嘗有志于事功晚歲積憂但欲歸安  
於田畝屬聖明之履運荷識拔之非常有異桑榆之收遽迫犬  
馬之疾力求閑散庶免顛隲豈謂 皇帝陛下聖度包荒天慈  
委照察其才有所短不欲強置之禁嚴知其進不由人故特保  
全其終始遂加此職以責其行臣敢不仰緣末光益勵素守往  
何之而不可中無愧之為安但未死必期報塞

謝除龍圖閣直學士表

汪彥章

鋒車趣召記甘泉法從之餘芝檢疏榮陞延閣清班之首恩光  
曲被感涕交流中謝伏念臣頃以疾辭安于外補剖符方面兩  
膺南國之除持橐禁嚴四玷西清之選自守枌榆之壤屢驚蒲  
柳之秋身留閩徼之山川夢寄長安之鍾鼓所憂餘日莫陪鳴  
玉之班何意中天忽降賜環之命奔馳上道展轉逾時曾未對

於清閒已亟蒙於褒叙錫之華杖寵以神毫豈伊蹉跎之微能  
堪此蕃宣之異數茲蓋伏遇 皇帝陛下天臨萬物子視群臣  
矜孤生去國之七年抱哀疾守藩於萬里靡因人譽名李布於  
河東因受帝釐見賈生於宣室特假河圖之峻用為州紱之榮  
豈唯示眷於始終蓋欲均勞於中外臣敢不益堅晚節無媿初  
心雖宿疾未除難以筋骸之勉強然大恩必報誓於肝膽之糜  
捐

謝除敷文閣直學士表

洪景伯

宣布中和方歌盛德之事擢列侍從遽復敷文之階德雖自於

合宮恩實顯於黼座幸逾望表懼溢情溢臣 中謝伏念臣一汙  
周行三陪近著莫之致而致者盡出聖明非所據而據焉卒孤  
簡注老之既至時不重来正浮食以太優更叨名而特異過能  
自訟孰云白璧之無瑕寵至若驚不失青瑣之舊物身在江湖  
之上班聯殿閣之中人以為榮臣獨知愧茲蓋伏遇 皇帝陛  
下照臨若日溥博如天賞以馭成煥治功之綜核祭則受福章  
宗祀之光輝曾足寒蹤意曲私稟臣敢不深惟玷缺益裕激昂  
臭腐復化神奇念隆知之未報貧賤常思富貴願再命以難勝

謝除龍圖閣直學士表

汪彥章

論恩止補席寵過優蒙內史之贊書預西清之更直載猶僥冒  
宋積兢危中謝竊惟祖宗謨訓之藏上憲奎鉅圖書之象敬禁  
盈而並峙命儒學以逸居矧接鴛鴦之游尤高龍馬之迹法從  
假之而出守書生得此以為榮夫豈孱庸所能堪副此蓋伏遇  
皇帝陛下聰明稽古寅畏奉天見賢而拔其尤每兼收於群策  
撥亂而反之正分方面之顧憂雖遠清光實繁繫全度重高明之  
地帳已負於明恩踐文石之班敢遽忘於雅意

謝除顯謨閣學士表

汪彥章

蒐求載籍僅輸掌教之勞越進通班益玷承明之迹蒙隆私之

荐及悞俱小已之難勝中謝伏念臣少而嗜書老而憂國念廣記

備言之所載雖諸侯小國以尤傳豈承萬世之丕基乃缺一朝  
之信史因露章而有請蒙給札以兼收周旋雖閱於七朞綴緝  
敢忘於一日多識漢事徒竊慕於蔡續承晉書願誰推於陳壽  
豈意奏篇之瀆遽叨增秩之榮此蓋伏遇 皇帝陛下繼祚守

文奉先思孝既皇、追慕望鼎湖弓劍之還宜汲、纂修求石  
室圖書之備明詔周詢於海內遺編悉上於史官方博見聞一  
折凡例而臣夙蒙驅委遣就編摩固難追補於螭頭幸日獲臻  
於麟趾爰冒塵于乙夜俄超擢於西清仍許乃僚亦同茲賞臣

敢不誓殫樸學仰稱明恩問周穆王之詩庶無慙於子草<sup>上段</sup>  
太尉之事當更採於宗元

謝除徽猷閣待制表

蘇叔黨

起於琳館付以名邦復玷除書荐膺謀帥寵以禁嚴之職俾增  
方面之崇誤恩曲加撫躬知愧中謝伏以陳力就列臣子所以  
委贄而事君為官擇人朝廷蓋將厲世而磨鈍自昔祖宗之故  
事必由侍從而進人况內閣之華資待天下之名士掌星躔之  
寶訓近日月之清光豈特縉紳之榮實高儒學之選而臣賦材  
鄙野備問空虛福盈每懼於災生器小不堪於大用弟兄持橐

愧先後於一門銅竹請符蓋屢窮於五技獨荷淵衷之眷辱收  
閑廢之餘雨露所加乾坤莫報此蓋伏遇 皇帝陛下聖神廣  
運睿智有臨法天地之自然一道德而同俗長轡遠馭操爵祿  
以興事功左戚右賢惜名器而彰淑慝察臣之先容於左右知  
臣嘗盡瘁於使令致此恩榮下及孱陋臣敢不策其駕蹇但永  
堅於一心志在縻捐庶用酌於千載

謝除秘閣修撰表

張敬夫

臣某言先在廣西任日伏蒙聖恩除臣秘閣修撰尋具辭免奉  
聖旨不允已祇受告命者奉藩何補坐閱三年進律之褒乃蒙

再命控忱辭而莫獲拊小己以增羞中謝伏念臣鈍質無堪孤  
蹤難植備保障於遠服凜危懼之百懷惟仰恃於聖明勉自殫  
其心力班超之策但守於平陽成之書固甘于下豈期睿  
獎荐賜寵光俯矜塵坐之餘生伴隸蓬萊之高選超踰若此報  
稱謂何此蓋伏遇 皇帝陛下蒞使羣才先被四表顧未忘於  
簪履之舊尚念黯愚將示勸於牧圉之臣始從隗始榮踰華袞  
愧甚循墻臣敢不勉務朴忠仰承德意始終一節期不負於素  
懷驅馳四方敢或殫於煩使臣無任

謝除直秘閣表

晁之道

聖心念功曲軫累朝之故老德澤延世亟參內閣之華資遺烈  
載明危心增懼中謝伏念臣賦才甚下涉學未優備聞忠孝之  
風粗識君親之義每竭臣節以明父勲甘九死而不辭幸一言  
之能感蓋以先臣之遭過積勤勞於王家共惟列祖之眷懷實  
度越於羣辟昔事仁祖再登宰衡既成河朔康濟之功復啟至  
和援立之策左右英廟翼戴裕陵蓄德弗言遭時乃顯於赫元  
豐之詔大明嘉祐之勲位冠公卿名先彝鼎慶歌未遠奎畫具  
存肆蒙上聖之哀憐盡滌曩時之過咎追還恩思涇備載策書荐  
愍衰宗最為零替俯矜愚息特昇褒陞矧圖籍之所藏實英俊



之攸處豈容陋品亦玷優除此蓋伏遇 皇帝陛下睿智日昭  
聖謨天運制作之效不日有成太平之功視古無愧謂方今之  
多士患已招延惟在昔之宗臣豈忘褒顯罔間存沒均被寵靈  
臣敢不勉激激衷哀力遵先訓懷顯親之義已獲發其幽光論報  
上之忠惟有殫于死節

謝除直秘閣兼賞賜表

呂伯恭

右臣今月四日承中使李裕文宣諭聖旨所編文海精當賜銀  
絹三百疋兩者奏篇無取錫命有加既叨中秘清切切之隆復拜  
內府便蕃之賜人微恩厚感極涕零此蓋伏遇 皇帝陛下聖

學高明皇猷淵懿粲然衆作私採撫以無遺蕞爾小臣懼討論  
之不稱已逃罪戾仍被眷私抱慙惶鈔曷副右文之意賜金增  
秩徒慙稽古之榮

謝除待制表

王龜齡

臣某言某年某月某日進奏院遙到誥一道伏蒙聖恩特授朝  
奉大夫充龍圖閣待制依舊知池州臣已於當日祇受謝恩訖  
識慮蠢愚固甘遠遠斥恩慈博厚猶假小麾第深循省之思豈有  
甄收之望明給下遠遠感涕交流中謝伏念臣幼粗知書晚方入  
仕雖嗣為表之業頗慙畫餅之名挾槩磨鈔時枕藉於圖史含

香珥筆每步趨於省臺誤被簡知荐加馳策僅同駕馬之十駕  
坐致力殫未効飢鷹之一呼居然氣索扶衰上道吊影自怜竭  
來江湖之濱亦當民社之寄目昏質詎堪從事於簿書臂病  
拘行願乞身於田里遽頒宸翰俾復從官在聖度之兼容何  
孤忠之可覲茲蓋伏遇 皇帝陛下堯仁舜孝尚儉湯寬紹述  
法度而咸造厥中任用人材而各安其職憫茲孱陋示弗棄遺  
延閣通班幸列西清之巖近左符有守敢嗟南府之滯留終誓  
縻捐仰鼎覆冒

謝除勇正言待制表

王介甫

乎號明恩實由中出美官要職弗以次加知榮耀之及私顧借  
差而累國雲天在望冰炭交懷 中謝臣出於羈窮好是拙直道  
常違俗宜芻狗之致妖才不逮人何藿燭之能化 皇帝陛下  
收之末路付以繁机距滔天之衆諗責經世之來效施及賤息  
度越稠人廷登朝行使嗣講業方仰陪於燕席俄中廢於肝瀉  
雖進趨之禮久妨而問勞之恩狎至莫知報稱但負兢慙豈意  
眷憐更於趨推待制之為職以陪侍禁嚴正言之為官以諫救  
遺失承金華之舊學親色玉於燕朝併叨殊私甚駭群聽此蓋  
伏遇 皇帝陛下攬取同智無小大之遺搜剔衆材無久近之

間苟或不肖槩嘗有聞必垂甄收以示勸獎四方之訓於我無  
競維人多士之生斯時不顯亦世永惟遭值孰與等夷君臣以  
事道相求是惟希世父子以傳經見用鮮或同時雖愧臯陶濟  
美之材敢忘孤突教忠之義

謝進職因任表

張敬夫

內閣分華進其寓直介藩因任錫以贊書既莫遂於終辭凜不  
知夫所指臣某中謝伏念臣昨承人之來守領隅忽坐閱於兩  
秋亦既殫於五技所賴旁流之惠澤故慈少息於疲眊吏於其  
間謹因以免敢希誤寵何有微勞此蓋伏過 皇帝陛下以大

有為之資行不忍人之政遠通一視真傳太上之心賞罰至公  
悉聽輿人之誦惟臣不敏曷稱所蒙况聞前哲之言多畏居官  
之久非人情狃習之為慮寔已志怠忽之難防其幾弛於方寸  
之間則害及於一路之廣反復以念經營莫寧敢不履薄臨深  
益思謹於侯度庶幾積銖累寸或不玷於皇明

聖宋名賢五百家播芳大全文粹卷四下

謝表

經惟 東宮官

謝除侍講表

張敬夫

拜命中宸執經西學雖踵熙朝之故事寔為儒者之至榮莫遂  
暇辭惟深惕懼臣某中謝竊以剛健篤寔易稱多識之功緝熙光  
明詩著仔肩之義蓋典學所以建事而治國始乎修身厥惟哲  
王乃燭大本此蓋伏遇 皇帝陛下德先勤儉政用中和從善  
若轉圜每盡謙虛之道臨民如御馬居懷兢業之思念六籍之

言為百王之要範將求鴻碩與共講論願臣何人亦預茲選臣  
臣敢不朴忠自許古義是研勉殫夙夜之誠庶幾千慮倘有涓  
埃之補少答大恩臣無任

謝除侍讀表

蘇子瞻

叨承新命祇服訓詞薄技已窮舊恩未替中謝伏念臣志大而  
才短論迂而性剛以自用不回之心處衆人必爭之地不早退  
縮安能保全是以前年翰墨之林屢遭飛語再歲江湖之上粗  
免煩言豈此身愚智之殊蓋所居閑劇之致臣之自處何者為  
宜而況講讀之司惟幄最近分章擡句則何以報非常之知因

事獻言則又必貽前日之患雖仰恃天日之照實常負水淵之  
虞共惟 皇帝陛下大德庇民小心順帝雖天覆地載以聖不  
可知為神而日就月將以學而不厭為智曲收舊物以廣多聞  
臣敢不職思其憂本無分於中外欲報之德誓不易於死生

謝除侍讀表

汪彥章

視草禁嚴論經問燕兼近侍進言之責極儒臣稽古之榮拜命  
以還撫躬而懼中謝嘗謂天縱將聖奚煩博學以成名王求多  
聞蓋欲取人而為善故自古右文之世必留心講藝之官如臣  
至愚何所云補苴蓋伏遇 皇帝陛下卓然上智濟以克勤同

漢祖之英論道不忘於息馬笑齊侯之陋讀書見議於斲輪而  
臣猥以非才膺茲遴選第竭簡編之素習仰承帷幄之清光海  
岳深崇固無取消埃之細聖賢聞見或不如農馬之專誓絕故  
欺用竊知遇

謝除翰林兼侍讀表

蘇子瞻

學術本疎老復加於審納官聯迥近職專在于討論退省其愚  
莫知所措中謝伏以天威咫尺頃末技以何施聖敬日躋豈群  
臣之可望非張禹寬中之篤學無量懷素之懿文則何以奉天  
子五學之游求玉人多聞之益如臣愚暗何與選掄此蓋伏遇

皇帝陛下卓然生知輔以好學方高宗恭默之後正宣帝勵精  
之初衆論並陳志洞照其情偽陳編一覽已周知於廢興察臣  
衰病而無求庶可親近而寡過故茲拔用驟及疲駑臣敢不溫  
故知新粗辦有司之職見危致命更輸異日之忠

謝除太子賓客表

汪彥章

儲闈肇啟當收尤異之才詔綽中頌頌首玷高華之秩既預論思  
之祕仍參調護之榮承命使藩撫躬跼蹐中謝伏以三王之教  
世子必用正人兩漢之詔官僚無非碩學矧在賓延之列尤為  
儒者之光方朝廷新曠古之儀俾世嫡正前星之位養德茲始

求賢實艱尚虛六傳之睽先遴十人之選如臣庸淺非國俊髦  
司典謨訓誥之文猶孤眷倚豈父子君臣之道能有建明弗獲  
固辭終慙非據此蓋伏遇 皇帝陛下紹隆邦本因任人才謂  
臣久侍禁林最為孤直知臣日承聖學粗識源流故此褒嘉輕  
於畀付入奉螯山之直出參學禁之遊夫何一介之微兼此兩  
闈之滄古今鮮儷中外惟傳臣敢不益懋嘉猷誓堅晚節密為  
羽翼當如園綺之賢徒事文辭敢效應劉之陋

封爵

謝特授儀同封舒國公表

王介甫

發號端門外覃慶賜疏恩列辟俯逮空餐舞手均歡捫心獨幸  
中謝伏念臣久孤眷過當即謫訶曠歲籲天尚辭榮而未獲新  
恩賜國仍席寵以有加唯茲邦土之名自昔宦游之壤久陶聖  
化非復魯僖之所懲積習仁風乃嘗朱邑之見愛鴻私所被朽  
質更榮此蓋伏遇 皇帝陛下道冒群才彌天之所畏恩涵庶  
品并物之所包以釐事備於郊官而惠澤均於海宇故雖幽屏  
弗以遐遺願冒昧之不賞費豈糜捐之可報

謝特進封制國表

宮庭嘉享推德惠以及人田里空餐濫宸恩而累國臣中謝伏

念臣若窳賤質卷曲散材遭直休辰登備貴器有未償之厚責  
無可錄之微勞敢冀瘵身尚以微數此盖伏過 皇帝陛下備  
成熙事答四表之歡心董正治官建一代之明制因令疲繭與  
被光榮雖自誓於靡捐顧何疇於責疇臣無任

謝加食邑表

王介甫

顯相郊宮固宜寵獎曠居田里乃濫褒加臣 中謝 伏念臣尚負宿病夙榮  
祿無可論之薄效有未報之隆恩方國明禋庶正祇載奉璋執豆旅幣  
獻琛具輸奔走之勞獨抱滯留之歎豈圖踈迹亦冒寵光此盖伏過 皇  
帝陛下荷休駿寵欽福敷錫故雖幽屏弗以遐遺每身每被於慈憐心敢勞於勤策

謝封延安郡王表 代皇子

曾子固

祇膺詔板彌積覲顏盖崇太於宗藩以盛強於帝室豈伊獎渥  
可假幼冲 中謝 伏念臣器匪夙成材無特異徒歸祇於鞠育每  
親炙於高明欲善在身忘髧髦之至弱知書可學慕佔俾之相  
從庶由受教於童蒙覲獲成能於壯大敢意攬攸司之密啟循  
歷世之奕章寵以官儀體均於承弼殊其爵列秩右於公侯揣  
稱何堪踰涯已甚知隆名之難冒迫大號之既行控避莫從震  
惶滋集此盖伏過 皇帝陛下心潛高厚智極精微推廣愛之  
仁以隆於父子盡大公之義以篤於君臣故舊典之當行雖至



親而莫間致茲異數猥及謏能臣敢不仰體聖懷勤遵慈訓省躬擇術庶不蹈於匪彛臨事知方或可收於近用

謝除觀察使嘉國公表

冠裳就列甫與於人倫綸綽恩驟膺於殊渥撫躬莫稱拜命知榮臣中謝伏念臣託體天支分暉寶系生育長嶽慶幸集於重闈倥侗顛蒙學未通于一藝粗習勝衣之拜適當可冠之年誤辱慈憐驟加褒擢廉車置使實參從橐之華公社分封庸非宗藩之勢雖循舊典允謂隆私茲蓋伏遇 皇帝陛下治本親親仁先幼幼受祉而施孫子既大本根立愛而始邦家不遺支庶故茲辱陋有此超踰臣敢不祇佩訓辭益修業履有猷有守率惟規矩之循惟孝惟忠仰答乾坤之造

帥座

謝除安撫表

蘇子瞻

兵民重寄本倒屣以折衝疆場久安但坐嘯而畫諾才微祿厚恩重命輕中謝伏念臣一去闕庭三換符竹坐席未暖名節已行筋力疲於往來日月逝於道路未經周歲復典兩曹朝廷非不用臣愚忝自不安位所宜竄逐更冒寵榮此蓋伏遇 皇帝陛下離明中正乾健獨運<sup>健</sup>述<sup>述</sup>東朝之遺意收此散材眷言西

學之舊臣付之善地致此哀朽尚未棄捐臣敢不勤邱民勞密  
脩邊備苟無大過以及暮年漸還魚鳥之鄉以畢桑榆之景

謝除安撫表

宋子京

越從開佐超搃藩垣撫綏列邦領護諸將軍符參擁使紱交華  
恩踰望端慙結情外中謝伏念臣命兼材薄志與年衰自忝從  
官久陪輕幄名崇而實難副譽就而毀輒隨蓋黨士護前則見  
排夸人艷利則相軋奔湍薄者堆岸獨摧寧弓睨林孤翅先墮  
是以褫近職者一典守麾者三心餘故憂謀失新勇方將收跡  
華要之路乞身棲偃之場頌業斯文力誦聖德刻金石以垂美

薄天壤而無慙何圖至仁過聽亡狀謂老則閱事衆是宜守適  
憂則慮事深可使從政遂付師律俾扞塞屯過闕許朝臨遣加  
秩又况常國奧壤全趙舊封地饒財貨人尚武力技擊踴疆者  
三萬浚隍峭堞者六州介在山東隱若天限竊循僞怯有忝俞  
咨此蓋伏過 皇帝陛下道推曲成義不煩在善護所短莫責  
有能內憂製錦之傷揚成流汗之熱再念儒者之學本勞而少  
功數竒之人恐不得所欲且言虎者三而成惑拔揚者一乃有  
餘釜鼎中隔則寸熯沸水舟楫先容則枯枿蒙器伏望陛下念  
臣身遠於寡察臣徇公絕私寧無中傷必賜明辯臣亦夙夜自

傲美醜必陳同士甘辛求民濟瘼詢微郭之曲折繕器械於屏  
完粗修厥官申報而國侍前方阻叨臆何宣

謝除安撫表

閻蒼舒

河圖次對超陞六閣之先天漢上游申任十連之寄乾坤恩大  
絲髮命輕臣中謝伏念臣夙以散材濫居冗從奉身以退既絕  
望於明時去國而來亦濫叨於煩使遂州城外小惠巴人韓信  
壇前來施秦策雖自強其志即終無補於功名而福過延災且  
年侵嬰疾頽嵇康之多難懷七不堪念孔戡之已哀負二宜去  
方力祈於閑寂乃復被於寵靈奎璧文章增重西清之首山河

錦繡載臨南鄭之區自省孱微若為報稱此蓋伏過 皇帝陸

下天臨九有子視群工俯矜跼履之餘無循復門之人故尚加  
於明試示未底於棄遺願披羊千仞之登蓋已難矣况鈇刀一  
割而鈍其可再乎威命莫回危蹤知惧臣敢不益扶綿力深激  
懦衷實實親萬楹棲一心而灑濯金城千里祈九死以糜捐於是  
丐歸終期得請

謝除安撫表

沈樞密

假守上游初無善狀陞華以對忽拜詔恩循牆鼎獲於懇辭出  
綽游勤於申命幸踰望表感溢情涯臣中謝竊以聯六閣之嚴

均為清逸列四松之邃榮綴從班載惟名數之優蓋獎勞能之  
異授之不至於濫得者真以為榮臣學術迂踈性資方拙偶值  
休明之運蚤蒙特達之知中外踐更莫非親擢始終全護盡出  
眷私昨從祠館之投閑自分勞逸之絕望旋蒙軫記俾預使令  
起之田野之中付以承宣之寄東加二載曾乏治聲鄂渚一麾  
繼叨選任竭來庀職行且及期適承彫弊之餘幸遭曠瘼之戾  
雲屯萬旅肅營壘以無誑基布四民安井閭而自樂茲乃皇明  
之遠暨遂令德意之具孚而臣且無避責之嫌屬在引年之日  
亦既露歸休之請其敢萌僥進之心何期寵靈橫逮孤遠煥清

廂之新秩復榮辱之舊賞豈惟朽質之增華頓覺名城之改觀  
茲蓋恭遇 皇帝陛下聰明燭於萬微而隆寬盡下威德加於  
九有而內恕及人謂老馬有辨道之能而遺簪無在原之棄有  
如駕鈍亦被龍光臣敢不益勵素心更堅晚節雖桑榆已逼愧  
補報之無聞苟溝壑未填誓糜捐而後已

謝除安撫表

潘時

海嶠守藩寂無治狀星皇沙謀帥遽玷除書躡升內閣之華墳貴  
中權之重恩深責厚感極涕零臣族系單平吏能謏薄置身冗  
散而無適時應用之才遭世聖明妄有趨事赴功之志誤蒙差

擇浸被使令自一領於州麾因屢叨於使節頓首平反之寄屏繼  
分屏身翰之憂地大物繁疲精神於歲月年侵疾至驚性命於煙  
嵐亟籲天而乞憐遷易地以疏寵乃眷三湘之都會嘗馳六轡  
而咨詢課昔日之澄清已窮末技枝數當年之收守莫匪名流控  
辭幾罄於循牆成命難回於出綽此蓋伏遇 皇帝陛下仁均  
覆燾明並照臨臂指四方如在行畿之近甄陶羣吏尤嚴制閭  
之除知臣粗歷於險難察臣匪由於虛偽用全枯朽改界便安  
臣敢不勉策衰殘仰當委任方早嘆軫九重之念未遂投閑使  
愁嘆有一飽之歡終期得請倘苟存於朝夕尚圖報於涓吏

大尹 都督

謝除開封尹表

汪彥章

恩錫絲綸忽從中出任隆輦轂不以次遷舉萬方輻湊之區付  
一介顯愚之士身雖甚寵力恐難勝中謝伏念臣生本寒鄉出  
陪多士少從師學僅知儒墨之是非長佩官箴安識求由之果  
藝徒以昔參於儲禁斐然長奉於版解緣此孤蹤簡於聖聽逮  
自江湖之遠來瞻日月之光裁奉燕閒即蒙褒擢俾佐銓衡之  
任初無根柢之容曾未逾時復叨進秩唯三輔幅員之大萃四  
民囊橐之姦必發摘如神方勝鉛筭之說苟拊循非術能無梓

鼓之驚誰謂鯁生可當器使茲蓋伏過 皇帝陛下留精治術  
端本京師欲令張敞之春秋稍施於政故試望之於馮翊非有  
所聞而臣自慙仕途未更吏治一旦任劇煩之職衆人為綿簿  
之憂臣敢不用恕平反以文緣飾為四方之極庶幾無愧於商  
詩從一切之宜未肯追蹤於漢吏

謝除都督江淮軍馬表

張德遠

賜斧專征蓋求人望揚庭乎號誰料臣愚控避無從省循知懼  
中謝伏念臣天資任已衆謂寡謀趙北燕南雖愧風聲之慷慨  
吳頭楚尾粗更牧圉之周旋無憐拊解之憂消自覺據鞍之已

老壯心徒在綿力既愆當國家多事之時值神聖有為之主人  
思奮厲臣肯懷安所虞荐康歎於鼎鼐之陳必有駕鳴鳩於霄  
漢之誦奪乘何惟辱命為憂自承制誥之頒未省聽聞之誤磨  
鉛策蹇夙夜以思食蘖飲冰進退維谷茲蓋伏過 皇帝陛下  
臨朝獨斷立賢無方謂臣結髮於邊陲粗識三軍之情偽察臣  
致身於公傳必同一體之戚休起自居里俾承人之臣敢不激  
昂晚景報稱殊知趙將軍八九十而習恙情願罄老臣之肺腑  
漢天子十八萬而建武節會來醜虜之梯航

漕使

謝除成都轉運表

唐子西

嶺表觀風已慚治効坤維按漕復玷寵靈引組知榮撫襟增恤  
中謝伏念臣單平冷系迂暗常才雖懷許國之孤忠非有過人  
之奇節偶緣冗官被過先皇擢任監察猥承人之出分使指益  
愧食浮纒自脫於殿刑葭可書之最目謬膺渙渥重忝皇華胤  
能已盡于五窮鈔刃何堪於再割鴻恩未報俄驚倦鼎之成漚  
哲肇興尚念遺簪之舊遂容尸素未即弃捐此盖伏遇 皇帝  
陛下至健行天大明出震開並採兼收之路隆太平極治之基  
致此冥頑類蒙委寄粹表未瞻於天日狂私已佩于丘山敢不  
續短俾長勉禍為福正登車興嘆雖微益博之才叱馭遂行姑  
勵王尊之節錙銖可効糜粉為期

謝除轉運副使表

耿秉

拜命起家甫朝祥於東魯疏恩乘傳再日覲於長安委寄益隆  
報塞難稱臣 中謝伏念臣愚不適用拙無所長識至淺而惟知  
勿欺學甚疎而所期不負一行作吏三十年奔走之勞屢試罔  
功十二任勲庸何有方素解下釋之始辱皇華再遣之榮精神  
不逮於七載之前覺馬齒之加長神親未復於踰月之後知鼠  
技之易窮深慚衰朽之資曷副劇繁之任茲盖伏遇 皇帝陛

下既文發政以堯治民萬國欲得其驩心蓋天子之孝也四海  
務形於廣愛雖聖人莫加焉常思天下之澄清必重閔中之根本  
操心慮患愛有取於孤臣祭俗觀風俾復還於舊觀臣敢不明  
目張膽竭力一心舉廉刺貪不憚煩於收數興利除害將熟復  
以條陳

提刑 茶馬

謝除提刑表

邵公濟

走郡分符已慙善政明時持節濫撫祥刑被寵以驚省躬知愧  
中謝伏念臣資惟極陋數則多奇在昔先臣再被裏輪之召至

於晚進亦叨勸駕以行國史載隱逸之名鄉書上經行之選實  
惟一門之盛事蓋出三朝之異恩獨不免於窮途悵虛逢於昭  
代欲遂桂冠之願未耐結綬之心豈期流落之餘偶被使令之  
未惟西蜀忠厚之俗有東魯絃誦之風願此齊民之浩穰皆自  
累聖之涵養山川秀麗初無犬吠之虞囹圄空虛不待鷄鳴之  
赦欲持平於邦憲宜精擇於司存豈容下才輒膺重任茲蓋伏  
過 皇帝陛下體天地之覆載並日月之照臨刑無用於三千囚  
自歸於四百欲兼容於群聽致誤采於虛名蓋本哀矜遠方豈  
獨矜憐小已推仁心以及物尚憐穀觫之牛將德意以遣臣敢



憚虺隤之馬臣謹當佩服溫厚之典詔奉行寬大之書聞禮  
傳家粗有志於他日引經斷獄更盡力於此時

謝除提刑表

周頤

給餉重湖深負罔功之愧總刑東浙復叨非據之勞弱質奚堪  
隆私莫報臣中謝竊以好生乃天地之大德措刑為帝王之極  
功得情亦尚於哀矜治獄務先於寬恕惟必有勝殘去殺之善  
庶能全仁民愛物之心始稱選掄不孤任使伏念臣才非可用  
惟本至昏且質直以無文惟介僻而自守捨去津宮之閑冷不  
辭蜀道之艱難萬里東歸徒抱孤忠之憤九重兼聽靡容片善

之遺誤被簡知濫叨獎拔分符剖竹何補郡條煮海搗山曷裨  
國計嗟繆庸之無取以瘵曠而是虞豈謂遭逢亟蒙收召郎省  
積空食之嫌宰司增貶歲之羞迹微而素志迂踈身老而舊學  
荒落方仲更迭之請畀以轉輸之權退念五載之僥逾尚之一  
毫之稱塞矧惟憂顧莫重平及反要當君子之盡心庶俾有司之  
不犯無訟詳陳於魯訓棊彙備載於周書如臣之愚豈任其責  
茲蓋伏過 皇帝陛下體元而居正圖大而宅中發漢號以誕  
施擴離明而繼照開一世以自新之路涵萬物以如春之仁凡  
云尺寸之微盡入範圍之內察臣朴實而近厚知臣奔走之忘

勞不忍弃捐曲加甄錄臣敢不奉行寬大深體訓辭更圖圖皆  
空廣聖君欽恤之意雖衣冠不畫躋斯民仁壽之途

謝除江東提刑表

汪彥章

壺方久次忽蒙恩詔之頒使節內遷仍獲鄉邦之便蓋始望未  
嘗及此雖自謀何以過之人知從欲以為榮臣獨感恩而至泣  
中謝伏念臣早緣孤直叨備使令雖才疎屢至於顛濟然事白  
即蒙於超擢頃駕一朝之傳深行五嶺之區眷言風土之異宜  
常恐庭闈之動念既云盡瘁敢復圖安嘗中被於褒陞亦寢忘  
於留滯豈期私計之上達不待終更而北還千里繡衣初入中

原之郡縣雙親白髮重瞻故國之江山遂令忠孝之兩全何止  
平反之笑仰視必恭之粹旁連聽訟之棠茲蓋伏過 皇帝陛  
下衆建人材恢張治具薄海內外而並照其智如神因時輕重  
而制宜以刑為勸欲廣哀矜之意必求忠信之人謂臣素習於  
民情知臣粗安於名節特指茲寵俾効厥官臣敢不奔走十城  
奉行三尺勤於夙夜盡人臣欲報之忠同我州閭樂陛下好生  
之德

謝提刑落發遣字表

晁之道

遭時陳力未書可紀之勞積日計資更冒論功之寵戴恩逾厚

撫已增慙中謝伏念臣涉道未深受才甚下固未識聖賢之所  
學亦粗知忠義之可為府幕郎曹被奉陵之知獎卿聯使寄皆  
陛下之選除勉自激昂乃期奮起雖慙駑蹇迄無實誠之能但  
閱歲時彌有空食之惧豈圖恩渥均逮頑冥此蓋伏過 皇帝  
陛下政本禹勤道稽堯哲衡聽以熙庶事器使而効衆材致此  
羈孤荐叨秩叙布宣德意益殫犬馬之勞趣赴事功少答乾坤  
之造

提舉

謝除提舉表代

汪彥章

龜勉郡丞方虞官謗阜通邦貨忽領使華蒙眷獎之過優撫危  
躬而若厲中謝伏念臣受材庸淺遭世盛明由詩書誤綴於末  
科行州縣沒成於華髮分投閑冗無復激昂孰云蒐擇之辰亦  
在鞭馭之數惟山海憇遷之利實朝廷開闔之權吏或不度法  
因以廢故比下丁寧之詔至重分刺舉之官宜得時髦執此如  
金石之固坐令國用沛然若丘山之多大懼孤蹤莫勝煩使此  
蓋伏過 皇帝陛下恢張治具駕馭人郡察萬貨之低昂為之  
調度因百官之能否責以事功謂臣從事之有年疑臣理財之  
知要特假道塗之便使趨期會之嚴臣敢不上體綸言肅驅軫

傳編行所部並大江千里之餘庶得其贏佐少府萬分之一

謝除江東提舉表

謝深甫

推行荒政繇祇奉於詔條寵被優恩遽濫陞於官簿微勞莫効  
大懼弗勝臣中謝竊以將命九重備使一道惟先疾苦之間以  
廣德意之孚矧專欽散而是司宜視凶攘而唯謹當大飢發大  
熟之蓄職思其憂無小言望小利之酌賞過於僭諒茲疏寵借  
以勸功伏念臣奮自寒生久安下仕頃叨賜對誤蒙宸展之知  
旋沐褒遷猥廁廷紳之末僅再更於歲序凡三冒於親除俾以  
乘軺驟玷皇華之造及於地檐偶罹雲漢之裁歲既不登人方

告病受牛羊而與牧其責誰歸集鴻雁之于飛雖勞敢憚振倉  
廩之貸予編原隍以馳驅與上寬焦勞之憂期下無轉徙之患  
幸時還定故民咸安其居賴國威靈在臣何力之有茲蓋伏遇  
皇帝陛下德恢天覆澤沛海涵發政施仁每必先于四者薄征  
散利尤用聚於萬民凋瘵既瘳豐登已兆尚念布宣之無壅曲  
示褒獎之有加臣敢不深省僥踰勉圖稱塞取有餘而補不足  
廣克湯備具之儲務實惠而去虛名助文景安養之政

謝除湖南學事表

胡文定

誤拜綸恩復將使指按臨舊部祇奉新書中謝命鄉里而賓賢

能是謂成周之法謹庠序而申孝悌嘗聞孟子之言流風既遠而莫傳陳論益卑而無取聖由天縱道與世升州增訓秩之官路造光華之使藻芹可采金玉其相適慮冗員肆頌中旨恐郡縣困文移之末暫廢司存念校學真平治之原亟仍舊貫再出惟行之令蕪收已試之才有若庸虛居然忝冒此蓋伏遇 皇帝陛下憲章古昔紹述熙豐永惟繼志之遠猷莫急化民之先務人歸善養能以道觀遂令踈逖之蹤同預策磨之列臣敢不致虔觀復克己為仁虔心弗間於顯微奉法務張於廉恥諸儒駕說必明忠孝之大端青佩嗣音無習文章之小技

謝除茶馬表

楊輔

仰稔命召大懼深何俯拜俞音冒將隆指增重司存之寄躡升寵秩之名恩踰丘山感鏤肌骨臣中謝伏念臣頃充員於館職首待罪於官庠時瞻清光退竊榮遇旋叨郡齋即去闕庭將輸未決於戍期因任游承於閩寄閱楚祠之雷蟄再聞已周相禁避之雲深孤蹤何有肆壽皇之收召逮陛下之纂承在於葵藿之誠敢徇衡茅之志然臣數竒難偶意外多虞迫危厲之薰心控忱忱而滙懇攀鱗望遠空懷門角之思前席釐殘甘滯周南之迹雖駭覆舟之變實干俟駕之誅豈謂洪私尚矜舊物矜其

涼薄借以寵光俾司蜀漢之權征兼搃差戎之互市恩加進職  
遣視乘軺顧舊欲既懼於靡任而僥倖則踰於始望茲蓋伏遇  
皇帝陛下仁天初覆聖澤旁流簡搜首逮於薦紳收拾不遺於  
墜履謂屬離明之繼照孰不傾心察其坎險之在前義容知止  
姑從煩使康示曲全若其所讓之官頗謂難勝之任將釐積弊  
宜得通才使之冒處於家難恐必上辜於器使飲冰祇命毀瓦  
慙功臣敢不夙夜以思思馳驅惟力政爾敗官而獲謹固分所甘  
如其枉道以求全蓋知所擇

聖宋名賢五百家播芳大全文粹卷五上

謝表

太守

謝除知江寧表

王介甫

稽違詔令經涉歲時先帝登遐既不獲奔馳道路陛下即位又未嘗瞻望闕庭所憂後至之誅刑敢冀就如於官使雖知黽勉尚懼顛躓臣某中謝蓋聞因任以責群材原心以通衆志厥或抱能而可用則雖負疾而見容如臣者逮待先朝叨官外制愧倦許國雖有愚忠役役隨人但尸榮祿御哀去位嬰疹彌年望

絕龍光分投冗散伏遇 皇帝陛下紹膺尊極俯燭幽微延之  
以三節之嚴付之以十城之重比緣禋祀特有褒封申命曲加  
因郵併賜唯是士風之美素無犴獄之煩久寄託於丘墳粗諳  
知其間里念雖閉閣殆弗廢於承流以比造朝或未妨於遠疾  
矧恩勤之已迫且遜避之不容敢不少嘗勦力之所任祇奉詔  
條而為治冀逃大戾仰禱殊私

謝除知鎮江表

汪彥章

起廢江湖甫三周於歲籥疏榮觀闕凡四易於州麾嗟治狀之  
無辱聞除書之屢至人微責重天大恩深伏念臣積冒寵榮浸

成衰朽咸謂陳人之安用獨蒙聖主之不忘念嘗陪扈於初年  
未忍弃捐於中道適當盛際徧歷名藩深行百粵之區遠薄三  
吳之境茲蓋伏遇 皇帝陛下屬精求治虛已受言擇循良共  
理之人先憫幅無華之吏故如臣等亦在選中臣敢不共布詔  
條具其宣德意坐攬淮山之形勝深究古今心如江水之朝宗靡  
忘夙夜

謝除知青州表

歐陽永叔

掌國五兵叨進中臺之秩宣風一面俾綏東土之人祇荷寵靈  
徒知隕越中謝伏念臣學非通敏材實空疎幸逢千載之休明



誤被三朝之獎擢久陪法從嘗與政機國恩未報而身已先衰  
世塗可畏而命亦多蹇頓緣災疾遂決退休敢期上惻於皇慈  
未忍據捐於舊物而復過推優渥以慰癯殘惟孤拙之無堪蹈  
艱虞而已甚世之所榮者臣之所惧人以為寵者臣以為憂是  
敢輒殫悃幅之誠累黷高明之聽迫于危慮固避煩辭而聖度  
并容寬其罪戾恩言屢降譬以丁寧知成命之難回勉覲顏而  
祇受而况全齊舊壤負海奧區民俗富完而墾井耕田各安其  
業詔條寬大而奉法守職是以修官內省庸虛奚勝忝幸此蓋  
伏遇 皇帝陛下日新求治天覆推仁謂簪履雖為于賤微尚  
堪收錄而犬馬苟豐於奉養猶可使令臣敢不策勵疲羸勤思  
夙夜庶期盡瘁少荅鴻私

謝除知忠州表

楊紱

圭窬屏跡已甘四壁之空玉陛疏恩遽錫一麾之寵雖元化不  
遺於微小而大明必照於幽深跼地莫遑戴天有感中謝伏念  
臣性姿朴陋才識凡庸謬叨世賞之延獲綴官聯之末窮邊絕  
塞奔走一生沐雨栴風辛勤萬狀固低回之已久必操守之弗  
渝但知潔已以奉公惟務愛民而束吏未嘗枉道將以徇人任  
勢利之見咄豈君親之忠負自安有命皆付無心四宰縣封精

力盡於此矣兩丞郡政艱難皆備嘗之身雖困而志益堅家雖  
貧而節愈厲方厄窮於蝸舍敢妄意於虎符矧此南賓控夫石  
蜀儼唐臣之前烈枕夔子之上流仰壽皇拔擢之公逢聖主繼  
承之盛乃捐重寄以畀下愚茲蓋伏遇 皇帝陛下祇服禹功  
欽承舜德本一道以相守爰奉詔謀資共理之惟良用安遠服  
致令踈賤誤玷選掄臣敢不恪守孤忠仰冀洪造豈止躡四賢  
之後無覩面顏庶幾舉三峽之間咸歌德意

謝除知青州表

蘇子由

守土無功曠官是懼成命既出懇避無由 中謝伏念臣儒術空

踈吏能淺薄早蒙選擢屢典方州中被寵光荐歷臺省懷樸忠  
而不顧勵勤拙以自將然自違去中朝流落外補首尾經八年  
之久左右無一人之容自分衰朽之餘無復甄升之望頃緣乏  
使再上別京獲覩日月之光親聞金石之訓粗陳本末方慙尸  
之才俯念孤平尚有驅策之意自違天闕曾未暮年並升侍從  
之容仍分旌鉞之寄鴻恩自至莫知其由此蓋伏遇 皇帝陛  
下天地兼容陶鈞獨運識馮唐於郎省但取一言寘汲黯於淮  
陽未忘舊物恩深不報期銘骨以終身才拙自知誓見危而一  
節啣命東往誠心內馳

謝除知遂寧府表

宇文价

高官厚祿無補論思重鎮隆名尚令叨竊特煥宸奎之賜俾為  
畫繡之榮眷過非常糜捐莫報臣中謝伏念臣賦才謏薄為學  
空疎起自冷官濫陪朝著圖壇前導清問下及於姓名選德對  
揚玉音有取於人物由茲親推疊冒恩除曾未數年編登兩省  
內省空食之愧日懷負乘之憂至於長戎部而侍經惟以儀曹  
而兼鹵簿惟蘓軼還朝之日盡歷厥官而小臣去國之時併盡  
其職自知非據理合投閑載惟從欲之仁俾遂丐歸之志矧茲  
武位望重潛藩甲兵兼總於五州節鎮素雄於方面昔三年學

嘗分教於諸生今一星終復提封於千里風俗熟知其易治士  
民亦得以相安雖自為謀莫過於此茲蓋伏遇 皇帝陛下勵  
精圖治虛已納言合四海以為家視群臣而若子知臣未諳於  
民事第有空言察臣素短於吏能責其未效臣敢不祇奉丁寧  
之訓具宣寬大之恩備數西清實近天威之咫尺究心職事敢  
忘聖語之褒嘉

謝除知亳州表

歐陽永叔

貳政非材雖獲奉身而退分符善地猶懷竊祿之慙祇荷寵靈  
惟知戰懼中謝伏念臣章句腐儒之學也豈足經邦斗筭小器

之量也寧堪大用而叨塵二府首尾八年荷三朝之誤知罄一  
心而盡瘁若乃樞機宜慎而見事輒言陷穽當前而橫身不避  
竊尋前載未有能全一昨怨出仇家構為死禍造謗於下者初  
若含沙之射影但期陰以中人宣言於庭者遂肆鳴梟之惡音  
孰不聞而掩耳賴聖神<sup>賴</sup>之在上廊日月之至明悉究罔誣遂投讒  
賊再念臣性實甚愚而踈於接物事多輕信者蓋以至誠如彼  
匪人失於泛愛平居握手惟期道義之交迺<sup>世</sup>譽當朝常舌齒牙  
之論而未乾荐稱之墨已彎射羿之弓知士其難世必以臣為  
戒常情共惡人將不食其餘而臣與遊既昧於擇賢在滿不思

於將復自貽禍害幾至顛濟上煩睿聖之保全得完名節於終  
始泊懇還於重任尤深惻於皇慈雖避寵辭隆僅能去位而清  
資顯秩愈更叨榮莫逃僥倖之譏實負厚顏之覲斯蓋伏遇皇  
帝陛下乾坤大度堯舜至仁察臣自取於怨仇本由孤直憫臣  
力難於辯雪蓋迫夜殘既獲免於非辜仍曲從於私欲遂同萬  
物俾無失所之嗟未盡餘生敢忘必報之効

謝除右文殿修撰知通州表

胡文定

六押分曹濫預西臺之末議一麾出守許頌東郡之寬條祈開  
屢瀆於冕旒從欲漸依於丘壑俯慙羈陋仰戴睿慈中謝伏念

臣初乏智能但懷忠信逢辰熙洽亦有意於功名就仕迴環乃自循於分義惜年光之冉；戒心事之營；倚嶠望雲視身猶愧臨流觀水閱世何求誤蒙特達之知亦預招延之列記螭物之丹牘曾靡崇朝掌鳳閣之絲綸遽膺明命事君者必本於直道知己者難徇於私情矧居侍從之班敢廢論思之職所志雖期於補報出言多失於迂愚尚沐恩思獲叨民社此蓋伏遇皇帝陛下德侔天大明並日中親賢否以同仁均顯微而必照欲求忠謹與掩疵瑕肆塵論撰之資更責循良之效臣敢不益思為善務在守身迹雖迫於孤危心豈分於中外海邦千里敢

安魚稻之居魏闕九重徒結鼓鍾之戀

謝除知太平州表

洪邁

一麾出守方切兢危三命益恭弗容控避仰皇天之大造扣丹地以何言臣中謝伏惟 皇帝陛下睿智有臨神武不殺慕舜之孝見堯於墻德冠古今而獨尊仁並清寧而徧覆明見萬里將大混於車書子來庶民更精求於岳牧臣家本儒素時無令名濫叨寵博之科說駕清華之地瀛山抱槩郎省握蘭在紹興之末年污記註於古史伏遇 皇帝陛下龍飛應運鳳紀祥不遺細微兼取愚鈍遂以詞翰之職獲侍清閒之歡雖夙夜應

仙許暫來於天上而塵志未斷旋即墮於人間一去十八年之  
中三叨二千石之寄未絲金華郡還細石室書從珍臺間館之  
遊勸廣廈細旃之講真拜學士號名私人受九重知己之殊極  
三八承明之幸使與大義不專斯文而臣弱羽不足以當雄風  
蹇步不足以勝重任上恩惜於終弃左將寵其餘生李廣數奇  
徒羨侯於校尉汲黯妄發敢嘆薄於淮陽臣即以今月二十八  
日到任上訖伏以郡在江東昔稱道院地隣淮右今謂壯藩謹  
當宣布恩威奉行寬大求民之瘼問俗所宜緩帶輕裘雖弗賢  
長城於李勣清心省事敢不避正堂於蓋公庶幾固結本根少  
復報酬知過

謝除知襄陽府表

吳 琚

四品綴班濫次西清之對十連謀帥誤分北顧之憂揆日臨民  
望雲祇命臣中謝伏念臣才非適用生偶逢時星使驅馳絲毫  
無補月卿超躡綿薄奚堪荷壽皇四牡拊勞之恩姑使內朝而  
通籍值聖主六龍奮飛之會故慚從列以偷安詎謂鴻私付之  
劇任眷言峴首為今國雖大將重兵之分屯長江平陸之衝要  
昔 羊祜之名德唯能懷敵故能安邊如孔明之奇才不先謀  
人每光治已得人若此制閫不難畀以非宜受之實懼茲蓋伏

遇 皇帝陛下剛健中正文思聰明地闢天開聖人作而萬物  
覩風行雷厲元首起而百工熙至求疆場之臣尤重蕃宣之寄  
顧如臣者蚤受眷知方聞命而即行擬控辭而不可威顏咫尺  
臨遣甚優 訓誥溫純丁寧曲盡臣敢不博詢民隱者定戎  
昭齊其政不易其宜當布周南之風化備其虞謹守其一務綏  
禹甸之山川

謝除知舒州表

趙彥丞

上斬水之更書三周歲籥昇桐鄉之新組再剖州符祇荷恩深  
倍深兢惕臣中謝伏念臣才非適用識昧通方少本無於宦情

老粗諳於世故徒以夙暎屬籍蚤列荐紳奔走期會之煩僅逃  
曠責推移日月之久卒之異能須繇贊郡之微勞濫受守邊之  
優寄不馳驛騎幸當兵寢之時兼領鐵官偶最錢流之課寔惟  
地寶夫豈人謀嘗因天陞之對揚親被玉音之褒拂初無推轂  
復使乘輜唯是同安政當准右考於方志舊為楚國之附庸驗  
被民風尚有漢臣之遺愛豈茲謗薄可稱拊摩此蓋伏遇 皇  
帝陛下器使群工鑒觀萬務方當循名責實之際尤重承流宣  
化之臣

謝除知泉州表

鄭丙

宣力藩條初無善狀陞華書殿忽奉優恩衰朽增榮凌兢因措  
臣中謝伏以周人敬老每問政以乞言漢世進侯或賜金而增  
秩必有功而有德斯懋賞以懋官苟非其人曷稱是進伏念臣  
稟資甚下任職叨逾高宗更化之初糾繩學省壽皇臨御之始  
分察憲臺累更使節之華編歷中郎之遷掖垣鎖闥初無封駁  
之能宗伯天官何有論思之益細書東觀進讀邇英賜卮酒於  
便朝寶宸奎於私室一從外補三易佞藩松柏後凋寧改霜雪  
之操桑榆已晚尚謀田里之歸慶真主之龍飛偕輿人而歡舞  
念昔陪於王邸幸蚤識於天顏敢意記存首加獎勵願聖主之  
英俊布滿周行豈奎畫之褒題乃從隗始年齒雖高而德不稱  
踐揚滋久而效未彰靜惟將髦之資曷副惟新之化茲蓋伏遇  
皇帝陛下履位正中憲天聰明日月照高衢夙稟生知之德雷  
風鼓萬物孰知帝力之神方茲初正之施講求尚齒之制指明  
明光之邃直畀孤遠之老臣雖故事由常伯而出者間有此除  
在公議則人品不堪者豈宜冒處臣敢不益堅素守力企前修  
賞一人勸千萬人惟知砥節以礪行行百里半九十里靡敢倒  
行而逆施靡竭涓埃仰酌覆燾

謝到任表



留守

留守到任謝上表

歐陽永叔

守宮鑰之謹嚴敢忘夙夜布政條之纖悉上副憂勤寄 非堪  
統榮並集 中謝 伏念臣賦才庸薄稟數奇屯毀譽交興 常過  
實寵榮踰分動輒招尤念報効之未伸敢不竭忠而盡瘁困風  
波之可畏則思遠去以深藏逮此六年外更三守學偷安而杜  
口負素志以媿心朽質易衰已凋零於齒髮良時難得尚希慕  
於功名豈謂皇慈未捐舊物擢從枝郡委以名都惟此別京舊  
當孔道傳薄領少勤於職事厨傳取悅於路人苟循俗吏之所為

雖能免過非有古人之大節未足報君

留守到任謝上表

蘇子由

越從散地擢領留都仰戴恩光惟知慙懼 中謝 伏念臣早蒙器  
使屢試煩難任重多憂積衰成病乞身閑冷但求安養於餘生  
絕意功名不復干求於當世豈謂聖恩未棄見收桑榆枯木再  
生重沾雨露自聞此命莫知其由泊獲見於清光復親承於聖  
訓盡出陶鈞之化曾微左右之容昔漢宣起張敞於七徒漢武  
用安國於梁獄古或有是今則無之向非日月之照臨不遺隙  
穴之微陋則已廢之跡誰肯復收臣敢不勉勵疲駕宣布政令

雖天地之恩不報而犬馬之志長存

留守到任謝上表

南陽重鎮久愧於無功留鑰之人復叨於寵寄祇奉綸綍初見  
吏民中謝伏惟 皇帝陛下選用列辟藩屏四方獨化陶冶之  
潤不為親踈之異乃眷別都之地實為創業之邦控引大河遠  
通江海之利列置諸將並擁絕虎之師舟車四馳賓旅若至歷  
觀近世多用重臣顧省庸虛豈宜忝冒伏念臣遭逢早歲流落  
中年不意班白之秋置身侍從之列秉持旄鉞鎮撫方州負乘  
有致勉之憂老病非濟時之器向非荷天地生成之德被日月

照臨之明孰為先容保此弱植臣敢不瞻望京邑推廣風教之  
餘勉強疲篤少致涓埃之報

安撫

蜀帥到任謝上表

潘時

奉殊庭之香火方就退閑有使節之光華誤蒙臨遣指 維而  
叱馭壓楚道以爲惟祇載恩榮深劇切臣中謝伏念臣奮身  
寒遠遭時盛明學古入官無孔氏淵源之師友奉公行法愧漢  
廷篤厚之公卿頃膺名節之頒再見脩門之入郎曹高選少列  
清躔既乏馮唐面帝之賢徒起班公登仙之美寔陞廷尉寔冠

諸卿自知糠粃之在前惟恐駕駘之殿後孤立一意冀銷雀角之欺刺口盡言屢批龍鱗逆雖荷淵衷之洞鑿其如衆口之難調去國適年起家一節俾免侯瓜之次許趨面棘之期訓獎至於再三感激幾於千萬捫參厯井雖重經蜀道之難就日望雲自不覺長安之遠退循懦質曷稱鴻私茲蓋伏過 皇帝陛下剛健粹精明淵懿憫勞臣下每視過以知仁加惠黎元將荐近而舉遠軫念岷峨之瘠廣搜楚漢之官致此迂愚亦預選擇臣敢不深思德意少効忱哀六轡如絲當使西陲之肅八紘奠枕尚成南國之強

潭帥到任謝上表

晁之道

優以祠官方愬厚祿委之帥間遽冒優除乃參書殿之華以峻中權之重徒揮感涕有覲衰顏 中謝伏念臣艱拙不移朴忠自信願於劇煩之地每玷使令雖乏尺寸之功屢塵獎渥必欲殺身而仰報未嘗干寵以自營既抵大訶猶從寬典許坐縻於廩食獲歸掃於田廬誓畢此生更無餘願豈謂弱植上簡淵衷曲回天光親灑宸翰 與帥師之列還從翰墨之游矧茲長沙素號重鎮江山控帶民物夥繁自愆沉廢之餘不稱循良之選方欣隕首詎敢辭難此蓋伏過 皇帝陛下聖度天容皇明日照

仰神機之獨運動有成功揆和氣之一陶舉無弃物願惟極陋  
亦不遐遺臣敢不思蓋前愆勉收來效徘徊去國益傾就日之  
誠感激忘軀終踐襄尸之志

延安帥到任謝上表

晁之道

分袂服之漕權久懸曠職佩延安之將印仍竊誤恩寄彌重而  
驚心感益深而隕涕中謝伏念臣稟質孱陋遭世盛隆寢預使  
令過塵寵淫以至參華祕殿窺萬卷之寶書均禮禁途束九環  
之金帶並踰分量深懼顛濟方茲聞治之頒才忽以朽虛而代  
匱願慙一割寧佐萬分矧惟高奴實稱重鎮控秦門戶制虜襟

喉折衝間遣於重臣憂願每先於他路豈容樗散輒冒詔除此  
蓋伏遇 皇帝陛下溥若天臨赫然神化無小無大志主志臣  
彼羗獨迷慕義未篤申飭武備以須天誅臣敢不仰奉聖謀俯  
嚴師律皇威非震宜遂華於野心篤力何施第永堅於死節

越帥到任謝上表

張真全

領大滌之洞天方養痾於故里懷會稽之印綬遽假寵於名簿潘  
拜恩不貲省已增懼中謝伏念臣奮身寒遠操術迂疎早辱聖  
神之知沒階政事之選曲學泥古既已昧於經權直道事君初  
不擇於夷險果由踰分遂蹈危機爭前而媒孽者煽浮言之百

車附下而致者溢謗書之盈篋告魯參而三至理或可疑畏  
楊宸之四知初無甚愧賴睿明之洞照察愚悃之無他卒蒙全  
度之仁俾遂投閑之請不能者止乃分之宜重緣多病早衰承  
甘棄置敢謂曲成善貸復預使令眷懷惟懼之舊臣榮昇股肱  
之近郡審是肇新府號久駐蹕聲復句踐之故榭屬嘗膽枕戈  
之志想神禹之遺跡服卑宮菲食之勞故此回奎之初表同留  
鑰之重再命而倭曾避之靡容一節以趨豈衰遲之敢憚經  
由行闕賜對便朝進瞻法座之顯昂恍若鈞天之夢寐親被訓  
辭之溫厚策然華袞之光榮近比所無叨蒙至渥此蓋伏過

皇帝陛下躬堯舜之孝悌可以通神明法文王之憂勤故能治  
內外博求良翰共濟康功念茲遺簪墜履之餘付以皂蓋朱幡  
之寵紆丈二之組視印云初瞻尺五之天望雲伊邇謹當黽勉  
從事平易近民宣布恩言庶少蘓於凋瘵申嚴條教期漸弭於  
奸偷報國之心捐軀是力

四方安撫到任謝表

京 鏜

虞廷疇工方廟六曹之貳蜀道謀帥遽叨四路之全天高靡聽  
於懇辭地重莫知其稱塞川浮陸走未臨蚤叢開國之區雨施  
雲行已覩龍飛登極之運慶宇宙千齡之啟忘道塗七月之勞

既奔馳抵所領之州遂鼓舞布維新之澤臣中謝伏念臣生長  
農里遭逢聖時在高宗紹興之季年濫塵末第逮壽皇  
之中歲誤玷親除內贊臺評外分漕計雖憂患相仍再纏於直經  
亦收名不棄兩等於壘書匠卿營繕之靡聞宰掾彌綸之何補  
愧非言語之選敢期報聘於鄰疆雅乏論思之長安得躋榮於  
禁闈泊宅牧畀坤維之寄俾元員為益部之行次對旌一時從  
臣之功不五旬而躡居於是職制間為今日諸侯之長矧數道  
倍廣於他藩惟西陲之一隅當北敵之三面頃號富饒之最比  
多趣迫之憂距行關八千里而遠事每虞於壅塞養重兵六十

年之久民已困於征輸必壯猷夙望克稱於倚毗豈綿力薄才  
足堪於推擇茲蓋伏遇 皇帝陛下奉元而養萬物麗正以照  
四方詢事考言允符聰明嗣位之託臨政願治親承精一執中  
之傳凡見於今茲使令百執之間皆定於昔者參決萬幾之日  
致此隆委及於孤蹤臣敢不戴重華之舊恩布上聖之初政近  
考唐相籌邊之策遠稽漢臣樂職之詩念國家之重軍民所宜  
一體敬子孫之事父母其敢貳心

福帥到任謝表

馬大同

起家分閩忻逢舜禪之朝易鎮全閩又進文謨之直願登對莫

禪於初政豈愚忠上合於淵聰既見吏民具宣德意臣中謝臣  
黃緣未學遭際明時兩仕於朝荐至九卿之班列一官於外備  
諳四路之驅馳何心毀譽之來但覺風波之險投閑故里寅奉  
真祠上流忽拜於新除再命旋更於隆委修門初入當九五大  
人飛龍之天長樂此來為二三舊臣歇馬之地民齒繫夥海隅  
晏清要須威名夙望之人乃稱禮樂詩書之帥夫何么麼首預  
選掄茲蓋伏遇 皇帝陛下離照重明鼎新庶政責郡國以治  
理之效欲田里亡歎愁之心畀臣二千石之章需其萬一分之  
用臣敢不舉大綱而不紊去小智之自私上下相安庶自得於  
湖山之外幽枉必達使如在於畿甸之間勉修稱職之方是乃  
報恩之所

閩帥到任謝上表

張全真

名還經帳猥荷記憐就易藩符特蒙委寄布宣聖德慰諭遠民  
皆云遣政事之舊臣可以識朝廷之至意望雲仰戴夾道歡呼  
始拜命以兢惶既入疆而感涕中謝憊昔甌粵險遠之地為今  
東南全盛之邦八郡支分封圻廣袤三山鼎峙形勢尊雄向由  
劇盜之震驚尋若庶兵之供億公私垂罄井邑就荒加以田疇  
亢旱之餘仍當海徼防秋之日宜有撥煩之畧以為善後之圖

伏念臣才厯試而不長命數奇而寡與政塗三載曾莫記於勲  
勞輔郤兩時亦未聞於課最既追譴訶之域遽陪清燕之間第  
迫病衰力祈退縮豈謂中宸之眷復分南顧之憂不敢固辭以  
貽擇事之譏尚期力行以勉報德之效此蓋伏遇 皇帝陛下  
廓蓋容於天地躬勤儉於家邦明以見幾仁不忘遠察臣久侍  
帷幄知勤恤之為先憐臣嘗備藩維粗安靜而不擾濬發獨斷  
申加茂恩再念臣本出畧知最為孤藐粗由直道不敢愛身願  
惟閩中稍遠闕下俗既熾嗇以趨利士多請寄而為奸固當守  
法奉公以絕貪冒之私不敢違道干譽而懷畏避之計專求民  
瘼以固邦基諒無遠而不聞幸容光之必照挾知馬問羊之數  
雖愧昔賢易帶牛佩犢之風願師循吏

成都帥到任謝上表

蘓叔黨

西南都會古稱巴蜀之雄表裏山川國本蚕叢之舊士風厚善  
民訟簡稀宣布詔條告諭父老咸悉朝廷之意曾不鄙夷其民  
故擇宗臣以安遠俗中謝伏念臣斗筭小器樸樸凡材生逢日  
月之明得遂箕裘之志夤緣一任任寢被使令嘗蓋試之於邊陲  
又復寵之以延閣畧無毫髮之補報徒竊天地之恩私眷此坤  
維號稱錦里其民務本而力穡其士好學而有文組織被於中



原富饒甲於天下歷觀祖宗之遣帥率皆廉廟之偉人願委任之非輕知撫循之有自四力刀見夢著史策以為榮兩使占星候天文而協應如臣才能無取問望素輕叨冒寵光有覲面目茲蓋伏遇 皇帝陛下則堯之大法禹之勤建六官而代天工操八柄以馭臣下坐念五十州之遠特軫淵衷必求二千石之良往宣德意知臣忠孝祖守筋力未衰使之察吏而督姦豈貴邀功而生事邊鄙不聳庶幾魏絳之能獄市兼容遠師曹參之治臣敢不益堅素節圖報睿知上寬宵旰之憂次答生成之造奉天威之咫尺若臨淵水承玉命於春秋敢忘夙夜

府尹

開封府尹到任謝表

晁之道

河圖列職實儒者之至榮屏翰承流蓋聖時之盛選搆分獨驚感恩以泣中謝伏念臣早繇際會久玷使令昨自候藩擢參天府勉以孤忠之素守異收夙夜之微勞而材昧撥煩割非游以恍歲年之再易宜罪戾之不多敢意加矜更叨外獎惟之罟之故地控朔漠之上游自昔守臣率時名輩矧茲延閣尤號華塗書溢於上臺分職尊於冊府悉容僥冒並集兢慙此蓋伏遇皇帝陛下恩撫萬邦道凝庶績先慈儉以風四海開仁壽以納

斯民故於共治之臣尤慎一時之選載惟今日之除擢特出九重之眷知願承清燕之間親稟訓敕而去請即弗獲理當即行不勝犬馬之情但極軒墀之戀然臣端逢休運屢對清光每瞻獨斷之明備職好生之德敢不勉驅駕蹇少効涓埃禁暴戢姦庶不生事奉法循理必期便民獲殫九死之心敢憚三年之計

聖宋名賢五百家播芳大全文粹卷五中

謝表

到任

關中漕到任謝表

晁之道

總戎塞上方玷新除轉漕關中復留舊任仍緣寵擢遂進職名初無橫草之功過沐流根之澤外慙寔試中愧空餐中謝伏念臣稟質至愚遭時極盛自負平生之所學庶幾夙志之可償頃自朔方改從陝服親承訓敕勉就涓埃敢期下照之明亟預中權之選大懼稟資之篤塞不能宣國之威靈還即故官重慙非

據因加誤獎尤愧無名誓當畢命以馳驅或可酬恩於萬一此  
益伏遇 皇帝陛下天臨無外器使惟公號令一出於至仁覆  
載舉歸於洪造肆容孤陋備竊寵榮臣敢不戒昨已非勉今未  
及願終軍請纓之志深愧前條思晁錯寔粟之謀尚期未効

江西副運使到任謝表

趙善俊

假饒閩中方露引嫌之奏乘輅江表載叨易地之恩穹造曲加  
淵兢靡所臣 中謝伏念臣稟質孱菲託胄神明高廣御圖濫巾  
於賜第之後 壽皇撫運影纓於進德之前再睽即省之清班  
三切邊方之要閫兩持使節四把州麾初無蟪蝼之容可

恃為地盡出蟬蛸蠖 之眷幸豈非天丕惟離明繼照之辰方  
當鼎新凝命之日敢期隆委謬及微縱雖知勉於轉輸恐難圖  
於報塞茲益伏遇 皇帝陛下紹承聖統親事法宮荐禹於天  
誕受至尊之付託行舜之道茂扶盛際之雍熙嚴綜核以臨朝  
詔黜陟以馭下雖小大之材可察雖尺寸之用靡通在東宮參  
決机務之初固已為國而惜士茲南面總攬權綱之始益亦隨  
器而使人故此僥踰萃于謏陋臣敢不益堅晚 靡負壯懷仰  
豐矩以重規獲事三朝之盛雖薄材而綿力尚窮五技之施

陝西運判到任謝表

晁之道

恩假州麾迄無善狀寵參漕計亟荷恩私非所堪任惟深感涕  
中謝伏念臣<sup>愚</sup>緣薄技獲並英游當神考作新之時叨塵科級逮  
奉陵總核之日謬玷使令材每下而術愈疎力雖勞而効更寡  
久逃大譴終至煩言幸賴聖明再加辨察付之支郡責以成功  
終憑天地之恩獲展涓埃之効存庸獎擢倍與輸將願省竒辱  
覺有榮耀此益伏遇 皇帝陛下道參堯哲功本禹勤與物皆  
春四海無為而自化如日之照羣材不辨而已明遂致公微與  
塵恩施臣敢不益堅短尚深體至仁更誓糜捐必期報稱

運判到任謝上表

晁之道

越從寒谷進望清光亟自凡員預參繁使併軼初志集為汗顏  
中願伏念臣植學弗深稟資甚下猥繙經術誤列縉紳隨牒間  
闕忽坐移於歲月立身露若敢自必於功名幸逢千載制作之  
辰竊有一介激昂之志遂忘駕塞冀効涓埃瞻咫尺於天威被  
丁寧之聖訓叨塵採擇辱佐馳驅繼列私嫌荐蒙優渥益京右  
之地甚重而漕輓之務定繁密屏星畿近控閩陝歲時謹陵寢  
之奉緩急備河朔之虞為官擇人非才不處碩慙至陋冒竊殊  
私此益 皇帝陛下聖度并容皇明徧照政承帝事德享天心  
洪河九折而効清靈芝三秀而荐采茂迎祉福顯告太平臣於

斯時獲玷誤寵敢不悉殫綿力期稱厚恩趨赴事功少佐裕民之政布宣德意少裨愛物之心

江東運判到任謝上表

錢象祖

假守兩州曾無善狀乘軺一道過殊辱私祗事云初撫躬增懼  
臣中謝竊惟江表夙重計台屯戍相望力壯安疆之執糧儲不  
乏莫先飛輓之功况觀九郡之風謠而擅六條之督察采求民  
瘼稽攷弊源儻非得人安能勝任伏念臣吏能淺薄學術倥侗  
再綴班行願何裨於省寺游膺郡寄第克謹於簿書適值荒年  
粗述曠事臣固不為於赫赫人皆見謂之平平甫及終更敢懷

僥望豈謂如綸之下俾叨持節之行威顏促對於九重愚慮奚  
伸於一得亟被玉音之獎寔踰華袞之褒自遠闕廷采結戀軒  
之想祇趨封部復諧將母之安退省遭逢若為稱塞此益伏遇  
皇帝陛下大臨四海器使群才內廣治謨極法度紀綱之盛外  
嚴便事期德意志慮之宣退惟冗散之姿曷副簡求之妙臣敢  
不仰恩隆眷俯激懦衷靡憚馳驅務使周知於聖化誓公刺舉  
庶幾不務於訓言

福建運判到任謝上表

沈作屬

三輔守藩已窮鼠技七閩將漕更冒鴻恩願屢試之罔功惟弗

勝之是懼茲臨封部已見吏民臣中謝伏念臣忝以故家濫登  
仕版本乏邊時之才術徒懷許國之朴忠撫字一司割雞為愧  
棲遲半刺展驥則非誤膺共理之求旋與陟明之典挽粟駕一  
封之傳驅車登九折之塗界以祥刑已持江右之節起之祠館  
再分浙左之符政則拙而心勞力唯勤而功半誤拜使令之寵  
尚叨臨遣之榮惟茲東甌素號瘠土人鮮力田之業利專煮海  
之饒輸賦之入有常鬻醴之原浸微欲盡榦旋之妙必資經濟  
之能豈繁疎庸可當委寄茲益伏遇 皇帝陛下屬精漢治博  
施克仁察臣久効於驅馳猶知德意怜臣備嘗於險阻必達民

情出之絲綸寄以耳目臣敢不將明使指檢抆吏姦激濁揚清  
期道續言之責如予為取少裨裕國之勲庶以涓埃仰酬海岳

福建運判到任謝表

陳公亮

都司糾察每惧素餐閩部將輸復叨隆委念去國而猶未遠日  
幸入境而已遂觀風跼躅思深歡呼德溥臣中謝伏念臣性資  
朴魯學殖空疎徒知克己以盡公未免直情而忤物賴作成於  
紹興之舍選飽齏鹽者蓋十五年逮龜勉於淳熙之班聯糜廩  
稍者幾三十載俟泮宗庠而分教匪異縣尹邦儲而盡瘁則同  
惟嚴瀨之分符寔高宗之潛邸常賦偶功於奏最殊恩屢沐於

疇庸仰蒙聖帝之簡知親被有聲之舉恭值飛龍之賜對側聞  
平正之稱即庾部而躡進銓曾陟樞屬而遷遷宰掾爰自寵榮  
之過分每懷更迭之陳情屬當閩漕之闕員未勞美印俄自都  
公而承乏竟畀乘軺矧兼八郡之轉輸允係四方之觀聽不徒  
欲餉餽之無關要湏令疾苦之周知必得不吐剛茹柔之才乃  
能稱激濁揚清之職靖言弱質曷際隆知茲益伏遇 皇帝陛  
下覆燾如天照臨若日用人惟才之盡發政無遠之忘謂臣久  
廁於朝行孰知德意知臣自詭於民事欲究譎能遂令衰晚之  
蹤獲在臨遣之數臣敢不清源正本律郡吏於庶平致慮周思  
達遐邦之幽枉誓窮丹悃仰答鴻私

江東運判到任謝表

薛叔似

糜廩中都邈無報稱將輸一道復被使令初入境以觀風敢籲  
天而披露臣中謝伏念臣性資龔拙學術迂疎名弗振於鄉閭  
分甘從於州縣驟由冗地躡處榮塗當壽皇燕翼之時暨嗣聖  
龍飛之日俱蒙異眷數近清光徒懷許國之誠以對幽顯殊乏  
濟時之策有補高明意曠責之難逃賴賴恩私之曲覆匠監繕修  
之役亟昇崇班計台詢度之行旋膺重寄矧知江左寔通畿封  
惟使事之繁非他部之比所甚匱者公私之積務先源流本末

之求所當恤者休戚之情宜有勞來輔翼之政刺舉官吏之能  
否維持根本之安強豈伊凡材所克勝任茲益伏遇 皇帝陛  
下體元居正一視同仁操予奪取舍之公無內外遠近之間恰  
臣之愚欲稍全其進退知臣尚壯姑少試以馳驅俯徇卑悰特  
頒戒命臣敢不恪供乃職惟既厥心表裏江淮因試古今之形  
勢光華原隍毋忘咫尺之威顏臣無任

廣西運判到任謝表

朱希顏

上廬陵之印方就日以來歸乘嶺嶠之輶俾觀風而諏度遠民  
寄重當宁恩深臣中謝伏念臣知慮庸周才安曷適間闕一第

奔走四方少焉有志於事功叩關無路仕則徒勞於州縣推轂  
何人比獲覲於威顏乃誤承於睿獎承流易地載德自天三年  
控竭於微誠千里粗安於拙政甫訖代瓜之戍遽分輓粟之權  
曾何殊功冒是隆渥眷茲二廣貌在一涯官資煮海之饒民敬  
嚮鹽之弊願前後法令之更定期作於涼而公私利害之多端  
要歸於是人言弗壅物理乃宣支體或傷寧免上心之惻怛耳  
目所寄可忘聖意之丁寧獨荷主知自怜臣慙九殞莫酬於洪造  
一生誓畢於孤忠惟憂迂疎莫稱期待茲益伏遇 皇帝陛下  
乾坤容稟日月照臨視民如傷遠弗遺於草芥取人為善微亦



逮於芻蕘推擇既寬凡庸或添臣敢不勤求民瘼督察吏姦肯使肥瘠有若越秦之視當令蠻貊同歸堯舜之仁

廣東運判到任上表

雷 灝

濫司臬事深愧因功就易計台敢希誤寵矧部封之如故而教條之易孚自揆僥踰深增悚懼臣中謝伏念臣稟資蒙陋涉世迂疎三縮縣章兩紆郡紱惟知奉法以循理敢云學道而愛人驚歲月之倏更靡勞能之可紀偶承人之躡備使華民積困於州縣之苛吏習嫚於朝廷之遠周爰咨度猥叨廉察之權漢因濶疏莫著平反之績深慙尸素恐速譴尤值上聖之作興湛皇

恩之溥博嶺海萬里岸獄一空茲曠澤之所覃在微臣而何力豈期差擇驟畀輸將事劇而責深力小而任重望不及此報將謂何茲益伏遇 皇帝陛下如日方中法天行健緝熙庶政昭文命以誕敷照臨百官視重華而允協遼際承平之運不忘念遠之圖謂臣粗按民情或審裕足之計俾臣肅將使指庶殫奔走之勤惕若懦衷膺此隆委臣敢不究心夙夜畢力事功要俾上恩偏及閭閻之隱冀令遐俗悉同畿甸之安

湖南運判到任謝表

張 績

推行賜粟之恩本服勤於常職敷錫明綸之寵誤進直於英躔

方謹藩符復更使指驚寵光之頻若循涯分以凌兢臣中謝伏  
念臣拔迹寒鄉遭時盛際樸學粗通於章句偶世儒科天威獲  
望於清問收塵策付辨魯愚而何有審枋鷁之自安屬以懼憂  
飄然去國再忝川麾之寄三分蕩節之華廣帝德之好生每期  
不殺幹邦儲而護漕必務正辭歲華雖老於簿書民事粗更於  
輓軌問牛羊之芻牧屢叩天闕歌鴻鴈之功勞幸安邊瑣拜寵  
靈之下逮體疎遠之不遺道山隔半世之塵夢復疑於瀑直湘  
水鼓春風之棹賦欲反於離騷來從蜀道天難稍覓長安之日  
近茲益伏遇 皇帝陛下堯仁舜孝禹儉湯寬體乾健而昭俊

明化行風偃致泰通而持常久道運日新方恢車攻復古之勲每  
盡棫樸能官之美致茲孱瑣屢玷使令臣敢不夙夜在公冰霜  
厲志令恪修於庭戶周詢風俗之便安人自得於湖山務廣朝  
廷之德

提刑

四川提刑到任謝表

陳履常

惟蜀中之右地乃海內之上游家有刑書知而不犯地為沃野  
富以無求罔罔屢空枹鼓幾息久安周召之化寢成齊魯之風  
延見吏民間以疾苦諭以寬大之意使無鞭撻之憂觀其歡欣

見於眉睫無以為報莫知所言中謝伏念臣賦命數奇與人寡  
合以記誦之學起賦畝之中以刀筆之能供州縣之役居無邑  
里之譽孰為先後之容况茲罪戾之餘宜在弃捐之數因緣過  
聽蒙被誤恩備員理官久出衆人之後奉使認獄再為萬里之  
行明大義以決疑無儒者之效奉三尺以從事有俗吏之訛自  
知甚明人望何在豈期幸會復與選中用過其能恩非所望此  
益伏過 皇帝陛下以神明之德常制作之時樂與諸臣慎守  
成法明揚不次之位期致非常之人領臣之愚何以為報謹當  
竭犬馬之力收桑榆之功明慎庶刑慰安遠俗以身許國不知

蜀道之難視日近人信有長安之遠臣無任

江西提刑到任謝表

汪彥章

奉將親養人榮故里之歸就易使華地止正重湖之隔休舍甫温  
於坐席乘輅即次於提封中謝伏念臣本非通材出偶嘉會由  
銅墨徒勞之賤誤冕旒特達之知兩膺臨遣之榮五玷將明之  
選比自遐方之內徙幸蒙私計之曲從復被更書俾移鄰部上  
聖體好生之德舉寰區皆遠罪之民所至罔空無煩台治第負  
揚於明指定有愧於厚恩茲益伏過 皇帝陛下治本隆寬時  
臻累洽大為成法於庶言庶獄以罔兼詳責有司恐匹夫匹婦

之失所而臣再蒙一路之寄悉在大江之南雖山川封域之或殊而閭里人情之未遠唯當緣飾以經誼不獨拘繫於簡書庶臯陶在泮之風成虞舜畫衣之治刑無刑而廣上意敢不盡心老吾老以及人親尚期從欲

永興提刑到任謝表

李成季

從事府僚訖無善狀詳刑陝部遽忝誤恩祇命入疆撫躬失次中謝伏念臣學非知與才不逮中晚綴辭科濫登仕版猶未弃詩書之習初不更州縣之勞講藝泮宮無以應諸生之問校文芸閣莫能窮未見之書朝廷勸養之甚優事業空疎而幾廢低

徊末路慚負盛時未嘗赫赫以動人姑幸循循而寡過勉從吏責出佐藩方甫及再朞而還寢遷大尹之佐顧浩穰之多責益黽勉以自持寔有愧於吏能偶遂迹於官謗屬以田廬無沒兄弟凋零孤窮不收嫁娶未畢事君之義固內外以一心在臣之私有出處之異勢屢殫愚懇過覬使州豈謂天能聽而弗違日雖幽而必照不加以罪曲盡其情特假於使華俾分持於邦憲量材非稱冒寵若驚况閩中之奧區為天下之劇部廣輪者三千里襟帶者十八州氣俗喜爭動成祇冒山林多阻易致奪攘必得通明之才以均察治之寄如臣煩闇遇事濶疎雖知任大

而盡心尤恐力微而敗責此蓋伏遇 皇帝陛下性齊舜哲  
政邁湯仁表德禮以示人實誠明而格物將使路遺不顧人有  
夷齊之心田畔相推家成虞芮之俗臣敢不仰思欽恤俯務靜  
安開於無事之時衡以至公之聽鄉隣不擾犴獄無由誓殫夙  
夕之勤力圖毫末之効澄清之志非敢望於古人忠厚之風期  
少禪於聖治

京東西提刑到任謝表

李成季

詳刑陝右已乏事功易部畿東再叨恩旨量材非稱載寵若驚  
中謝伏念臣賦性迂疎聞道蹇淺沾濡薄祿游泳聖時學文未

去其陳言從吏不聞於善狀亦嘗陪書林之豪秀佐天府之浩  
繁必有可觀未始錚錚而驚世竟無他異但能碌碌以同塵屢  
懇便州遽分煩使事滋多而智窘責已重而心危勵志竭精知  
卷愚之無補累日易月顧罪戾之益深久玷官聯坐糜廩給方  
中前請復俾就遷既奉命以戴星徒搔心而望日惟京都之舊  
壤連海岳之故區生齒寔繁獄訟惟冗豈惟屢緩可使澄清攬  
轡登車慙非任使過家上塚預有光榮此蓋伏遇 皇帝陛下  
堯性自天舜功成物措世於中和之域道民於禮義之風將使  
四海為家有外戶之不閉羣生咸遂無一夫之向隅臣濫總刑

章恭承德意敢不究心審閱先事禁防寬猛以和上下無擾勉立涓塵之効仰酬覆載之恩

京東東路提刑到任謝表

李成季

承乏再葺訖無裨報易官東部尚玷恩榮循省已還兢凌失措中謝伏念臣學非稽古才不過人晚登仕版之榮寢通朝籍之貴兩叨持節三見周星疾病相仍安恤陰陽之患精忠具耗敢言犬馬之勞多慮近迂積憂成畏姑幸屏心而遠罪未嘗飾智以近名審閱獄辭惟恐失好生之意芟除偷黨庶幾惟瘳惡之風間屬年穀順成生民咸遂桴鼓之驚幾息桁楊之繫亦稀皆

神明之化陶成非奔走之臣能預方將束裝待罪指日言歸豈謂寬恩復更華使去長安之日雖遙千里之圍望岱宗之雲猶均一雨之潤文書有報復之速吏卒無將迎之勞昔乃吾鄰盡為屬郡今雖別部曾是故僚顧如此之便安寔非臣之覬望而况全齊大國頻海奧區水極魚鹽之饒陸多桑柘之美大姓挾賞而犯法細民禦貨以為姦非有強明之才孰分察治之寄自惟迂暗難稱使令此益伏遇 皇帝陛下憲天聰明體道變化紹復先王之政圖終寧考之功御一世之英豪納四方於仁壽夫何微品亦備下寮謂臣無他已嘗試之任使察臣寡過猶將

責以成功益天地之大而無私日月雖幽而必照敢不勉修官  
責祇奉憲條察辭於差庶不愆于明慎除惡務本使無害於善  
柔誓有補於涓塵期少酬於覆載

江西提刑到任謝上表

陸 洸

充員司庾初無斂散之功易節祥刑復玷平反之寄望輕責重  
感極涕零臣中謝伏念臣樗櫟凡材箕裘末學壯心凋落嗟勲  
業之無涯晚歲侵尋誓樸忠之自守差池郡縣奔走塵埃剖竹  
湖陰素乏循良之譽登車江右曾排幹之勞宜點而遷以榮為  
懼頃常攝事雖粗諳珥筆之風今拜誤恩豈足贊畫衣之治而

况案牘山積鈔筭日滋非于定國之平何以雨東海之旱匪願  
真卿之敏安能雪五原之寃必得惟明克允之倫乃稱從欲以  
治之意願如蒙鄙曷副選掄茲益伏遇 皇帝陛下舜德好生  
文心克宅期有司之不犯貴庶獄之因兼遂令疎遠之臣就試  
簡孚之聽臣敢不仰遵聖訓俯枕吏姦體漢網之濶疎俾皆遠  
罪廣周家之忠厚庶使興仁

提舉

淮東提舉到任謝表

汪彥章

臨遣江壩方員責成之寵改除淮甸更叨從欲之仁即至封陞

具宣德意益始望未嘗及此雖自謀何以過之中謝伏念臣綿  
力薄材寒鄉悴於草莽縉紳之後浸膺鞭策之榮往蒞閩區無補  
摘山之政洎歸魏闕遽分原隰之華入承當宁之清間申喻理  
財之曲折及瓜尚遠索米為憂蒙造物之寬恩與臨江之近  
地謂一方稍病此屋春耕秋斂之常欲此星皆蘇宜朝令力行之速  
其布哀矜之指以寬流冗之民豈臣蠢愚堪此優寄此益伏  
遇 皇帝陛下恢張治具駕馭人材垂衡聽以並觀遇寸長而  
必錄有屬瑣亦玷使令臣敢不仰承睿訓之丁寧不誤淵衷之  
紹術每懷靡及寧辭四牡之馳驅迄用有成願上三年之詠永

江西提舉到任謝上表

趙汝謙

假守光山上印僅逃於曠敗馳軺江右頒綸復玷於使令還家  
無坐席之溫申詔有促行之命戴天施厚伏地慚深臣中謝伏  
念臣稟資迂疎臨事樸拙曩由塵埃之末吏獲對日月之清光  
恩疏更秩之榮任重字民之寄服勞叢邑盡瘁遘州自慚已試  
之罔功每恥詭隨而希進敢祈今日荐被眷知迺蒙超躡之峻  
除曲荷生成之洪造第愧駕材之鈍莫勝駒隰之駟矧是提封  
寔惟劇部常平數廣寧免於具文茶榷事叢尚多於積蠹必得財  
貨源流之道始知公私取子之宜豈茲謏能冒祈隆委茲益



伏遇 皇帝陛下知人則哲視遠惟明念臣節用以愛民或可  
提邦財之歛散灼臣奉公而守法庶能察吏治之否臧假之重  
權責以成效臣敢不肅將上旨激勵夙心攬轡澄清益佩光華  
之寵問民疾苦仰酬覆露之仁

江西提舉到任謝表

黃維之

承流支郡方慚滿歲之罔功乘傳鄰封叨竊疏恩之躡等不崇  
朝而及境即交印以觀風揣小己之非宜報大恩而何以臣中  
謝伏念臣蚤遊庠序本起農家荷高宗之教育十三年沉淪舍  
選願壽皇之期班四五考蹭蹬周行初列屬於成均斷自承於

棘寺懇求外補因獲對揚抖擻愚衷誤蒙喜納馴致孤蹤之綿  
旣久安衡宇以倘佯已列朝冠俄紆郡紱人沮西華之為大天  
開虞帝之達聰畀星渚之名邦號江東之道院地荒民寡田瘠  
賦苛庭有<sup>銘</sup>甯人無根蒂雀鼠角牙之莫辨雁鳧去集之無常  
第行王政之中和仰體詔條之寬大講求民瘼禁扼吏姦民瘼  
未除惟恐拊摩之弗至吏姦或露寧容箠朴之不施悉出公心  
初無偏徇以短檠讀注疏之眼而閱案牘曲直自分以太學食  
糈鹽之味而措<sup>措</sup>賦財經常亦足秋稅減多收之耗夏場蠲糜費  
之煩趣以農時年有豐登之慶為之醫藥戶無瘠癯之憂如臣

至愚何力之有端自聖神之作潛來天地之和久此尸官亦逃  
司敗初書下下之考邊竊皇之華煮海摘山茲固仔臣之短  
拙盈倉億庾亦知仁政之發施誓殫尺寸之長少効毫分之補  
茲益伏遇 皇帝陛下離明麗正乾健自強克盛舜隆不外執  
中之道武承文顯迄成卒代之功謹初政之權興與寄外臺之耳  
目知臣究心撫字必能持斂散之權察臣秉性蠢愚決不負將  
明之寄援之斗壘界以星軫臣謹當祇佩龍光載鞭駕鈍奉六  
條而察二千石要當激濁以揚清馳四牡而行十一州務在膏  
枯而醒暘

浙西提舉到任謝表

張孝芳

攝承卽省方懼曠源廉問郊圻遽塵差擇甫出闕門之外旋驅  
封域之中延見吏民布宣德意愧寵靈之誤及凜綿薄之弗堪  
臣中謝伏念臣性本鈍進學額迂濶服勤吏事初絕望於榮塗  
謬被荐書遂特蒙于嚴召周旋學館坐閱四碁綴緝容臺亦幾  
兩載星闈兼綜殊乏微勞天陛對揚曾亡奇策循內外更迭之  
制自詭治民遭神聖特達之知過叨煩使光華所被冒昧難勝  
仰惟勵精之初方舉貴實寔之政分道而置擇人以公曷三吳之  
與區繫千里之近向本根攸繫膏澤宜先并兼莫戢而利盡於

卷之五  
十一

富強賦役不均而害偏於貧弱課嚴筦權未究斯民生聚之源  
法備常平尚失先王歛散之義吏治之減否或浮於事實民情  
之疾苦猶壅於上聞必得忠信之人乃副將明之寄顧如駕劣  
亦與選掄茲益伏遇 皇帝陛下器使臣工試其政事恩施萌  
隸首自京師謂臣生長閭閻頗知利疾念臣更歷州縣粗守廉  
隅拔諸庶僚之卑付以一節之重臣敢不虛心諏度悉力馳驅  
散利薄征深体聖朝之寬政愛人節用勉思先哲之格言庶少  
効於涓埃用仰酌于覆載

淮東提舉到任謝表

李祥

十載周行官有慚於宿業八州漢部計豈任於乘軺詔玷選掄  
俯深統屬中謝伏念臣膠庠陶化州縣服勞曾微試吏之才長  
精識立身之大節入官一闕已甘老於選階出命九重爰濫班  
於朝序冒成均之講誦替農扈之經常右編摩太宗佐貳田憲  
曾之兼攝躡武監之陞遷皆非夢想之所期率自聖神之博取頻  
露殘更之請訖叨隆指之將載惟南渡財賦之淵尤籍東淮  
艱鮮之利重時民事加惠邊氓所宜妙簡於賢能乃始不孤  
於鞭馭傳聞疇曩賦入浩繁資公私冒沒以無厭食致內外徵求  
之咸萃門耗盡之門而不得草其弊制刺舉之肘而罔獲盡其

公譬諸一鄉之富民長作百家之怨府雖清朝擇人以堪遊而  
寒士得此以為憂恭惟壽<sup>皇</sup>臨御之長備究淮堧設施之要粵從  
從近歲稍用儒生謂其禍福不計其身謀利害必先於國慮  
有如庸瑣胡取馳驅茲益伏過 皇帝陛下出震當陽重離繼照  
軫十聖神州之念重兩淮鹽筴之優知臣莫若君曾是議堂之  
參決與人不求備一遵聖帝之規模遂致孤微亦蒙任使臣敢  
不恪恭吏<sup>貴</sup>貴<sup>貴</sup>奉詔條荐章靡徇於人言惟公是舉鹽本母虧  
於亭戶厥利自優服壽皇臨遣之訓詞酬睿主兼容之恩紀

浙東提舉到任謝表

表說友

一再命以為州咸無善狀六百石以察部誤拜渥恩身慚安便  
之為優衆謂甄陞之特異乾坤德大毫髮命輕臣中謝竊惟敏  
散之微權莫重常平之使者山澤之利以裕國倉庾之儲均於  
民惟源流本末之阜通則上下有無之兼足豈特欲九年之益  
蓄亦戒夫一孔之不遺恪持經常當辦取子至於民情休戚之  
本吏治減否之分事每壅於上聞澤乃周於下布求稱厥職益  
難其人如臣慙愚殖學荒淺謂其常更中外之職有志斯人尚  
可俾乘軺傳之馳往承休德庶以異時布宣寬大之意而為今  
日激揚清濁之公曾下下之考而未書乃皇皇者華而遽造就

臨所部寔寵其行茲益伏遇 皇帝陛下器使羣工鑑觀庶物  
與我共理儻田里有庶民之安惟爾之能則命秩示列城之勸  
博求庸使下及孤縱臣敢不尊其所聞期於不負無政事則財  
用不足肯務空言或登攬有澄清之風尚希前哲力殫素學仰  
答殊知

江東提舉到任謝表

周必正

公朝遣使尚求拔萃之賢小已何功誤沐臨軒之寵未遠長安  
之日已觀屬部之風佩上德以惟深揆凡材而不稱臣中謝伏  
念臣本非時用粗讀父書少嘗有意於功名晚分徒勞於州縣

偶因論荐被弓招繼荷選掄得塵班列族引親嫌而外補猶希  
幼學而壯行周旋兩羣之間荏苒十年之久齒髮已踰於耳順  
樵漁屢決於心盟自甘平進之餘生無復叨榮於末路忽蒙記  
錄使玷將明者海摘山豈特奏征商之課左滄右粥願首推濟  
衆之仁雖云自信於縉蒙終恐莫伸於報効茲益伏遇 皇帝  
陛下道隆堯舜運濟成康當飛龍御宇之初擴威鳳來儀之化  
賜對廣君臨之照聰言忘日 之勞天表粹和玉英恩厚察至  
愚而屢獎謂三策之可行既矜疎賤以兼收足認隆寬而盡下  
致茲辱陋亦預使令臣敢不祇服聖言勤求民瘼宣惻怛於困

窮之際謹咨詢於原隍之中遠有光華奉天威於咫尺庶無罪  
悔助帝力於毫分

廣南提舉列任謝表

王光祖

方海邦之秩滿僅免曠官適塩筭之議更遽叨煩使聖恩天大  
臣命毫輕曾豈憚於馳驅第當勤於咨度臣中謝伏念臣備嘗  
州縣綿歷歲時領瓊管之一麾涉鯨波之萬里絕無榮望驟被  
又除念昔充漕幕之員嘗躬督差丁役權歸公上利盡計司故  
有一十餘庫之贏資可當二十五州之經費費項緣湖寇橫絕淮  
商諸路悉仰給人間大農乃增羨其額及夫兵戈之定無復民

旅之來名數空存公私始困重以累年更張之論至為二廣以  
通敗之謀未始推原竟成聚訟要之東路便於客鈔西州利在  
官般俗豈可以強同獎悉由於偏用惟以全而即事毋執一以  
為功東不至發泄之不行西則使烹煎而無乏庶幾兩盡奚待  
多言茲益恭遇 皇帝陛下明照四方智周萬物灼羣情之利  
病咸與維新約中道以罷行豈容循舊至今疵賤得預講求臣  
敢不拜命周章疚心經畫亭戶失本柄而散徙首務招徠客舟  
操空券以稽留亟當趣下次趁八桂尋至五羊索要頌以奏陳覽  
冕旒之憂頌

播芳大全

卷五

中

播芳大全文粹卷五中

國家圖書館, NATIONAL CENTRAL LIBRARY, TAIWAN, R.O.C.



聖宋名賢五百家播芳大全文粹卷五下

謝到任表

提監 糴使 市舶 提點

制置解監到任謝表

晁之道

參預漕權閱日尚淺專司監筭戴恩獨深人微施隆感極涕隕

中謝

伏念嘗臣蒙學有志願寔無他雖慚簿領之小才粗識忠孝

之大節親逢睿聖獲効馳驅遠自漢中近陞闕右已深虞於滿  
溢敢復冀於超遷惟茲澤寶之興寔曰秦關之利乃因任而置  
使以裕財而便民豈容甚愚仍玷茲選此蓋伏遇 皇帝陛下



仁天徧覆惠澤旁流和氣所加珍祥自應願已臻於極治尚申  
勅於庶工雖在散才亦加器使積雪百里小裨富國之謀寔粟  
九年更助安邊之策誓殫死節圖報寵靈

河北糴使到任謝表

汪彥章

久汙郎選甘為襤被之行擢領使華叨奉資糧之寄叩命朝離  
於觀闕迎親夕至於封陞恩本曲成榮逾始念中謝伏念臣鄉  
緣朴學冒處周行甫辭州縣之徒勞即玷朝廷之臨遣寂無稱  
効積有悔尤黜持江外之麾收預省中之籍繫上皇保全之厚嗟  
孤生報塞之難逮茲煩使之乏人復以薄材而奉詔唯河朔

襟喉之地寔兵屯飛輓之後欲欲貿新陳長有餘而寔塞當權輕  
重無甚賤以傷農方大計之仰成豈至愚而能辨此蓋伏遇  
皇帝陛下昂新庶政鈞播羣材因時內外而試以百為隨器方  
圓而取之數路願斷、昆窮之技雖匪才堪然拳、烏哺之情  
可無祿養未授閑散仍獲便安臣敢不力効涓埃無忘夙夜金  
湯積粟上寬當守之願憂犬馬依人日俟乘輅之歸報

福建市舶到任謝表

張遜

星環北極久綴於朝班地重南閩濫司於商舶甫策羸而入境  
卽揆日以承勞施厚難量人微知幸臣中謝伏念臣蚤蒙教養

晚竊科名兩任乎民僅迹官謗七年就列累冒恩除自知僻守  
以昧時輒露忱辭而丐外天聽甚邇人欲必從眷今日通商而  
置官寔成周司市之遺意無者有利者阜要權取予之宜綏斯  
來動斯和貴有招怪之道惟詳加於簡拔庶或見於施為孰謂  
才卑乃堪器使茲蓋伏遇 皇帝陛下統傳堯舜德廣乾坤務  
在養民仍寬於征賦不寶遠物悉走於梯航畧臣作吏之術疎  
俾巨董時之貢入雖事權非諸使之比然責任亦一望之臨臣  
敢不仰戴鴻私俯竭駑力忠信以行矣捫心益懼於不能文德  
以來之稽首無忘於歸美

提點坑冶列任謝表

宋之

三丞游歷尤慚冊府之華一節疏榮猥冒鍾官之寄即近封而  
視印僚遠道以驅車豈伊非材堪此隆委臣中謝竊以當今之  
大計正仰東南歷觀自昔之利源必資山澤然地寶偶時乎顯  
晦則貨泉因是以贏虧欲流布而不窮在幹旋之有道如臣曹  
昧見謂潤疎再玷曲臺僅能雅拜晚游中秘茲愧空餐兼暨攝  
於郎曹沆河間於古事忽叨是選莫測其由雖口不言錢敢效  
晉人之俗第氏多盜鑄頗容漢世之姦退自省猶若為稱塞茲  
蓋伏遇 皇帝陛下體元居正足國裕民謂愚民久汙於周行

粗知廉介而儒者罕通於世務姑試割繁區敢不佩九陛之玉  
音走百城之輶傳念未聞於心計曷致錢流莫益示於身先庶  
臻貫朽

郡守

濟州到任謝上表

晁之道

荐將使指迄無均節之功冒典州符復有便安之幸息愈深而  
莫報量已過而知慙中謝伏念臣惟寔顯蒙才惟中下粗安義  
分不敢布求當大君躬攬庶政之初領賤臣首玷常平卒之選奉  
揚德意趨赴事功雖無補於熙辰偶獲迓於大譴藉頓易地積

愧空滄終更尚玷於使令內省載慙於僥倖此蓋伏遇 皇帝  
陛下懋昭舜考允蹈堯仁務成使於羣工用丕承於先志故令  
弱植均被皇慈砥節立名雖不能奮起於事業奉令循理尚庶  
幾企及其輩流

象州到任謝上表

高子美

量材東審踏懷退斥之虞剖竹南州殲被承宣之寄即工云始  
驚寵未安中謝竊以周武之仁不泄巡而不忘遠帝堯堯所病在  
知人而在安民肆惟僻陋之區尤賴撫循之吏願茲象郡邈在  
狼荒繫民瘼之難聞宜天心之曲軫必求豈弟武共理平如臣

飾

之愚寔世所棄橋門壁水嘗被教於先皇槐簡藍袍復蒙恩於  
陛下一行作吏百不逮人徒欣寸祿之及親未殞微軀而報國  
夫何遭遇獲備使令此蓋伏遇 皇帝陛下如日照臨譬天覆  
博罄四海而仰德列多辟以設都謂飭吏莫尚於儒故與人不  
求其備遂分偏郡姑試老生臣敢不廉謹律身寬平布政勤恤  
民隱但亡愁嘆之声茂暢皇風靡間迎遐之壤庶殫鴛力上答  
龍光

平江到任謝上表

張全真

枕辭屢瀆方甘鉞斧之誅一眷眷有加更冒藩維之寄布宣德意

甫

周覽民風咸云輟帷幄之舊臣所以惠朝廷之近地雖傷殘之  
未復知休息之有期責望甚深兢慙罔措中謝伏念臣才不足  
以任重智不足以見微向以撲忠親逢睿獎周旋路政恒知數  
馬之恭填撫即垣僅戢帶牛之俗再去朝而再聞蒙趣召於三秋  
溫詔嗣頒脩途夙駕密陪清燕榮冠通聯弟迫衰殘久苦苦賁  
薪之疾坐尸寵祿茂間橫草之勞再三瀝危懼於冕旒萬一報  
大恩於香火豈謂陰天之博施未忍存捐復分便地之名藩曲  
加任使况閣廬之故國為行殿之陪都門號龍蛇恍已迷於陳  
迹臺遊麋鹿驚復見於明時地名富庶而帑廩屢空歲幸豈登

而學正系道夫豈既憇之力可收共治之功茲蓋伏遇 皇帝  
 陛下勤儉守邦欽明迪德網羅眾俊休、焉若有容體貌大臣  
 下下以成其政謂臣守兩越之地粗免瘵官付臣以三吳之民  
 更觀未<sup>來</sup>效親承<sup>衰</sup>語不許辭榮臣敢不瘁身以字名力疾以從  
 事倘能小補其敢告勞驟遠楓宸實馳魂於鳳闕願瞻梓里庶  
 經始於菟裘尚期終惠之私俾遂養疴之志

湖州到任謝上表

張澈

錫對使朝被玉音之褒寵承流輔郡拜奎畫之丁寧恩重丘山  
 感淪骨髓曾靡淹於信次已祇布於教條臣中謝伏念臣才不

速中智難語上本亡奇於抱負粗有志於事功劇邑字民嘗叨  
 名審徧州佐治徒効拙勤<sup>勤</sup>一麾將志于桑邊六院猥陳於司鼓  
 適王畿之歲歉將使指以星馳靈品秩之階陞綴宗藩之簿正  
 居懸濫吹有醜素餐敢期命出於九重忽奉對揚於三接天光  
 下逮玉色載溫無狂狷之輸忠荷聖神之過聽百生際遇十載  
 寵榮界巨屏之蕃宣佩細書之誨飭時惟古雲寔號名邦事簡  
 俗瀉共知非昔政平訟理莫難今於征輸虛積負逋財貨致  
 虧於本末全賴守臣之風力或如聖訓之詔回要有通物成務  
 之才乃副治劇抑強之寄願惟庸陋曷與選掄茲蓋伏遇 皇

務

民

帝陛下道際乾坤仁均雨露與人不求備各肅所能共理必惟  
良弗輕其任臣敢不仰遵詔旨俯察民情無愁歎則田里安勉  
圖稱職有政事則財用足當務實心臣無任

湖州到任謝表

張欽夫

奉詔中陛分符近邦已見吏民敬班條教中謝伏念臣稟資不  
敏涉道未深誦編簡以窮年粗守趨庭之訓雖江湖之屏迹敢  
忘向日之心藐茲憂患之餘特軫記伶之舊既將詳試以民事  
又使密邇於行都賜對昕庭曲形睿獎辭闕闕未更于積日驅車  
已屆於新封仰在望之雲天依歸曷已願來迎之父老責望謂

何此蓋伏遇 皇帝陛下勇智維湯聰明法舜謂意誠心正澄  
源雖自於朝廷然本固邦寧共理亦資於牧守天何迂顛乃豫選  
掄惟是此方素稱瘠土而其輸賦獨重他州編居半雜於山  
林稔歲猶疑於衣食觀其生理良足興嗟臣謹當咨訪里閭推  
原根本悉陳利害之寔仰覲恩澤之流視民如傷用體大君之  
德意為國以禮更思先聖之格言

靜江到任謝表

還之寓直假以芥藩祇服訓詞已臨官次臣中謝伏念臣稟資  
甚慙涉道未深徒以蚤被於教忠故亦粗知於守義頃由頃省

彌

入侍經惟方聖主之有為思延忠謹愧下臣之未學無補高明  
居然半載之間負此素餐之責獨有孤危之迹上塵覆護之私  
終畀使州使歸故里甫及瓜期之近更叨改命之榮此蓋伏遇  
皇帝陛下爰養人才重惜名器謂臣鈍不生事或可責以撫摩  
登臣愚無他腸亦不忍於捐棄惟是桂林之地夙專制閫之權  
盡護邊蠻南極嶺嶠深虞綿薄莫副使令臣敢不思既厥心克  
共于事奉法循理期躬率於遐方和眾安民用仰承於皇武

江陵到任謝表

張欽夫

便私有請已愧乘輅改命稱優又叨分閫仰承德意既見吏民

臣中謝伏念臣惟金楚之上游寔皇家之要屏居吳蜀之會屹  
形勢之相閑控襄沔之衝渺規摹之甚遠自我馬平寧之後亦  
歲時閱歷之多田土膏腴莫盡新耕之利人煙蕭瑟靡聞舊觀  
之還既庶富之未臻諒恢圖之難濟孤聖主有為之志虛輿人望  
治之心謀帥之艱於今尤甚豈茲遴選乃及微臣茲益伏遇  
皇帝陛下明並日中仁同天大念臣服於先訓亦有意於捐驅  
謂臣守有愚忠或可望以立事肆加明試不忍遐遺臣敢不務  
集眾思勉圖來效事君以勿欺為主期利害之寔聞御示悔以得  
民為先當本根之力護庶幾毫髮仰答乾坤

平江到任謝表

呂伯恭

隆委難勝期於顛陪鴻私曲被遺以便安分書殿之榮光借侯  
 藩之將觀度越常典昭明異恩臣中謝伏念臣際會兩朝推移  
 三紀爵久渝於始願學浸負於初心越從蜀道之歸亟冠禁途之  
 還經帷詞集史觀銓衡持凌瘁之孤身萃高華之極選志彫  
 氣餒日慚職守之隙責厚憂深居有簡書之畏青灾狎至疾疹  
 相乘蘄外假於郡章覲遠收於朝跡曠茲茂庇近在修門置身  
 未外於函閣頤影忍違於文陛此蓋伏遇 皇帝陛下聖神立  
 極中正体乾字萬物以蕙容陶成固間品羣材而並用陟降無

私眇然簪履之微假以蓋惟之地臣敢不敷揚歸令懷輯里閭  
 增主之明廢任莫追於前悔務民之義疚心尚補於夙愆

筠州到任謝表

呂伯恭

九畿星拱並受藩條萬乘天臨誕敷宸指雖陋邦之代置亦德  
 意之親承且以聖謨告於樂土竊以舜門穆、輯瑞以朝諸侯  
 湯網恢、受球而綴下國思皇盛旦率履舊章肆勤前席之咨  
 溥及左符之寄腹心屏險臂指豪英凡拜賜於朱轡咸觀光於  
 丹宸如臣者至謏而拙甚愚以疎弓箕久負於家傳簪笏偶迹  
 於官謗長江右壤筠水附城盼竹使以承流已過斗升之量歎



楓宸以錫對辛瞻咫尺之顏此蓋伏遇 皇帝陛下濟指文明  
剛健中正下天上地酌民瘼以廣求小紀大剛收主威而總攬  
邈在山河之外皆如廉陛之前臣敢不遵奉章程慰安黎庶悖  
行教化漸消弭筆之風恪守部封少効挈瓶之智

吉州到任謝表代

竦罪倉曹無裨邦計分憂江國尚玷藩條丁寧臨遣之榮怵惕  
拊摩之責庀官甫始拊已載驚中謝維是庠陵介於楚甸玉膏  
而人瘠物夥而俗貧萬室連蔓剽奪時鳴於桴鼓千艘御尾轉  
輸日困於舳舻匪時通材疇荷隆委如臣者賦資謏薄涉世闕

上

疎兩郡民編蕩矣委安之效二年省掾居然尺素之慚亟求襍  
被之行復與剖符之寄力綿識既責重事叢惟仰恃於乾坤式  
俯資於塵露此蓋伏遇 皇帝陛下配天立極繼聖御圖恢舉  
閱摹網在綱而不紊操持大柄臂使指而必從雖遠在於江湖  
猶近臨於軒陛臣敢不布宣詔令懷輯里閭急效近功忍自謀  
於寵利深根固本誓勉盡於拙誠

南安軍到任謝表代

小壘漂搖濫受拊摩之責清都秘邃遠傾就望之誠祓飾愧辭  
冒聞滿聽中謝眷焉敞邑控彼荒陲大江之南朝貢雖數千里

中興之後生聚餘五十年諭誰民編俾知帝力如臣者置身冗散游世窮奇蚤厭干戈始悟息兵之深意晚觀詔令稍窺更化之闕規誓與疲瘡共安易簡恭惟 皇帝陛下妙參乾始靜順道原閒燕齋心自得大庭之館鑒觀孝治不遺小國之臣太極開先萬生並育臣幸同遐俗親見淳風雞犬相聞際粟陸赫胥之盛牛羊考牧皆車攻吉日之餘

建寧到任謝表代

呂伯恭

輔郡因功方顛天而慙慙潛藩非據乃易地以疏思優假至深凌兢曷已伏念臣奮繇平進親受異知參言語侍從之流遭逢

甚厚責獻納論思之効稱塞缺然假寵清廂分夏近甸拊摩無

術幸及於食新全庭有加訖蒙於念舊惟建溪之作屏寔代卿

之啟封屬此馬閑眷焉改畀官遊未遠馳驅尚記於壯時民力

已殫凋瘵頽殊於前日姑免圖於綜理恐終負於使令此蓋狀

遇 皇帝陛下明燭萬微克綏羣獻本末輕重咸歸統御之中

小大長短不出範圍之外碩如衰鈍亦獲便安臣敢不上體曲

成益思盡瘁士風里俗雖粗識於二三王澤國章曷布宣於萬

一

池州到任謝表代

淮壖乘障初無固圉之功江表干城復玷承流之寄甫祇職業  
恭布詔條中謝伏念臣繆膺世賞之延濫綴官聯之末役身冗  
散降命竒窮曩隨牒以戍邊造得燧而儆備當戎馬之侵軼屢  
瀕至危賴王師之奮張卒獲自保偶迹魚鱗之毀復沾魚行之  
分矧池陽之輿區乃江表之重地干戈再戢則必佩服包桑之  
戒兵農雜居則必洽比細柳之屯匪時宏材疇荷隆委此蓋伏  
遇 皇帝陛下剛健中正齊聖廣淵賜十行之書由神方國考  
九載之績久任官師自驚流落之踪亦預使令之列臣敢不悉  
循侯度祇若政經輯寧彫瘵之餘咨度弛張之要道上德意如  
瞻咫尺之光同衆戚休敢頌斗升之祿

廣德到任謝表代

厲精之朝嚴於置守坦明之訓飭以臨民佩天語以在塗參士  
風而問俗竊以大江之右一障甚微行闕之旁九畿莫近地輕  
而責重賦寡而費多指日待糧皆尺籍五符之舊無時致餽當  
大車駟馬之衝紛罷遣之相仍凜支持之不暇誰與領此厥惟  
艱哉如臣者受性顛蒙降材謏薄東西隨牒飽郵傳之風霜旦  
暮坐曹老簿書之歲月豈期末路驟試小邦茲伏蓋遇 皇帝  
陛下齊聖廣淵剛健中正輸運輻集合華夏以來王綱舉綱疎

總方維而受職矧在封圻之內寔同簾陛之前臣敢不遵奉詔  
條慰安閭里挈瓶守器誓殫守邑之勤毀瓦畫墁少答食功之義

黃州到任謝表代

呂伯恭

提邊符而來障愧非禦侮之材佩郡綬以長民莫稱承流之寄  
撫躬踴躍蒞事凌兢中謝竊以羣萬國之輿圖大一王之統  
御地分遠近之別政有先後之差繫牧守必得天猶良則黔黎  
庶底乎康又睠惟小壘介於長淮雖事簡而俗醇寔望輕而責  
重登覽故迹多名勝嘯詠之餘參攷前聞亦豪傑馳驅之舊肆  
求共理必東異能如臣者樸拙孤蹤凋殘遺疾冥心造化已絕

布

意於紫青屈首簿書第研精於朱墨伏遇 皇帝陛下錫天勇  
智受命溥將日月光華悉在照臨之下乾坤高厚咸歸燮燾之  
中九茲銅虎之盼尤謹玉闕之戍曾何疎賤亦預選掄臣敢不  
有宣詔條輯寧閭里挈瓶守器誓力保於封陲毀瓦畫墁敢坐  
麋於廩祿

南安軍到任謝表代

職方之籍用列列附庸公車之章乃容專達恩既均於率土誠敢  
後於籲天中謝惟嶺下之小邦寔江西之 處廐傳檄南北之  
會廩稍 前後之增民力彫殘無以追隨他郡地望卑薄不足

動搖有司既弗克勝復難自慙秩居人後憂在衆先如臣者聲迹至微技能甚短折肱州縣雖險阻之少嘗屈首簿書願神明之已耗晚推遷於官牒誤昇付於守符若為拊摩以稱臨遣此盖伏遇 皇帝陛下敷施鴻化丕冒上仁視邦遷侯方榮求於名杜考圖數貢亦因間於邾滕凡有識知同歸稟憲臣敢不布宣詔令遵奉科條尺寸之膚護養何裨於大體斗升之水涵濡終覲於餘汲

盱眙軍到任謝表

霍 麓

負丞戎監功無塵露之微假守邊郵恩有乾坤之大疾驅造壘

揣分踰涯臣中謝伏念臣黷舍諸生華門寒緒蚤濫塵於科第族祇役於簿書十載江淮粗結功名之想一心夙夜頗嘗幙府之勞適繇當路之知致有文章之荐誤蒙收召趣對近嚴隆恩過沐於褒嘉華秩驟膺於陞改憂深自詭方庇職於民封祿甫及親荐挺穴於私室偶全屬息始名餘魂已甘永弃於泥塗豈意復燃於灰燼董鬻貨生財之府稽聚材攻木之司綴員宗寺之班濫吹歛坊之佐方謹依流之進忽叨守土之榮取乏是須僮躬莫避矧都梁之畫境寔北鄙之要藩雖無城壁資固圉之雄所賴精神為折衝之本况負遷有無欲阜通於商旅而還定

壁

安集在摩撫於民人倘非練達之材莫副倚毗之寄有如委瑣  
豈稱選掄茲益伏遇皇帝陛下離日方升乾剛獨運大明廣照  
自無遐遠之道庶政內修將底版圖之復要領異月氏之得薊  
絲期晉色之能爰軫顧憂遂咨疇可庸示寸長之錄有光一郭  
之行臣敢不俯竭愚衷仰酬隆施車云來北童謠已驗於亡胡馬  
不牧南史筆載彰於盛世

房州到任謝表

汪德翰

分五符之守拜宸命以凌兢撫千里之封閭遠民之疾苦具宣  
德意祇奉詔條詔臣中謝伏念臣初無己能濫延世賞當高宗履

艱難之運眷天父有陪扈之勞靖康帥府之聲聞贊兵謀於朔  
部建炎王業之再造迄佐命於南京帷幄頻年始終一節由先  
世効忠於夾日荷壽皇軫念於凌煙猥及微蹤叨塵煩使昔兩  
試治中之任偶被薦揚今甫懷太守之章誤蒙推擇矧房陵之  
小壘介邊陲之窮鄉舍邑稀疎殆若三家之市山蹊險阻甚於  
九折之涂舟車困而行旅弗通曰畝狹而農夫告病頗為彫瘵  
政賴摩切自揆其庸愚殊未知於報塞茲益伏遇 皇帝陛下  
天臨九有子視羣工用才各盡所長與人不求其備察臣久習  
為吏粗諳法守之司謂臣或可承流俾膺郡國之寄臣敢不靖

共乃職惟既厥心勉布中和邈在遐荒之域都捐愆嘆示均畿  
甸之民庶寔曠瘼少寬憂頤

循州到任謝表

謝源明

上新安之計苟寔謹訶分太末之符游塵差揮仰戴君恩之重  
俯諧親養之私稱塞為難凌兢靡措臣中謝伏念臣性質竇陋  
學殖煙蕪朝暮壘益偶世科之濫竊塵埃捶楚甘俗吏之徒勞  
猥更治邑之繁誤玷監州之數方時攝守畢力拯飢困受察於中  
臺侵承流於偏壘奉十行而宣布粗臻回里之安及再暮而代  
還復覲冕菴之遠荷皇慈之曲造昇近郡以遣行若言四達

之繼寔今三輔之地舟車交湊雖名走集之衝冠蓋相望要是  
瑰琦之聚疇昔每除於法從比來至輟於宰司委倚之隆前後  
具見曷期品下亦在選中茲蓋伏遇 皇帝陛下錫福寰區苗  
神郡國嚴否臧而考條申黜陟之觀懲念臣已試之勞嘗叨列  
土謂臣方來之力尚足使令臣謹當恪意仰農平心聽訟五百  
里曰旬幸不違咫尺之威二十石惟良儻自詭萬分之効誓圖  
報上敢憚捐軀

鄂州到任謝表

王齊典

久汙朝蹟未殫下走之勞旋錫州麾仍付上游之寄假裝而問

川陸涓日以見吏民臣中謝伏念臣起自田廬蚤游庠序沐高  
宗教養之久嘗與鄉書應紹興科目之求乃膺官使自尉而令  
由倅以州入掌告身進聯書局察器用之良窳知廉粟之盈虛  
乃丐外庸更叨煩使釋耒鋤而漫任任總三十年懷印章而迅征  
為二千石望長安之遠遠日歎鄂渚之緒風矧無故都乃今重地  
舟車輻湊聚商賈之資庶窺虎雲屯處軍民之雜糝不有剝裁  
之具恐非牧御之長曾謂謫材可當隆委茲蓋伏遇 皇帝陛下  
下子懷兆民器使羣工謂臣歷州縣之官偶無逆事知臣諳江  
湖之俗或可分憂雖么麼自揣其非堪而聖明欲令其姑試若

為稱塞梁深積懼憂臣敢不仰體鴻私痛鞭駑下欲美化行江漢

之域此豈由彈壓而能使庶民安田里之居尚有撫摩而已

肇慶府到任謝表

林次齡

剖懷澤之符誤玷三年之最瞻興慶之印又叨再命之榮方觸  
組以懷歸迺移舟而就任冒息不次揣已奚堪臣中謝伏念臣  
仕無他長愚守幼學三鳴絃於千室之邑或笑其迂兩分刺於  
十國之連公亦何補久乘一障未見寸功偶塵上考之書復畀  
潛藩之地倦飛知退姑圖遲次之少安推輓使前敢意後來之  
居上况累政久虛之後屬積年彫弊之餘非催科撫字兩得其